

MAALU ÀDI ÈNZEKÀ LEELÙ

MMATÒÒKESHA KÙDÌ CIPROFETÀ

 Twinyikaayi mitu yetu. Taatù wa mu Dyulu munanga, tudi tuKusakidila dilolo edi bwalu Wewè utu wandamuna ku disambila dyetu. Mukaji munanga mukwate ne bya luse udi mulaadika kwaka wawa, dimupanda ndyedi dipangile. Kadi, Ëyì Nzambi wa yaaya, tudi tuvuluka dipandangana dya nzànzànzà dyàkenjibwà pa buloba apa, Wewè Nkaayeebe ngwâkadyènza. Wâkangata mu luseke lwa Adama, lubadi, kukanga mwaba uvwa mupanda awu, e kwenza mukaji. Ëyì Taatù, nyewu ndomba dilolo edi bwa cyanza Cyebe cipweke mpindyewu ne cyéñzè cintu cinene citudi tulomba eci. Ne bakwabo aba, Mukalenge, mukaji udi usaama mutu mumuneeme bujitu ewu, bakwabo bônsò bâdì ne malomba aba, nyewu tubalambula anu kûdì Wewè, Taatù, ne myoyi yetu yônsò. Mu Dînà dya Yesu Kilisto. Amen.

Bushuwa ndyèsè bwa kwikala kaaba aka dilolo edi ne kwikala ne bateeleji balenga aba kumpala kwanyi. Ne misambu bulengayi, kaakorale kakese kalenga kaa dikema. Mvwa mêmè ngeela anu meeji ku dishiilangana adi, pa kumona nsongaalume yivwa miimane mwaba wawa yaya miikale ne... nsongaalume ne mmwenekelu wa mankenda, ne nsuki mikosa ne mankenda ônsò. Mvwa ngeela meeji, makeelela dilolo awu, bwa—bwa mwaba wûndì musòmbèle; musùmbà wa bangondavi mmubwele anu muntwamu kadi kuswa bwa kushipa mwânà wa balume kampanda mu ciinà cya mâyi a dyowela; kukengelabi bwa balombe dikwacisha kampanda bwa kubapatula muntwamu. Ndishiilangana kaayi, pa kumona bânà biimane, bimba misambu ya Evanjeeliyo; dishiilangana kaayipu's we.

² Ndyambidila, pavwa Mwaneetu Henry wamba mwaba wawa ne, “balume baba bàvwà ne nsuki bu yivwa yikengela bwa bakaji kwikalabo bôbò naayi,” nudi numona’s. Ncya—ncya—ncya bushuwa. Ne mmwenekelu mwenze bu... Ntu mmona nsongaalume eyi yiteeta kucyenza, bwa kwikala ne nsuki ya nanku awu, badi mene beelamu ne bikûdî byetu ebi, binyunguluke too ne mu mpala. Kadi ncyeña mumanye to, misangu mikwabo ntu ngumwva too ne mu maboko munteketa’s. Mbimweke anu bu ne cikaadi—cikaadi cikondo cya dinyangakaja dya maalu cyetu cya bushuwa eci. Balume bakeba kwikala bavwala bilàmbà bya bakaji, ne bakaji bavwala bilàmbà bya balume. Ne balume balekela nsuki yabo myenze bu ya bakaji, ne bakaji biikale ne nsuki bu balume. Ncilumbu kaayi

ciine eci ne cisamba eci's, twamb'eku twamb'eku? Mu bushuwa bwa bwalu, meeji a nsòmbelu mulenga miine ne a diditwa dya mushinga aa, akaadi muumuke mu ditunga edi ne kudi bantu aba anyi, pa buloba apa?

³ Eci cikondo's ncya cyenza bwôwà's, kadi paaci's ncikondo cidi citambe kwikalala cya butumbi pa buloba, bwa kuyiisha Evanjeeliyo. Bu ne mvwa mwa kwikalala mwimane ku mubangubangu wa cikondo kumpala kwa kulwaci ku diikalaku aku, ne Taatù muntangile, mwambe ne: "Mmu cikondo kaayi ku bikondo byônsò ebi mûdì mufwanyine kujinga bwa kuyiisha?" Mvwa mufwanyine kujinga bwa kucyenza mpindyewu mene, ncya bushuwa, anu pabwîpi menemene ne Dilwa Dyende.

⁴ Pândì ntuma mêsù pa bateejeji, kumpala kwetu eku nkusòmbe... Mulunda wanyi kampanda mwambi, mu Tucson makeelela awu, ùwwa mubânde pa kabalu. (Ngeela meeji ku mutu ewu udi ne ewu... mukaji udi ne dinungu dimutacisha mu mwongu wende ewu.) Kabalu aku kumwimanshaku pansi. Mutu wa cyanaana kumbikilaye pa dîbâ umwe mu dinda emu, ku nzubu wa cilaala-beenyi kündi aku, wamba ne: "Mutu awu udi usanganyiibwa ku Lupitaadi lwa Bankolomu, ne mêsù ende mmashaale bu mmwenu, nyima wende muzaaza, twonyi twende tututamane, ne mwoyi wende udi wamba kwimana." Nenku mwômò amu mêmè kudyela pansi, kutwa binù; ku telefone, mêmè kumupeta ku nshinga, ne kumusambilida. Nenku's ki yêyè ewu musòmbe mwaba ewu dilolo edi, musòmbe anu mwaba wawa. Aci ncyanzeke dilolo dya makeelela. Bob, udiku mwa kuswa bwa ujuukileku kuulu mwaba awu anyi? Mutu awu nyêyè wawa, mwaba wawa mene. Nzambi utu wandamuna ku masambila, mu dinda, bufuku, mu nkankala, mundankulu, anyi dîbâ kana dyônsò.

⁵ Mpindyewu, mêmè ntu–ntu muyiishi wa muleebuluku, mutubo bacinyike's. Ndi ngumvwa bingenzaku bibi ku mwoyi bwa kubanga pa dîbâ edi dya dilolo, kadi–kadi mvwa mudyâmbidile ne nêndwe anu kunumwenekela cyanaana. Dilolo dikwabo, mona's, tuvwa twakula muneemu emu mu mwaba kampanda, nenku... tusunsa dikumi ne tutaanu paanyima paa mêmè mubange kwakula, bantu bakaavwa benda bangata malongo ne bangenza byanza ne: "Imanyika! Bwikila mukana, bikengela upatuke mwaba ewu," benda banwa mfwanka, ne benza bintu bya mushindu awu. Kacivwa cilema cya–cya uvwa mulongolole didya awu to, civwa ncilema cya beena mwaba utuvwa bafucile awu. Ki mukaji wa–wa mulongolodi was didya adi kuya e kwambilaye uvwa ne maalu awu mu byanza awu, kwambaye... .

⁶ Yêyè kwamba ne: "Ee, bidi bikengela nwénù kupatuka mu mwaba ewu pa dîbâ 9 ne tusunsa 30."

⁷ Awu ne: “Kacya kanuvwaku bafunde aci mu mukanda wa dyumvwangana to.”

⁸ Inābànzà ewu, dilolo edi, mmulwe apa (inābànzà wa maalu malenga wa dikema) e kwamba ne: “Tudi bumvwe ne ki cyûdì muswe,” yéyè ne, “shaala wêwè naaci anu ntanta yônsò wûdì muswe awu.” Pa nanku aci’s civwa cilenga cya dikema. Pa nanku ndi ne kusakidila kwàbûngì bwa bwalu abu. Abi’s mbilenga be.

⁹ Mwaneetu Henry, ncy a bushuwa ne ndi ngaanyisha musangeelu webe—webe bwa dimbiikila dyebe mwab’ewu, wêwè ne dyâpà edi.

¹⁰ Mvwa mupete dyêsè makeelela dilolo awu dya kwikala ku beena Assemblées de Dieu eku kûndì ngeela meeji ne Mwaneetu Boone utu mpaasata. Ndi mupicishe kuntwaku cikondo cya dikema cya dicyonkomoka ne kasumbu kaa bantu aku. Ne maalaba dilolo netuye mu mwaba kampanda muneemu emu, ncyêna mumanye ne ndwà penyi to, kadi ndyâpà dikwabo. Bôbô mbadi batangila bwalu abu; mêmè ndi ntungunuka anu ne kusambila, ne kubala, ne ntungunuka ngenda anu nya, ne ki cyônsò cîndì mêmè mwa kutungunuka ne dyenza.

¹¹ Kadi, mpindyewu, tudi tumona bintu bya pabwabi mu dituku edi. Mpindyewu ndi mvuluke musangu wa ndekeelu wûmwâ muneemu emu, muvwa mmu disangisha dya mu ntenta. Ndi mvuluka ne mvwa mucyâmbè makeelela dilolo, bwa babaka babidi bavva balwemu ne mwanaabo wa mu diboko mufwe. Ndwà—ndwà mu mwaba kampanda kumutu eku, bavva bendeshe mashinyi mundaamuunya mujima ne bufuku bujima. Maamù mutekete awu musòmbe, mubungame, kacya wambula mwânà mukese awu mu maboko. Mpindyewu, yéyè udi mwa kwikala musòmbe mwab’ewu mene patudi twakulangana apa, bwa ku dyanyi paanyi dimanya dyônsò. Nenku yéyè . . . bayende mutekete awu, ne babaka bakwabo mékù abidi biikale naabo, nenku bavva . . . Ki mukaji kwambaye . . . kunkonkaye ní mvwa mufwanyineku kulwa (mulume ngwâkakonka awu) ku mashinyi aku. Mêmè kupatula mwânà mukese awu ne kushaala kacya anu ngâmwambula; mubidi mukese, mufwe, muuminyine, mukwate mashika; ki mêmè kubanga kusambila. Nenku ndi mwenze anu nsambila nunku, mubidi awu kubangawu kuumvwika bu ne ùkaavwa wènda ùkwâta luuya. Ki mêmè anu . . . Mêmè kutungunuka ne kusambila. Yéyè kubanga kusuba mikolo ne kunyunga, wenza anu nanku, ki mêmè . . . kubangaye kudila. Mêmè kumwalujila mamwèndè, kwalukilaye nende kumbelu. Pa nanku, bavva bafwanyine kwikala kabayi nansha beena Kilisto to, bwa ku dyanyi dimanya. Nwamonu anyi? Abi’s bivwa bilenga bya dikema.

¹² Kadi cîndì ngeela meeji, dilolo edi, ndi mumanye kabidi, ekeleesiya udi munkaci mwa kupunga ne lufu, mbeena Mpenta beetu aba. Bidi bikengela tudinyukulule bwa kupatuka mu

cyôcì eci, uh-huh, ki cyônsò cìdiku. Ne mushindu umwepele unwikala mwa kucyenza udi ndisambila ne dishaala mu njila wa Dîyì dya Nzambi. Ki mushindu umwepele utwikala mwa kucyenza. Kudi njila wa kupatukamu anu umwepele, Yéyè ngudi Njila awu, Yesu Kilisto umwèumwè awu makeelela, leelu, too ne kashidi. Tudiku bafwanyine kuswa bwa wetu ekeleeziya kubwelaye mu ngiikadilu wa bwena uvwaye mwambe kuntu kwaka, bu wa mu Angleterre mwamwa awu anyi? Ki bwa cinyi ndi, munudi nudyambidila ne, ntu mupange kaneemu amu, nnutandisha. Kadi ncyêna ne meeji a kwenza nanku to, kadi ncyêna muswe kumona ekeleeziya ubwela mu ngiikadilu wa mushindu awu to. Nwénù kanwena baswe kwikalà mu mushindu awu to. Bidi bikengela anu bwa wêwè—wêwè kuCibweja bikole menemene too ne pawaCipoopela ne musonso bwa kuCikwacisha ndendende. Bikengela cyenjiibwe.

¹³ Nanku mpindyewu, dilolo edi, ndi anu ne...ndambu wa Mifundu ne cyena-bwalu kaaba aka bîndì njinga kwakulapu bwa ndambu wa dîbà. Ncyêna ngamba ne ndibà bule kampanda to. Wêwè muumvwe ne wacyoku, mona's...ndi mwa kujikija mu tusunsa makumi asatu, kadi mbilondeshile anu ku...Ntu misangu yônsò ncishilaku anu Nyuma Mwîmpè, anu mushindu wônsò walombola Ye awu.

¹⁴ Twinyikaayi mitu bwa kakwabo katanci kakese cyanaana, twakule ne Mwena Mukanda Wende kumpala kwa twêtù kuwubaullula.

¹⁵ Nzambi wa Bukole bwônsò, Mwena Mukanda ewu, mu Yesu Kilisto mmutudi tulombela emu. Tudi ne kusakidila bwa bitukaadi bamane kuumvwa dilolo edi. Piikalabi bikengela—bikengela bwa twêtù kutwa cikemu ku disangisha edi pa kwamba ne, “Amen,” kadi kwalukila mu mèetu, bivwa anu bîmpè bwa kwikalà apa, bwalu tudi bamanye ne Wêwè uvwa neetu. Nenku, Taatù, patudi tubuulula Dîyì edi mpindyewu apa, wakuleku neetu byumukila buludi mu Dîyì edi, bwa twamona mwa kumanya dîbà ditudi ne mwoyi. Twêtù bamanye dîbà ditudi ne mwoyi, nenku tudiku mwa kudilongolola bwa diine dîbà adi; kadi twêtù tubwelamu bu mpofo katuyi bamanye ne *ncinyi* anyi ne *mpenyi* to, dîbà adi katwena tumanya mwa kudilongolola to. Pa nanku, Taatù, tudi tulomba bwa Wêwè kutulekela tumona Bwâtù abu, ne Ciibi, cyunzulula, ne Mukenji mwikale utubiikila bwa kubwelamu. Enzaku nanku mu Dînà dya Yesu Kilisto. Amen.

¹⁶ Mu Mifundu Minsantu, ndi muswe kubalaku mwaba kampanda kaaba aka, ùdì ûsanganyiibwà mu Mukanda wa Luuka Munsantu, ku nshapita wa 24, ku...Nêmbangilè ku mvensa wa 13, nenku nêmbalè citupa cya Wôwò awu.

*Nenku, monaayi, babidi baa kudibo bavwa bafumina
diine dituku dimwedimwe adi ku musoko uvwabo*

babiikila ne Emawuse, ùvvà ùsanganyiibwà mu ntanta wa kilomètà mitwe ku dikumi ne yibidi—ne yibidi.

Nenku bavwa bayiikilangana . . . pa maalu miine avwa menzeke aa.

Ki kwenzekabi, ne, pavwabo bayiikilangana munkaci mwabo apu . . . Yesu yéyè mwine kuseemenaye pabwípi, ne kwikalaye wenda uya naabo.

Kadi mésù abo avwa mapangisha bwa kabiikadi baalwa kumumanya to.

Ki yéyè kubambila ne: Mmuyiki wa mushindu kaayi ewu unudi nwênu nuyiikilangana munkaci mwenu nunku, panudi nwenda nwenda, ne biikale babungame nunku?

Ki umwe wa kudibo, dînà dyende Keleopa, wakandamuna ne wakamwambila ne: Wéwè udi anu mwenyi mu Yelusalema, ne udi wêwè kuyi mumanye maalu ônsò aa adi menzeke . . . mu matuku aa anyi?

Ki yéyè kubambila ne: Maalu kaayi awu? Ki bôbò kumwambila ne: Àdì àtàngilà Yesu wa mu Nazaleeta, uvwa muprofeta wa bukole mu byenzedi ne mu dîyì kumpala kwa Nzambi ne kwa bantu bônsò;

Ne mùdì baakwidi banene ne balombodi abu bamufile bwa ba . . . bwa kumukoselabo cibawu cya lufu, ne bamupoopele pa nkuruse.

Kadi peetu's tuvwa ne dyeyemena ne yéyè awu nguvwa ne cya kwikalala mupikule Izaleela; ne pa kuumusha byônsò ebi, leelu ewu ndituku diisâtù kacya maalu aa enzeka.

Eyowa, ne bamwe baa ku bakaji kabidi baa munkaci mwetu mbatukemeshe, bâvvà . . . ku majambu.

. . . paapangibo kusangana mubidi wende, mbalwe, bamba ne, bôbò paabu mbamone cikeena-kumona cya banjelo, bàdì babâmbile bôbò . . . bàdì bambe ne yéyè udi ne mwoyi.

Ne bamwe baa kudibo bâvvà neetu mbaye ku majambu aku, ne mbakasangane anu muvwa bakaji abu bambe amu, kadi yéyè bôbò . . . kadi yéyè kî mbamumone to.

Ki yéyè kubambila ne: Éyì bakutakane nwê, ne beena myoyi mineeme bujitu bwa kwitabuuja (kupanga mwa kwitabuuja's) byônsò bidi baprofeta bambe:

Kabivwa bikengela bwa Kilisto kwikalaye mukenge maalu aa, ne . . . mubwele mu butumbi bwende anyi?

Nenku ubangila ku Môsà ne baprofeta bônsò, yéyè kubumvwijaye kantu ne kantu . . . mifundu yônsò pa bidi bimutangila yéyè mwine.

Mukalenge asweku asakidile mabeneshha Ende ku kubala kwa Mêyì Ende.

¹⁷ Mpindyewu ndi ngangata...bu mêmè mwa kucibiikila ne ncyena-bwalu, ndi muswe kwangata eci nunku: *Maalu àdì ènzekà... Maalu Àdì Enzekà Leelù Mmatòòkeshà Kùdì Cipròfetà*. Mpindyewu, citu misangu yônsò anu mushindu wa Nzambi...wa Nzambi utu kayi ushintuluka awu bwa kudyanjil-...kupeesha bantu Bende mushindu wa kudyanjila kumanya kumpala kwa maalu kampanda kwenzekawu.

¹⁸ Bu ne bantu baa mu matuku a Mukalenge Yesu bavwaku nanshà bakebe Nzambi ne bamanye ne civwa pabwípì menemene ne kwenzeka ncinyi, nunku kî mbakosele Yesu cibawu cya lufu to. Kadi cyàkenzà ne biikale nanku, mbwalu bivwa bikengela Mifundu kuulayi, bwalu bivwa bikengela bwa beena Yuda bafofomijiibwe. Twêtù bônsò tudi bamanye aci.

¹⁹ Nudiku nufika ku dimona ne cyôcì aci ncilayiibwe cyakabidi mu cikondo mene citudi ne mwöyi eci anyi? Cikondo cya Ekeleeziya wa Laodikiya, cikondo cya mwandamutekete cya ekeleeziya citudi ne mwöyi eci, cidi butaka, cyena dikenga, mpofo, kadi kacyi cimanye to. Bya mwomumumwe anu mwakabafomijaYe kale wawa mu kiipacila kaa kufikisha Mukenji Wende kudi basungula amu, Yêyè mmulaye bwa kwenza cintu cimwecimwe aci leelu ewu.

²⁰ Nenku bu mêmè mwa kwamba eci ne kaneemu, bwa bâna beetu bônsò baa balume ne baa bakaji mu Kilisto: Dimwe dya ku matuku adi pansi aa muntu kampanda neämbè ne: "Kî mbifundiibwe ne bivwa bikengela bwa maalu aa kwenzekawu dyambedi anyi?"

²¹ Nenku neciikale mushindu anu umweumwe wakadibi musangu awu awu ne: "Bulelala, Ndi nnwambila ne, yêyè ukaadi mumane kulwa, kadi mbenze cikaavwabo bamulongolwe."

²² PaakaMukonkabo, ne: "Mona's, bafundi's badi bamba, ne Mifundu yidi yamba ne-ne 'Eliya udi ne cya kwanji kulwa dyambedi." Ki cyakambilabo Yesu ncyôcì aci.

²³ Yêyè wakamba ne: "Yêyè ukaadi mumane kulwa, kadi kanwakamumanya to." Nwamonu anyi? Nenku pàmwăpa ki mushindu wajikabi cyakabidi.

²⁴ Mpindyewu tudi baswe kwikala bamanyishiibwe bwalu ne bwalu bwônsò bûdì bùpítakanà, bwa kumanya ne ncinyi cidi ne cya kwenzeka bwa cikondo citudi ne mwöyi eci. Nzambi mmwabanye Dîyî Dyende kûdì cikondo ne cikondo cyônsò, bûngì kampanda kûdi cikondo ne cikondo, ne butudi naabu mbwa kumanya ne cikondo kampanda kacyena mwa kutungunuka too ne mu cikondo cikwabo to. Kabyakukumbanaku to. Cileejilu, bu mûngämbì, ngeela meeji uvwa mmakeelela diloolo anyi... Ndi anu ngaakula munanukile, ku diloolo ne ku diloolo dyônsò, mu myaba kampanda, ne misangu mikwabo ndi ngamba

dîyì kampanda ndyambulula musangu mwibîdì. Meeji aanyi kí ngaa kwikalala kwamba maalu kwambulula to, kadi...ndi ngamba nunku: Bivwa bifwanyine...bifwanyine kwikalala ne dikwacisha kaayi kudi Môsâ bwa kuteeta kuyiisha mukenji wa Noa? Anyi bivwa bifwanyine kwikalala ne dikwacisha kaayi...dikwacisha kaayi kudi Yesu bwa kuteeta kuyiisha mukenji wa Môsâ? Anyi bivwa bifwanyine kwikalala ne dikwacisha kaayi kudi Martin Luther bwa kutungunuka ne mukenji wa Katolike? Bivwa bifwanyine kwikalala ne dikwacisha kaayi kudi Wesley bwa kutungunuka ne mukenji wa ba-Luthériens? Bivwa bifwanyine kwikalala ne dikwacisha kaayi kudi beena Mpenta bwa kutungunuka ne mukenji wa ba-Méthodistes? Anyi nebiikale ne dikwacisha kaayi kudi beena Mpenta bwa kwikalabo anu kacya baatungunuka pakaadi Mukaji musela ubiikidiibwa apa? Nwamonu's, twêtù tukaadi bakabwele buludi mu cikondo cya dimiinu, tukaadi mwab'ewu mu cikondo cya nshiikidilu. Mpindyewu, lutete lwa blé lwôlô kaluyi lumate mu buloba to, ludi lushaala nkaayaalu.

²⁵ Bu mudyudyanganyi awu, bu mûnkaadì mwambambe mèyì kampanda kacya mukanda awu wapatuka, pàmwàpa nukaadi bawupete muneemu mu cimenga cyenu—cyenu eci, cya mufundi wa beena Allemagne wâkafunda kamwe kaa ku tuumaalu tuvwa tutàmba kudyulangana atu awu. Yéyè awu's mmwena dyabulu. Mu bushuwa bwa bwalu kayi...Ncyéna mmupiisha ne bwalu yéyè mmumpiishe mêmè mushindu awu to; kadi, bwalu, bu mudiye mmwena dyabulu, kabivwa bikengelaku bwa mukanda awu kwikalawu mu biteekedi byenu bya mikanda to. Nenku yéyè mmwambe ne: "Nzambi wa mufwanyine kwikalala anu kacya wàsòomba kadi kwamba muvwaYe ne bucole bwa kukangula Mbû Mukunze ne kusungila cisamba Cyende, ne pashiishe Ushaala musòmbe muvungile maboko mu difu mwikale Ùmona munda mwa Bikondo bya Mîdimà abi muvwa beena Kilisto abu babasunsulula kudi nyama ya ntambwe; baamaamù abu ne nsuki milaabakaja kaabudimbwa, ne babakudika ku nkuruse baboosha; ne bânà baabo balela baa mu maboko...baamaamù bàkaavwà pa kulela abu, bavwa mwa kubapanda mafu biikale badya lupiku bwa ne mwânà awu ngwa balume anyi ngwa bakaji; kadi kushaala musòmbe ulekela biine abi byenzeka; bantu biine bavwa ne mbasadidi baa mwine Nzambi awu abu."

²⁶ Nudi numona, Mufundu ndisonsodiibwa. Kwakufikaku ku dimanya Mufundu anu ku disòmba cyanaana ne kuWubala ku mmwenenou wa teoloji, ku mmwenenou wa dilonga dya tulaasa to; kacyakacya kabituku bikumbane to.

²⁷ Mvwa nyiikilangana ne mwambi kampanda wa ba-Baptistes anu abidi adi pansi aa, ùvwa wamba ne: "Bwa twêtù katuyi anu bayiile cyena Ngelika cya cijaalame to, bwa twêtù katuyi..."

²⁸ Mêmè kwamba ne: “Mu Nsangilu wa Nicée, kumpala kwa ciine aci, s’bavva anu bakokangana pa myaku ya mu Bible ya cyena Ngelika ciine aci.” KanwadyakuMumanyaku to.

²⁹ Bikengela Bible abuuludiibwe ku disonsola. Ki cintu cimwepele ncyôci aci, dibuulula. Yesu wakambila Peetelo ne: “Pa lubwebwe elu.” Lubwebwe lwa dibuulula elu ndudi lubuulula ne Yéyè udi Nganyi. “Udi mubeneshiibwe wéwé Simona, mwâna wa Yona, kî mmusunya ne mashi bidi bikubuulwile eci to, kadi Taatù Wanyi udi mu Dyulu ngudi mukubaulwileci; pa lubwebwe elu ki pâNgìbakilà Ekeleesiya Wanyi.” Kî mpa Peetelo to, kî mpa Yéyè mwine to, kadi mpa dibuulula dya nyuma dya ne Yéyè uvwa Nganyi.

³⁰ Ne Yéyè udi Dîyi! Yone Munsantu 1: “Ku cibangidilu kwakadi Dîyi, ne Dîyi dyakadi ne Nzambi, ne Dîyi dyakadi Nzambi. Ne Dîyi dyakaâvwiibwa mubidi ne dyâkasombela munkaci mwetu.” Ébelu 13:8: “Yéyè udi umwéumwè awu makeelela, leelu, too ne kashidi.”

³¹ Bwa bwalu abu twêtu tudi ne mwoyi mu dituku didibi bikengela ne dimweneshiibwa dya Dîyi dya Nzambi difike mu cikondo cishiilangane ne cikondo cya beena Mpenta. Aci ncy a bushuwa. Vulukaayi ne, nenwikale . . . Mêmè ndi muntu udi kayi mulonge kalaasa to; kadi kwêna mwa kutamba bufuki bukole to, bwalu Nzambi udi ukwacila mudimu mu ntungunukilu wa bufuki. Bidi anu, bu mûngâmbì ne, dîbà didi dipatuka ne dibwela; ne diikale diya dituku dijima, byenze bu cikondo cya kalaasa; ne diikale difwa ku dilolo, bwa kupatuka cyakabidi mu dinda dîdì dilondà. Mici yitu yipwekesha mâyì àayì mu buloba mu cikondo cya muvù wa mashika, akabwela mu miji, ne ààlukila mu muvù wa bintu bitoloka.

³² Monaayi, Yéyè wakaMufwanyikija ne lutete lwa blé, Mukaji musela, kabingila kavwa kenza ne bivwa bikengela bwa Nzambi kulekelaye cyôci aci ciya mushindu awu. Ekeleesiya mulenga, mulelela, mushuwashuwale wâkajaadikiibwa mu Dituku dya Mpenta awu, wakaya anu wenda ukola wenda ukola kubangila anu ku Dituku dya Mpenta aku, kushaalaye ekeleesiya munene, bivwa bikengela bwa yéyè kupona ne kubwela mu buloba mu Cikondo cya Mîdimà ne kujiikiibwa anu bu mûtù dimiinu dyônsò dijiikiibwa amu. Bivwa bikengela kufwaye bwa kupatukaye cyakabidi mu Dilongolola. Wakapatuka mu muntu wa Dilongolola kampanda, Martin Luther. Nenku kuumukila apu, anu mûtù cikolakola cya blé cibânda amu. Cintu cya kumpala cidì cipâtukà, kudi tubeji tukese tubidi, pashiishe cidi citungunuka ne kwenda kusakidila tukwabo tubeji. Kujuukaku Martin Luther, ne pashiishe Zwingli, anu nanku, Calvin, ne pavwabo benda bayá kumpala apu.

³³ Ndekeelu wa byônsò cikabwela mu mwepu. Mpindyewu, aci civwa n'John Wesley mu cikondo cya Wesley. Civwa ne bungungu bwa bilòngò bupone.

³⁴ Kuumukila apu ki kulwaku cikondo cya Mpenta, cifwanangane anu menemene, anu bu lutete lwa bushuwa lwa blé alu menemene bu wêwè mwa kutangila cikolakola aci. Kadi wêwè mwangate mwine blé awu mumuuvule, kamwenaku lutete nansha lumwe munda amu to nansha lwa kânà, cidi anu ncizubu pa cizubu mu *mmwenekelu* wa lutete. Kadi nciteekiibwe mwaba awu mu kiipacila kampanda, bwa kubwikila lutete too ne... Bu dîbà mwa kululenga mushindu *ewu*, ndifwanyine kulushipa.

³⁵ Bikengela lusaaale mwômò amu too ne ku cikondo kampanda, nenku Mwoyi wônsò awu udi wumuka mu cizubu (mukaavwaWu muumuke mu cikolakola, muumuke mu bungungu bwa bilòngò amu), wumuka mu cizubu ukabwela mu blé, ne wangata cyakabidi mmwenekelu anu uvwawu nende mwinshi mu buloba awu.

³⁶ Mpindyewu, twêtù bônsò tudi bamanye ne dîbà dyônsò didi mukenji kampanda ufidiibwa, munda mwa bidimu bisatu badi benza bulongolodi. Padibo benza aci, cidi ciwushipa anu mwaba awu; cyakenza nanku mu matuku a Luther, bwalu, cyakenza nanku mu matuku a Wesley, ne cyakenza nanku mu matuku a Alexandre Campbell, ne bakwabo bônsò, ne cyakenza nanku mu matuku a Mpenta. Mmwômò menemene! Nwamonu anyi? Nudi nukafika kaaba kampanda kaa ne, muntu ne muntu ushaala muumakane, ne upambuka, ne kabaciyi mwa kwakidila dibuulula dipyadipyá to. Baamanyi kujaalamá; kadi's ki bôbô abu, s'ki bôbô bàwfawà abu. Kadi Mwoyi udi upicila anu buludi mwômò amu, ne udi utungunuka too ne ku dikenza dya blé. Nenku padi blé ulwa, Mwoyi udi mwenze lwendo lwa dipicila mu blé awu awu, dibiika dya ku lufu adi, udi upatula cintu cyônsò mu kaabujima; eyowa's, ùcìbàndisha bwa Dyambwibwa.

³⁷ Mpindyewu, vulukaayi ne, Mukenji ewu wakabanga ku ntwadijilu ne dyondopa dya kudi Nzambi, wenza bishima. Mpindyewu, bu Nzambi mulekele aci cyenzekela mu ekeleeziya wetu wa patupu ewu, anu mutukaadi babipetepete emu, dîbà adi aci kacivwa Nzambi to. Nzambi katu ne bwalu bwa kudileeja to; Yéyè katu—Yéyè katu ne bwalu bwa kwenza bintu ebi, bwa kutucyonkomoja, mutudi twêtù beena Amerike aba biibidile naabi emu to (dicyonkomojangana), kadi Yéyè utu ubyenzo mbwa kukoka ntema ya bantu, bwa ne Yéyè udi munkaci mwa kudilongolola bwa kwenza cintu kampanda.

³⁸ Anji Mutangilaayi Yéyè mwine paakalwaYe. "Muprofeta mulenga wa dikema wa citende awu, laabi, muprofeta wa mu Ngalela." Mona's, mudimu Wende wa bwambi uvwa mulenga wa dikema, bavwa baMwakidila mu ekeleeziya ne ekeleeziya yônsò.

³⁹ Kadi dîngà dituku Wàkasòmbela pansi, kwamba ne: “Mêmè ne Taatù Wanyi tudi Umwe.”

⁴⁰ “Kaa, ekelekele!” Aci’s civwa cya cyanaana. “Tümükilaayi apa ne muntu wa mushindu awu!”

⁴¹ “Nwénù kanuyi badye munyiinyi wa Mwânà wa muntu, ne kanuyi banwe Mashi Ende to, kanwena ne Mwoyi munda mwenu amu to.”

⁴² “Mona’s, muntu’s mmukishi munwanganyi wa mash! Umukaayi kudi muntu wa mushindu awu!” Nwamonu anyi?

⁴³ Nwamonu’s, kuvwa cintu kampanda civwa ne cya kulonda cimanyinu aci. Nwamonu’s, cintu kampanda cìvwa cìlonda.

⁴⁴ Cizubu ncivwa cicilame, kadi mpindyewu cizubu cikaadi cidikoka ciya kule; cidi ne cya kudikoka. Nenku vulukaayi ne, bidimu makumi abidi bikaadi bipite kadi kakuyiku mangumba makwabo mapatukilemu to, ne dyôdì diine kadyakupatukamu to. Tukaadi kundekeelu kwa mangumba, blé ukaadi mumane kwangata mbungakeenu. Kadi budi naabu blé mpindyewu, kanwena mwa... budiye naabu mbwa kushala mwanyika mu Bwikadi bwa Mwânà, bwa kubobaye, kumpala kwa katumba kaa dinowa naaku kumupoolaku.

⁴⁵ Mpindyewu, maalu atudi tumona ènzekaa, kakuyi mpatà to mmaleejibwe mu Bible, a cikondo ne cikondo cyônsò. Twêtù tudi tudyelela meeji ne tudi mu cincyoñmpancyòmpa, kabyena nanku to, kantu ne kantu kadi kenda kaya anu menemene bilondeshile Dîyì dya Nzambi.

⁴⁶ Mpindyewu, Bible mmukanda mushiilangane ne mukanda mukwabo munsantu kana wônsò ewu. Kakwenaku mukanda bu Bible to, bwalu Bible n’Nzambi mu mmwenekelu wa Dîyì. Nwamonu anyi? Ùdi...Dîyì mmeeji meela patooke. Dyela dya meeji dya Nzambi ndidi diDyélè patooke, Mêyì Ende kupicila kudi baprofeta; ne bôbô mbaakafunda Bible, udi mu mmwenekelu wa Dîyi ewu. Ne Yesu wakaDibiikila ne, “n’Dimiinu.” Ne dimiinu kana dyônsò edi nedivulangana bilondeshile mushindu wadi piikaladi mu ngiikadilu mujaalame, mu cyuyùyà cijaalame. Mpindyewu, Mukanda ewu wa...ùdi... Mukanda wa ciprofeta ewu, Ùdi—Ùdi udyanjila kwamba maalu a matuku àcìvwawwà. Mpindyewu, Mukanda ewu udi munda mwawu ne dibuuludiibwa mu kaabujima dya Yesu Kilisto. Kwêna uKusakidila anyi uKuumushila to, ne dibuulula dyônsò didi ne cya kuvwila anu ku Wôwò. Nwamonu’s, cidi ne cya kwikala Dîyì.

⁴⁷ Pa nanku bantu batu bamba ne: “Ndi mupete dibuulula.” Eyowa, tudi bamanye ne Joseph Smith ne bààbûngì baakapeta mabuulula ne bikwabo, kadi bivwa bibengangane ne Dîyì.

⁴⁸ Bidi bikengela cilwe bilondeshile Dîyì piikalaci cifumina kudi Nzambi, bwalu bùdici naabu mbwa kushindika

anyi kujaadika Bwikadi bwa Nzambi. Nenku Yéyè uvwa mudyanjile kumanya bintu byônsò ebi, biikàle... Ku didyanjila-kumanya Dyende Yéyè wakateeka, wakadyanjila kuteeka (cidi cibiikidibwa mu Bible ne, “cidyanjila-kulongolola”) cikondo ne cikondo cyônsò pa kaaba kaaci, ne muntu ne muntu yônsò pa kaaba kende, ne musanjeela ne musanjeela yônsò pa kaaba kende. Yéyè udi Nzambi, dyabulu kêna mwa kuMukutakaja mu kantu nansha kamwe to. Ne Yéyè udi Nzambi, ne Yéyè mmuteeke bwa kantu ne kantu kônsò kwenzekaku, ne kadi kenzeka menemene anu mu njila wa Dîyì Dyende.

⁴⁹ Pa nanku bu twêtù mwa kumona, ku Dîyì Dyende, ne mmu cikondo kaayi ne mmu dîbà kaayi mutudi ne mwoyi, nenukimone anu mwaba ewu mu Bible, bwa cikondo eci, citudi twêtù ne cya... cidi ne cya kwenzeka pa dîbà edi.

⁵⁰ Mpindyewu, mi—mikwabo mikanda yôyì, tudi tusangana mikanda bûngì cyanaana yidibo babiikila ne “mikanda minsantu” ayi, ne bikwabo. Kadi mêmè nkaadiku mubale Koran ne mikwabo yâbûngì. Kadi, nudi numona’s, yabo—yabo mikanda minsantu miine ayi yidi anu mmeyì malongolola a nsòmbelu wa bukalanga, a maalu mîmpè a mu nsòmbelu, anyi a teoloji.

⁵¹ Kadi ewu Mukanda udi m’Muprefeta, Wôwò mmushilangane ne mukanda mukwabo kana wônsò ewu. Bible n’Dîyì dya Nzambi diikale didyanjila kwamba maalu a matuku àcìvwawwà. Ùdi udyanjila kwamba bwalu mmudyanjila kudimwiibwa.

⁵² Nzambi Yéyè mutume cintu kampanda, Ùdi wamba ne Ùtu mulaye mu Bible ne Yéyè kaakwenza cintu nansha cimwe pa buloba Kayi mucibuulwile dyambedi basadidi Bende baprofeta to. Awu ng’Amosa 3.7. Yéyè... ne Nzambi kêna mwa kushimaku to. Yéyè udi uCibuulula, ki citu mushindu Wende wa kucyenza munda mwa bikondo byônsò ngwôwô awu. Kacya Yéyè katuku mwanji kupangila bwa kucyenza to.

⁵³ Mpindyewu, tudi balayiibwe, mu matuku a ndekeelu ne, cyôci eci necyalujuludiibwe. Kakwakwikala ekeleesiya nansha umwe—nansha umwe, dingumba nansha dimwe, dya ba-Méthodistes, ba-Baptistes, ba-Presbytériens, beena Mpenta, kabaakwikalaku mwa kwangata (mu ngiikadilu yabo ya cyena leelu eyi) ewu ekeleesiya bwa kumuvwija Mukaji musela to. Kabeena mwa kucyenzaku to, badi bapangila. Mbatambe kukwatangana mu mabodi ewu ne ewu, ne maalu a pa buloba akaadi madifindemu, ne bikwabo, ne—ne bakaadi badifwile mu mipi yabo. Ne pa nanku Nzambi’s mmumanye ciine aci.

⁵⁴ Nenku bwa kubuulula Dîyì edi, umwe udi wamba ne: “Ee, mêmè ndi ne cikampanda. Nenku Nzambi abeneshiibwe, Cidi mushindu kansanga.” Ki mushindu awu menemene uvwabi paakalwa Yesu musangu wa kumpala; muntu ne muntu udi ne dilongesha, muntu ne muntu udi ne cikampanda.

Nebikengele bwa kwikalaci cintu kampanda citutumina kudi Nzambi. Ne Nzambi ngudi mucilaye. Né mushindu umwepele wenzaYe, ngwa—ngwa kulama citembelu Cyende cimwecimwe aci. Yéyè mmulaye bwa kututumina, mu matuku a ndekeelu aa, bilondeshile Maalaki 4, muprefeta pa buloba, "Wíkala mwa kukudimuna myoyi ya bantu ne kuyaaluja, myoyi ya bâna ne kuyaaluja cyakabidi kudi baataatù bapostolo baa ku cibangidilu." Yéyè ngudi mulaye aci mu Dîyì Dyende. Luuka 17 ne mu myaba mikwabo yâbûngì mudiYe mucilaye, cidiYe... ciikalaYe mwa kwenza mu matuku a ndekeelu aa bwa kufikisha cintu eci ku Dîyi kampanda dishindika.

⁵⁵ Nwamonu's, muntu udi mwa kwamba cintu kampanda, kadi Nzambi Yéyè kayi muumvwije Dîyì adi to... Nwamonu's, mpindyewu, twêtù tudi ne dyumvwija dyetu twêtù biine, biikale twamba ne Didi dyamba *cikampanda*. Kadi ewu nunku, Méthodiste ewu, wamba *cikansanga*, Baptiste ewu wamba *cikankenga*, mwena Mpenta pende mwambe *cikansanga*, Unitaire wamba *cikankenga*, Binitaire wamba *cikansanga*. Nenku, kaa, ekelekele, kadi's ki bwalu mbwôbù abu. Kadi Nzambi katu dijinga ne muumvwiji kampanda to, Yéyè m'Mudyumvwijidi wa Yéyè mwine. Ùdi umvwija Dîyì Dyende Yéyè mwine pa kuDishindika mu cikondo cîdì ciDilongolwela, cikondo cîdìDi difidila.

⁵⁶ Twêtù katwena ne mwoyi mu cikondo cya beena Mpenta to, tudi ne mwoyi mu cikondo cya cyanaana. Nwamonu's, katwena ne mwoyi mu cikondo cya ba-Méthodistes to, tudi ne mwoyi mu cikondo cya cyanaana. Tukaadi ne mwoyi mu mwaba mutumbuke ewu ku cikondo cya Mukaji musela, dibiikila dya Ekeleesiya bwa kupatuka ne diMusangisha bwa Dyambwibwa. Ki cikondo citudi twêtù ne mwoyi mpindyewu ncyôci aci. Bwa ku dyanyi paanyi dimona dya meeji matooke aci ki Bulelala anu bwetu bwa menemene ebu mbwôbù abu.

⁵⁷ Nenku Mukanda ewu mmukanda wa ciprofeta. Beena kwitabuuja baaWu mbabatumine dîyì bwa kuWutwa mushinga ne kwikalala kuWubala, ne kwitabuuja MwenaWu, bwalu Dîyì dyônsò didi difundamu didi ne cya kwenzekwa. Byônsò bitù bilayiibwe bidi ne cya kwenzekwa, bwalu Ùdi n'Yesu Kilisto mu cikondo ne cikondo cyônsò. Umwèumwè awu makeelela, uvwa n'Yesu Kilisto, uvwa mu Noa; ùvwa n'Yesu Kilisto mu Môsà, ùvwa n'Yesu Kilisto mu Davidi, ùvwa n'Yesu Kilisto mu Yozefu; n'Yesu Kilisto, umwèumwè awu makeelela, leelu, too ne kashidi. Ne n'Yesu Kilisto munkaci mwa bantu Bende leelu ewu, wenza bintu byakalayaYe ne Neénzè mu cikondo eci abi. N'Yesu Kilisto.

⁵⁸ Kadi ekeleesiya ukaadi mushaale muumakane be, mwikalale usanganyiibwa kule kwa dikema, anu mwâmbì mwaneetu kaaba aka emu. Ne—ne ekeleesiya yetu yikaadi yenda yishaala mushindu umweumwe awu, mu mushindu wa ne bikaadi

bikengela bwa twêtù kupeta cintu kampanda cya citunyukusha bwa twêtù kwalukila ku Dìyì. Mmuni mutudi tumanya ne necyéñzè nanku awu? Bidi bikengela bwa cilwe bilondeshile ndongamu wa Nzambi Yéyè mwine. Kacyena mwa kulwila kudi mwena kwitabuuja yônsò naka to, kacyakulwila kudi mwena kantu-ku-byanza kampanda to, kacyena mwa kulwila kudi maekeleeziya to. Nzambi mmwadije ndongamu Wende Yéyè.

⁵⁹ Mvwa mwakule mwab'ewu mu Shreveport emu dituku adi, ku tudyomba twa ditunga ngaakula ne ditunga dijima, ne, *Kuteeta Bwà Kwenzela Nzambi Mudimu Kaciyi Diswa Dyà Nzambi To*. Davidi wakateeta kwaluja musheete wa cipungidi wa Nzambi mu nzubu mwende. Üvwa mfumu mwela maanyi. Mona's, yéyè—yéyè wakakonka baaminympala bende—bende, baakapiteena bende baa binunu, ne baa binunu dikumi, ne bikwabo. Ki kwambabo bônsò ne: "Aci n'Dìyì dya Mukalenge." Ki kukonkabo mwakwidi: "Aci's ncilenga cya dikema." Ki bôbô bônsò kulwabo basonsodiibwe, mu mushindu wa beela mbila, benza cyenzedi cyônsò cya butendeleedi cìvwàku aci. Kadi paabi kakuyi mpatà to bivwa bibengangane ne diswa dya Nzambi, bwalu kuvwa muprefeta mu ditunga amu dînà dyende Natana kadi kabayiku nansha bamukonke bwa bwalu abu to. Nwamonu anyi? Nenku tudi basangane ne kacyakakumbanaku to nansha muvwabo ne meeji matooke, bateeta bwa kwenzela Nzambi mudimu amu.

⁶⁰ Nenku nudi mwa kwikala anu ne meeji matooke etu a menemene aa; kadi, patudi katuyi bamanye citudi twenza to, nudi nulwangana ne lupeepele. Alukilaayi mu Dìyì dya Nzambi nuditeeke mu njila, ne pashiishe nwâsè lwendo nuye; pa dîbà adi nudi numanya. Bu—bu mudi musalaayi, kî mmumanyé cya dyenza to padiye kayi mupete mèyi mamutumina bwa kucyenzaye. Tudi ne cya kwikala basalaayi beena Kilisto, biikale tupetela mèyi matutumina mu Bible bwa dîbà mpindyewu; kaciyi dibundulangana dya makeelela, dibundulangana dya dituku dìdì didyänjile to, kadi dibundulangana dya leelu (njila mwine utudi ne cya kuiyila). Kujandula ne mmu dîbà kaayi mutudi ne mwoyi.

⁶¹ Maalu àdì ènzekà leelu aa adi atupicila ku luseke lukasa-lukasa lwa menemene, nenku dîngà dituku twadyakujandula ne nebiikale batushiye paanyima katuyi ne kantu nansha kamwe to, ne batùbùcikile, batwibwe cimanyinu cya nyama wa lwonji kumpala kwa twêtù kucimanya.

⁶² Mpindyewu, ne lutuulu lwônsò bikengela twindile cyôci eci, bwalu biprefeta bitû bilayiibwe abi, cyônsò cya ku byôbì abi cidi ne cya kuula mu cikondo cyaci. Bwalu Cidi cidyanjila kutwambila ne, MwenaCi ukaadiku mwenzenze cyôci eci kumpala kwônsò eku, nenku tudi bindile bwa kuMumona ucyenza cyakabidi. Ncikondo kaayipu citudi ne mwoyi eci's we! Cintu bu mudi—kabala-matuku; nutu nutangila ku kabala-

matuku bwa kujandula ne mmu dituku kaayi dya cidimu dinudi ne mwoyi, ne nudi nutangila mu Bible wa Nzambi bwa kumona ne mmu cikondo kaayi citudi ne mwoyi. Twêtù katwena ne mwoyi mu cikondo cya ba-Méthodistes, cikondo cya ba-Baptistes to. Tudi ne mwoyi mu cikondo cya Mukaji musela, dibiikila, dyalujiibwa kudi Nzambi mu kajila kavwaYe mulaye bwa kwalukidilamu. Yéyè ngwâkalaya bwa kucyenza.

⁶³ Kadi bu muvvabi mu cikondo ne cikondo cyônsò, bantu batu balekele bantu beelaKu dyumvwija dyabo bôbô ku teoloji, ne kabayi baswe kwitabuuja dishindika dyaCi dya Bunzambi dya kudi Nzambi to. Aci's ki dyumvwija dya Nzambi. Kî ncîndì mêmè ngamba, kî ncidi mutu kampanda mukwabo wamba to; kadi cidi Nzambi mulaye; ne cidi Nzambi wenza, cidi cijaadika ne Nzambi ngudi wenza dyumvwija Dyende Yéyè mwine dya Dîyì Dyende.

⁶⁴ Baakanwambila nwêñù beena Mpenta aba, kukaadi bidimu makumi anaayi ne bitaanu, anyi makumi ataanu, baamamwêñù ne baatatwêñù, bâvwa beena Mpenta bashùwashùwâlè, baakapatuka mu bulongolodi ne kwelabo cintakanyi aci mulawu ne kupatukamu: Pashiishe anu mudi mbwa walukila ku bilushi byende, nukaadi bamwâlûkile cyakabidi, benze cintu cimwecimwe cyâkashipà ekeleesiya awu aci, nwêñù kushipa wenu nwêñù biine ku cintu cimwecimwe aci. Ncyêna cilumbu ne bantu bàdimu abu to, ncyêna naaci cilumbu to, ndongolwelu ya cintakanyi aci nyidi yicyenza.

⁶⁵ Kwanyi mêmè, ndi...ngaalukila kwanyi...Ncitu nyiisha eci mu disangisha dya mukwabo mutu to. Nênyiishè *Cikòkà Cyà Nyòka*, nenku nwaciteelejaayi panwikala nwangata mikaba ya mêtì.

⁶⁶ Nenku, monaayi, bôbô baakapanga kumona dishindika dya biprofeta bya Dîyì dya Nzambi biikale byula. Bu baakwidu abu...Bavwa badimânyikile anu menemene mushindu uvwa Maasiya ne cya kulwa, bavwa bôbô bamanye cìvwà ne cya kwenzeka. Bafaal...Bafaalesa bavwa ne wabo mmwenenu, Basadoka, beena Heloode, ne bônsò, bavwa ne yabo mmwenenu. Kadi Yéyè kaakalwa...Wakalwa bibengangane ne yônsò wa ku yôyì ayi, kadi bikumbanangane menemene anu ne Dîyì. Yesu wakamba cintu cimwecimwe aci mwab'ewu: "Bu ne nuvwa baMmanye Mêmè, nunku nudi bamanye dituku Dyanyi. Bu ne nuvwa bamanye, nunku nudi...Nudi nwamba ne: 'Ee, Môsà! Twêtù tudi ne Môsà.'" Yéyè ne: "Mona's, bu nwêñù nwitatbuuja Môsà, s'nuvwa mwa kuNgitabuuja Mêmè; bwalu yéyè ngwâkafunda bwa bwalu Bwanyi."

⁶⁷ Kadi, nudi numona's, pavwa Nzambi munkaci mwa kushindika anu menemene civwaYe mulaye, baakacyangata bôbô mu mushindu kampanda wa mudyundisha uvwa Yesu ne cya kulwa, nenku...Ndi njinga kwamba Maasiya. Bivwa

bikengela bwa Maasiya kulwaye buludi ku kasumbu kaabo bôbò patupu Kavwa Maasiya to. Ee, mushindu awu ki udibi, pamwe ne cyôcì aci's, leelu ewu: "Nwêñù kanuyi numwena mu binete byanyi mêmè to, kanwena nutangilaku to nansha kakese." Nwamonu's, ne pa nanku aci's—aci's cidi anu mushindu udici—udici's. Twêtù . . . Kî bulelela mbwôbò abu. Tudi tuumvwa bitutacisha patudi twela meeji awu, kadi's m'Bulelela bwa kabuyi dyela mpatà.

⁶⁸ Mu Ebelu 1.1, Nzambi mu bikondo bya kale wakafunda Bible mu mushindu Wende Yéyè mwine musungula. Kacya Yéyè kaakaMufundishaku kudi beena teoloji to, anyi Yéyè katuku umvwijila kudi beena teoloji to. Kacya kakutuktu kwanzi kwikalala cikondo nansha cimwe cikaadiku—cikaadiku beena teoloji bapete dyumvwija dya Dîyì dya Nzambi to. Dyumvwija ditu dilwa anu kudi muprefeta nkaayende. Nenku mushindu umwepele utwikalaku mwa kupatuka mu cimvundu eci ngwa ne Nzambi atutumine muprefeta awu, anu menemene, mushindu umwepele wikalaci mwa kwenjibwa. Cyôcì aci cikaadiku ciitabuujiwbwe, bacindile, ne—ne dyula dyaci.

⁶⁹ Nwamonu's, Yéyè kaakafundiibwaku kudi muntu to, kadi Wakafundiibwa kudi Nzambi. Kî mmukanda wa muntu to, Kî mmukanda wa beena teoloji to. M'Mukanda wa Nzambi, bwalu m'Mukanda wa ciprofeta mufunda kudi baprofeta ne muumvwija kudi baprofeta. Bible mmwambe ne: "Dîyì dya Mukalenge didi dilwa kudi baprofeta." Mmwômò!

⁷⁰ Mushindu mwine udibi bifwanyikijiwbwe bilenga bya dikema, anyi, bileejijiwbwe bitooke tòò paakalwa Yesu pa buloba, ne Yone nguvwa muprefeta wa dituku adi, ne yéyè—yéyè uvwa munkaci mwa kwamba ciprofeta. Kwambabo ne: "Kaa, udi muswe kwamba ne Nzambi neapandulule bisumbu byetu binene ebi ne bintu byônsò ebi anyi? Ne nekulwe cikondo, cììkalà yetu—yetu ntempelu eyi kabaciyi bakuukwilamu kabidi anyi?"

⁷¹ Yéyè kwamba ne kuvwa kulwa cikondo civwa Nzambi mwa kufila mulambu wa Mwânà wa mukooko wa Nzambi, Muntu. Ki kwambaye ne—ne yéyè uvwa mwa kuMumanya pavwaYe mwa kulwa. Ki yéyè kwamba . . . Yéyè uvwa mutwishiibwe menemene bwa mukenji wende, mu mushindu wa wamba ne: "Yéyè awu mmwimane munkaci mwenu patudi twakulangana neenu apa kadi nwêñù kanwena bacimanye to." Yéyè awu's mmwimane munkaci mwenu kadi nwêñù kanuyi bacimanye to.

⁷² Nenku dituku dikwabo paakapatuka Yesu, Yone mmwenze anu ubanduluka nunku e kumonaye cimanyinu aci kumutu Kwende, kwambaye ne: "Monaayi Mwânà wa mukooko wa Nzambi udi uumusha mpekaatu ya baa pa buloba." Pa kasunsa kamwekamwe aku Yesu wakamanya ne Wakashindikiibwa kumpala kwa bantu. Mpindyewu, Yéyè uvwa Dîyì, tudiku bafwanyine kwela aci mpatà anyi? Bible ngudi mwambe ne

Yéyè uvwa Dîyì: "Ku cibangidilu kwakadi Dîyì, ne Dîyì dyakadi ne Nzambi, ne Dîyì dyakadi Nzambi. Ne Dîyì dyakavwijiibwa mubidi ne dyàkasòmbela munkaci mwetu." Nenku's ki Yéyè ewu, kudi... S'ki Dîyì edi pa buloba (monaayi! Anu menemene's!) dipatuka dikabwela buludi mu mâyi kudi muprofeta.

⁷³ Nyęa bushuwa, Dîyì dilwalwa misangu yônsò anu kudi muprofeta Wende. Pa nanku katwena mwa kutekemenaku ne Didi mwa kulwa kudi beena teoloji to. Katwena mwa kutekemenaku ne Didi mwa kulwa kudi mangumba to. Bidi bikengela bwa kulwilaDi mu kajila kaa Nzambi kadiYe mudyanjile kutwambila, ne ki mushindu umwepele wavwilaDi. NeDikinyiibwe, nedidyombodiibwe, nedibengiibwe. PaalwaDi cya bushuwa, neDiimanshiibwe pambelu ku luseke, ne bikwabo byônsò, kadi Nzambi neàcyénzè nansha bishi. Dyakabengiibwa mu Yesu Kilisto, Dyakabengiibwa mu Yone, Dyakabengiibwa paakalwadi kudi Yelemiya, Dyakabengiibwa paakalwadi kudi Môsà. Bitu misangu yônsò anu mushindu awu. Kadi Nzambi udi wenda uya anu kumpala mu mushindu udiYe mulaye ne Yéyè neàcyénzè awu. Eyowa's, mukalenge, Yéyè kacya katuku upangila kucyenza mushindu umweumwe awu to.

⁷⁴ Muntu wâkamònà cikeena-kumona aci anyi wâkumvwa dîyì Dyende adi awu, kaakaDyumvwaku mu kaabujima to. Misangu yàbûngì yéyè mwine kavwa umanya to, bwalu yéyè udi anu cyamu cya mudimu cya Nzambi. Mmeeji a Nzambi meeleta patooke ku mishiku ya muntu; meeji, mu bushuwa bwa bwalu, ndîyì dyamba patooke. Nzambi ngudi wenza Yéyè mwine disungula Dyende ku disungula Dyende—Dyende didyanjila kulongolola. Ùkaadi mudyénzènzu mu cikondo ne cikondo cyônsò, Yéyè ukaavwa muteeketeke muntu bwa cikondo cyônsò. Byenze bu Môsà, pakaavwabi bikengela bwa kuujaye civwaYe mwambile Abraham. Môsà wakalediibwa mwânà mwakanyine, kavwa pende mwa kudipangisha kwikala mushindu awu to. Wakalediibwa mushindu awu bwalu wakalediibwa mmu kiipacila aku.

⁷⁵ Nenku tudi tusangana ne Nzambi utu wenza cyôcì aci mu cikondo cyônsò. Nzambi utu wenza disungula Dyende Yéyè mwine ku disungula didyanjila kulongolola Dyende Yéyè mwine, usungula baprofeta Bende ne bikwabo bwa cikondo aci; ulongolola—ulongolola ngiikadilu wende, ngiikadilu wa mwine muntu awu, mushindu wa nyiishilu wa muntu awu bwa... pa mapà ende ne byônsò bidiye wenza, bidi bikumbanangana ne kadyombo kaa diine dituku adi. Nzambi ngudi mufuke muntu awu ne mumutume. Kadi mu meeji Ende Yéyè mwine, anu mùmvwà muysiishepu makeelela dilolo, twêtù tudi mutoloku wa ndelanganyi ya Nzambi. Yéyè uvwa mumanye ne muntu awu neikaleku mu ciine cikondo aci, kumpala mene kwa nansha kapwishipwishi, anyi bukénkè kampanda, anyi nî ncinyi cikwabo kwikalaci pa buloba.

⁷⁶ Bwalu wêwè udi mutoloku wa tatwèbè, ne uvwa munda mwa tatwèbè, kadi tatwèbè kavwa neebe mu bwobumwe to bwalu yéyè... Wêwè uvwamu, kadi kuvwa mucimanye to ne yéyè kavwa mucimanye to, kadi udi mumweneshiibwe bwa wamona mwa... bwa yéyè wamona mwa kubwela neebe mu bwobumwe. Kadi paudi ulediibwa cyakabidi, udi ulediibwa ku Mwoyi wa Cyendeleele. Nenku aci ki mushindu umwepele wa Mwoyi wa Cyendeleele, ne cyôcì aci ki Mwoyi wa Nzambi. *Zoe*, mwâkù wa mu cyena Ngelika udi *Zoe*, mushindu umwepele wa Mwoyi wa Cyendeleele.

⁷⁷ Nenku pawikala mwânà wa balume wa Nzambi anyi mwânà wa bakaji wa Nzambi, uvwa munda mwa Nzambi dîbà dyônsò edi. Kadi Yéyè uvwa mumanye ne mpa dibuula kaayi dya buloba ne mmu cikondo kaayi mûvwà mwa kukunyiibwa. Pa nanku mpindyewu udi mwenjiibwe cifukiiibwa, mwânà wa balume wa Nzambi, mumweneshiibwe mwânà wa balume anyi mwânà wa bakaji wa Nzambi bwa kukumanangana ne kadyombo kaa dîbà edi bwa kushindika Nzambi mulelela ne udi mwoyi wa diine dîbà edi, Mukenji ùdì ûpâtukà mu cikondo eci. Ncya bushuwa! Wêwè uvwa mwenjiibwe kuntwaku kumpala kwa difuka dya dyulu ne buloba. Piikalabi ne kabivwa... Piikalabi ne kuvwa musungudiibwe mushindu awu to, nansha wêwè muteete bishi bwa kuCitentula, wêwè kwadyakwangulaku mpasu to. Mmuny mûdì mwa kupetela mashi mu tuunépà padimu kamuyi mashi?

⁷⁸ Ki bwa cinyi ntu nteeta kwamba bwa bantu batu beela meeji ne twêtù tuvwa... tudi twelela bakaji mbila pa bidi bitangila nsuki mphì, ne bantu bangambila bwa dyamba dya miine maalu awu ne: "Wêwè's neunyangakaje mudimu webe wa bwambi." Nyangakaja mudimu wa bwambi ukaavwa Nzambi Yéyè mwine muteeke? Abu buyiile anu kule! Kadi padi bantu bateeje Dîyì dya Nzambi... Padi mwânà wimiciibwa mu difu dya mamwèndè, padi kabulu kaa mashi kamwepele aku kabwelamu, kabulu kakwabo kaa mashi kadi kalwa kadisakidila pamutu paa kôkò aku. Kî nkabulu kaa mashi kamwepele kaa muntu, kàdì kàlondà kiikàle kaa mbwa, ne kàdì kàlondà kiikàle kaa mpuusu, ne kàdì kàlondà kiikàle kaa cintu kampanda cikwabo to; kakuyi mpatà to, mmuntu, buludi. Ne padi muntu ulediibwa ku Nyuma wa Nzambi, kêna wela cintu kampanda mu nsòmbelu wende amu to, Cidi n'Dîyì dya Nzambi didi kadiyi disambakaja dishindika bwa dîbà adi. Yéyè udi wangata Dîyì dya Nzambi mu kaabujima, kayi welaMu twitabaayi, anyi cintu cikwabo nansha cimwe to. N'Dîyì dya Nzambi dikezu ke kadiyi disambakaja to, dimweneshiibwe munkaci mwetu.

⁷⁹ Tangilaayi mu Bible, nudi numona ne mpenyi, mmu cikondo kaayi citudi ne mwoyi pa dîbà adi, panudi numona bintu binene ebi munkaci mwa kumweneshiibwa. Padi Nzambi mulaye bwa kucyenza, Yéyè utu misangu yônsò anu ucyenza. Kundekelu kwa cikondo cyônsò padi ekeleeziya ufika pa mwaba wa cibèndà,

ne ukudimuka uumuka ku Dîyì walukila ku mpekaatu ne ngiikadilu ya maalu a pa buloba . . . Ngiikadilu ya maalu a pa buloba mmpekaatu. Bible mmwambe ne: “Wêwè munange maalu a pa buloba anyi bintu bya pa buloba, dinanga dya Nzambi kadyena nansha munda mwebe to.”

⁸⁰ Pâmvwà ngaakula makeelela dilolo, mvwa ngaakula pa—pa mulambu wàkafidiibwà, Mwânà wa mukooko. Biwwa bikengela bwa kwikalabi matuku mwandamutekete, cileeja bikondo mwandamutekete bya ekeleesiya. Kabivwa bikengela bwa kusanganyiibwaku lwevenya nansha lukese munkaci mwa bantu to, lwevenya nansha lukese munda mwa matuku mwandamutekete. Mbwena kwamba ne kakwena cintu nansha cimwe cisambakajaMu to, KaCyena ne lwevenya to, ku musangu ne ku musangu. Ne twêtù katwena baswe twitabaayi, maalwevenya ne bintu bisambakaja ku twêtù to. Katwena baswe maalu a pa buloba masambakaja ku twêtù to. Bidi bikengela ciikale anu Dyâmpà dya Nzambi kadiyi dyela lwevenya to, Dîyì dya Nzambi, Dîyì dya Nzambi kadiyi disambakaja to, bwalu: “Muntu neikale ne mwoyi ku Dîyì dyônsò didi dipatuka mukana mwa Nzambi.”

⁸¹ Ndongolwelu yetu ya cyena mangumba eyi, ne tuumaalu tudi tutapululangana etu ne bikwabo, ki bidi byelete lwevenya mu twêtù, ne *bikampanda* ne *bikansanga* ne maalu a pa buloba ne myôdelè ya mwadilu. Nenku, kaa, bikaadi mu mushindu wa ne cikaadi anu Hollywood myaba yônsò’s. Kumanakumana byôbì nebikafike anu mùkaadi Angleterre amu, dibiikila dya ku dyoshelu nedibange kwenzangana bundu. Ekelekele! Mûvvwà mwaneetu wa balume wamba ne: “Mmunyi mûdì mwa kufikisha mishipa mu bwâtù?” S’ncya bushuwa’s.

⁸² Bidi bikengela twikale ne Evanjeeliyo muyìsha mu kaabujima Kende, mwikale ne bucole bwa Nzambi bwa kushindika nanku bilondeshile mulayi wa cikondo aci ne kujaadika ne ndiswa dya Nzambi menemene. Pa kuumusha Aci wêwè udi anu cidimba cya ekeleesiya cyetu eci, nansha wêwè uteeta munyi, uteeta bwa kwenzela Nzambi mudimu. Udi mufwanyine kuya ku fêtè wa ditela dya bilàmbà, udi mufwanyine kwikala ne lulamatu lwônsò kudi ekeleesiya; kadi mutoloku wa Mwoyi wa Cyendeleele awu kawuyi mudyanjila kuteeka munda mwebe to, bwa kwikala mwânà wa balume anyi wa bakaji wa Nzambi, neukole mwikale cintu kampanda cya cikonyangale; kadi kuyiku mwânà wa balume anyi wa bakaji mushuwashuwale, mulelela wa Nzambi to.

⁸³ Misangu yâbûngì ntu anu ndonda kaabwalu kaanyi kakese kaa kânà kaa mukanku aku. Mushindu wakateeka cidime kampanda nzoolo wa cikuka musangu kampanda, ne yêyè uvwa ne . . . Ndi ntekemena ne kacyena cyumvwika kunudi bu cya cinyangakaja cijila to. Kadi cidime kampanda wakateeka nzoolo wa cikuka, ne nzoolo wa cikuka awu uvwa . . . kuvwa

kumushaadile diyi dimwepele bwa kukumbajayi bûngì bwa kulaadila. Ndi ngeela mpatà ne kudi muntu mwaba ewu udi mumanye bûngì bwa mayi adi nzoolo wela bwa kulaadila, bwa ne bidi bikengela mayi bûngì kaayi. Kadi, nansha nanku, kuvwa kumupangike diyi dimwepele, bwa kukumbaja bûngì. Ki cidime ewu kwibaye mu diswa dya mukanku, ùvwa ne mayi abidi. Ki kwelaye diyi adi mwinshi mwa nzoolo wa cikuka awu.

⁸⁴ Mukanku awu paakatooyikawu munkaci mwa tuzoolo twônsò atu, yêyè uvwa nyuunyi wa wèndè mushindu. Kavwaku yêyè mwa kuumvwa dituuta dya cyokòcyokò dya nzoolo wa cikuka adi to, kavwa wakula muvwa bende... muvwaye mujinge kuumvwa babyakula amu to. Nenku cikuka aci civwa cyenda cikala mu lupangu lwa nzoolo amu, ne cidya bya mu lupangu lwa nzoolo abi, aci kacivwa cyakudya bwende yêyè to. Ùvwa yêyè bu kaadibata kabi kumona munkaci mwatu amu. Cikuka aci civwa mwa kutuuta cyokòcyokò kadi yêyè kayiku mwa kubyumvwa to. Civwa mwa kuya mu nunku ne kudya *bikampanda* ne kudya *bikansanga*, yêyè kayi ubyumvwaku to. Nenku ki dîngà dituku, maawu wende, anyi maamù, eyowa's we, bwenu nwénù. Mêmè ndi... Mu Sud tutu twamba "Maawu."

⁸⁵ Pa nanku, byôbì biine, yêyè... wende—wende—wende mamwéndè uvwa mumanye ne ùvwa ne mayi abidi, kadi anu dimwepele ndìvwàmu, ki kuyaye wenda ukebangana ne dikwabo adi. Yêyè kunyunguluka mu ditunga dijima, ki ndekeelu wa byônsò kupaapalaye too ne kuulu kwa lupangu kampanda lwa nzoolo. Kumumonaye pansi apu wenda ulonda nzoolo mukole wa cikuka awu muunyima. Kwelaye lubila lukole ne: "Junior! Wewè kwêna nzoolo to, udi mukanku!" Aci kuumvwikaci anu cijaalame bwende yêyè. Bwa cinyi? Yêyè uvwa mukanku anu kwine kwônsò aku.

⁸⁶ Kadi padi mulume anyi mukaji mukasòmbe mwinshi mwa twitabaayi ne ntendeleelu wa mashika, wa kwîsùkwîsù, piikalabi ne yêyè uvwa mulongolola bwa kwikalaye mwâñà wa balume wa Nzambi, ne yêyè mumone Dîyì dya Nzambi diyiishiibwa mu bukole bwaDi, ne Nzambi uDishindika; yêyè mwikalé mukanku kwine kwônsò aku, neanyeemeneKu lubilu anu mudibi cya bushuwa ne ibidi ne ibidi mmwomumwe ne inaayi amu. Kêna pende mwa kupanga kucyenza to, bwalu wende ngiikadilu mwine mmunange Dîyì dya Nzambi. Nansha nî nganyi nî nganyi mukwabo mwambe cinyi, padiye yêyè anu umona Dîyì dya Nzambi dimweneshiibwe anyi, udi ubuuka mutangileKu bwalu ùvwa kânà kaa mukanku.

⁸⁷ Muvwabo batungunuka ne kulonda ne, yêyè kwamba ne: "Maman, kadi nêngùümukè mwab'ewu mbande bishi's?"

⁸⁸ Ki Yêyè ne: "Tupika wêwè anu cyanaana, Mêmè nênkubàkùlè."

⁸⁹ Ki cintu cimwepele cidi cikengela wêwè kwenza ncyôci aci, ncyâ kutupika anu musangu umwepele ne makàsà ebe awu kùdì Nzambi, mulayi umwepele ne: “Mukalenge Yesu, ndi muKwitabuuje ne mwoyi wanyi wônsò. Ndi mwitabuuje Mukenji wa dîbà. Ndi muWumone mushìndika, ne ndi mumanye ne Wôwò mmulelela.” Tupika ne makàsà ebe awu, Maman neakubakule. Kutacishi meeji to, wêwè udi mukanku, yéyè neikaleku dyakamwe bwa kukubakula.

⁹⁰ Mpindyewu, tudi tufika ku dimona ne tudi ne mwoyi mu cikondo cinemaanelaa ne cikondo cinene, kadi malelela a Bible ewu aa, padi beena kwitabuuja bamona aci cishìndika, dishindika diine dyaCi's ki cileeji mene cya ne Nzambi udiMu. Kakuyi mpatà to! Mpa dîbà adi padi Dîyì dilaya, didi Nzambi mulaye adi, dimanyishiibwa. Dimiuu dyäpåtuku, ne bôbô badi baCimona ne baCiatabuuja. Bakwabo kabeena anu mwa kuCimona to, mu mushindu kampanda nebiikale anu basòmbe ne kushala kacya baaCitangila.

⁹¹ Nudi bamanye's, ndi muysihe bikole bikumbane bwa ne—bwa ne... mu ditunga edi dijima, bwa ne kabivwa bikengela kwikalé mukaji wa nsuki mîpì mu ditunga emu to. Kadi, musangu wônsò, pândi ngaalukila, badiku bavule kupita pavwabo apu. Mbwalu kaayi abu? Kudi cintu cipampalamûke! S'nu di bamanye ne Dîyì ndidi dyambe cyôci aci! Nudi nwamba ne: “Ee, kabyena byenza bwalu to.” S'bidi byenza bwalu!

⁹² Kudi mwaneetu mulenga kampanda, wâkamba ne: “Ndi muswe nkutentekeleku byanza, Mwaneetu Branham. Ntu mukunange. Udi munkaci mwa kunyangakaja mudimu webe wa bwambi.” Yéyè ne: “Kí ncikutangile bwa kwambila bakaji abu cyôci aci to.” Yéyè ne: “Lekela bampaasata bacyénzè bôbô.”

⁹³ Mêmè kwamba ne: “Kadi bôbô nyawu kabayi bacyenza.” Mêmè ne: “Mpindyewu...”

⁹⁴ Yéyè ne: “Ee, abu kî mbwalu bwebe wêwè to, ikala usambilida wêwè anu babeedi cyanaana.”

⁹⁵ Mêmè ne: “Ncitangile nganyi, pa dîbà adi? Mêmè's ntu mubiikidiibwe bwa kuyiisha Evanjeeliyo.”

⁹⁶ Yéyè ne: “Nênkutentékèlè byanza ndombe Nzambi bwa kukuumushaci.”

⁹⁷ Mêmè ne: “Pawikala mwa kwanyisha—kwanyisha bwa nkutentekele mêmè paanyi byanza.” Nwamonu anyi? Ki mêmè ne: “Mêmè nêndombè Nzambi bwa akutabaje mêsù nenku neuCimone.” Pa nanku, aci's ncyâ bushuwa!

⁹⁸ Yéyè ne: “Bivwa bikengela wêwè kuyiisha... Bantu badi biitabuuja ne wêwè udi musadidi, muprofeta wa Nzambi.” Yéyè ne: “Bivwa bikengela bwa wêwè kwikalé ulongesha bakaji abu mushindu wa ku—kupeta mapà manene ne kwamba kwa biprofeta ne bikwabo.”

⁹⁹ Mêmè kwamba ne: "Mmunyi mündì mwa kubalongesha makumi makole padibo kabayi baswe nansha kwanji kwitabuua ABC, dyambedi?" Nwamonu anyi? Ncya bushuwa's. Pa nanku kwêna mwa kucyenzaku to. Aci cidi anu mu cyônsò... Ncya bushuwa's. Pawikala kuyi mwa kwenza bintu byetu bya patupu ebi, mmunyi muwikala mwa kwenza bintu bya nyuma? Bintu bya mubidi. Cya bushuwa's! Mwaneetu wa balume, mwaneetu wa bakaji, mbifwanyine kuumvwika bu bilele ngeela, kadi's Ng'Evanjeeliyo! M—M'Bulelela bwa Evanjeeliyo. Ncya bushuwa!

¹⁰⁰ Monaayi, tudi tusangana leelu ewu ne bantu... Kudi bantu bààbûngì badi kabayi anu mwa kuCiitabuujaku to, nansha mene bantu badi bûle tente ne Nyuma. Nênnùpè bwalu bumwepele bwikalà mwa kunupapula. Dibatiiza dya Nyuma Mwîmpè kí mbwena kwamba ne neubwele to, nansha kakese, kí mpa aci to, kacyenaku ne dipetangana ne musuuka webe to. Aci ndibatiiza, wamonu's. Musuuka wa munda ngwôwò ewu, munda *emu*, ùdi ne cya kufumina kudi Nzambi. Kadi pashiishe pambelu wêwè udi ne byumvwilu bitaanu, ne bitaanu pambelu... bibweledi bìdi bifila ku byebe... kubwela mu dipetangana ne cisòmbedi cyebe cya pa buloba. Munda, udi ne nyuma, ne mwômò amu udi ne bipatukidi bitaanu: kondo keebe kaa mwoyi, ne dinanga, ne bikwabo, bipatukidi bitaanu bya nyuma awu. Vulukaayi ne, mu nyuma awu wêwè udi mwa kwikala mubatijiibwe ne Nyuma mushuwashuwale wa Nzambi kadi mwikale anu mujimine. Musuuka ngudi ne mwoyi, wôwò nguvwa mulongolola kudi Nzambi.

¹⁰¹ Yesu kaakambaku ne: "Bààbûngì nebalwe kûNdì mu dituku adi, bamba ne: 'Mukalenge, mêmè ewu ncyénàku mwipate baadémons, mwenze byenzedi binene, bya bukole, mwambe biprofeta, mapà manene a Nzambi anyi?'" Yéyè kwamba ne: "'Nguumukilaayi apa, nwénù benji baa bubi, kacya Ncituku nansha munumanye to.' Baabûngì nebalwe mu dituku adi."

¹⁰² Kaayifa kaakamba ciprofeta anyi? S'ùvwa démon. Tudi tusangana kwaka... Ne baakwidi abu, bantu banene abu, bàvvâ ne cya kwikala balombodi banene mu matuku awu abu, biikâle ne kudipwekesha ne bikwabo byônsò, kadi's baakapanga kumona Diyì dya Nzambi Dyôdì diine dimweneshiibwe kumpala kwabo.

¹⁰³ Tudi bafwanyine anu kwangata musùmbà wa bôbò abu bândì mufunde kaaba aka. Kadi netwâmbè bishi bwa Baalama? Yéyè's uvwa... Nudi nwamba ne: "Nzambi utu ushintulula mmwenenu Wende." Katu ushintulula mmwenenu Wende to!

¹⁰⁴ Paakapatuka Baalama bu muprofeta, ne paakapwekaye kuntu kwaka, mwepliskopo, muyiishi, cyônsò cinudi baswe kumwinyika aci, s'ùvwa muntu munene. Kadi paakakonkaye Nzambi pa bidi bitangila dipweka dya kuntu kwaka bwa

kuya keela Izaleela mulawu, yéyè kavwa mubanangeku to anu kwine kwônsò aku, pa nanku paakalombaye bwa kuya, Nzambi wakamba ne: "Kuyi to!"

¹⁰⁵ Pashiishe kutumabo muntu wa mwânzù mutumbuke, musùmbà mujima, pàmwäpa bamwe baa ku beepiskopo anyi bakulu batangidi, anyi cintu kampanda, kuntwaku, kwambabò, biikale ne dilonga ditambidile dya tulaasa, bwa kumuswishabo. Yéyè kwalukila e kukonkaye cyakabidi Nzambi. Kabyena bikengela bwa wêwè kukonka Nzambi bwa musangu mwibidì to! Padi Nzambi ucyamba bwa musangu wa kumpala, n'Cyôcì aci! Kabyena bikengela bwa wêwè kwindila nî ncinyi nî ncinyi to.

¹⁰⁶ Rebekah kaakindila bwa kupetaye dîyi dimutumina diibidì to. Baakamukonka, kwamba ne: "Uyaaya anyi?"

¹⁰⁷ "Mulekelaayi yéyè ámbè."

¹⁰⁸ Kwambaye ne: "Nyaaya!" Yéyè uvwa musonsodiibwe kudi Nzambi anu ne mwoyi umwe. Wakashaala umwe wa ku baamukalenge-mukaji baa mu Bible bwa dyenza dya bwalu mwimanyine pa dimutütusha dya Nyuma wa Nzambi uvwa mumusake bwa kupetaye civwa bulelela bwa kabuyi dyela mpatà abu, ne yéyè wakaciitabuuja.

¹⁰⁹ Mpindyewu tudi tusangana ne, Baalama, mu bushuwa bwa bwalu, kavwa mwa kumonaku to. Wakapatuka e kutangila pa cisamba aci, kwambaye ne: "Mpindyewu, anji indila kakese! Twêtù tudi cisamba cinene, cyalabale muneemu emu, nwénù nudi anu musùmbà mutangalakangane cyanaana." Nudi numona anyi? "Ne twêtù bônsò—twêtù bônsò tudi twitabuuja Nzambi umwe."

¹¹⁰ Aci's nyca bushuwa. Bavwa bônsò biitabuuja Nzambi umwe. Badi bônsò bakuukwila Yehowah. Tangilaayi mulambu wa Baalama: byoshelu mwandamutekete, nomba mupwangane wa Nzambi's; ekeleeziya mwandamutekete, nwamonu's; bimpanga bya mikooko mwandamutekete, biikale byamba bwa dilwa dya Mukalenge. Bilondeshile maalu mudiwu menemene, yéyè uvwa mwitabi wa maalu mudiwu mafundiibwe anu muvwa Môsà; kadi, nudi numona's, kakuvwa dishindika dya kudi Nzambi to. Mwômò amu, bônsò babidi bavwa baprofeta.

¹¹¹ Kadi mu mudimu wa bwambi wa Môsà, muvwa Dikunji dya Kapya dya ditambe-mfukilu, Bukénkè bùvwà bulembelele mu mwaba uvwa cituudilu awu. Muvwa dyondopa dya kudi Nzambi, muvwa lubila lwa Mfumi mu cituudilu, bimanyinu binene, dyondopa dya kudi Nzambi, ne maalu a kukema ne bikwabo biikale byenzeka munkaci mwabo. Civwa ncimanyinu cya Nzambi udi ne mwoyi munkaci mwa cisamba Cyende.

¹¹² Bilondeshile maalu mudiwu menemene, bônsò babidi bavwa mu bulelela. Kadi Baalama wakateeta kuswisha bantu, ne wakabalowa kadi kubabwejaye mu cintu. Dibà kaayi adi?

Anu pabwîpì menemene ne kudyatabo mu buloba bulaya. Mu dituku dimwe anyi abidi, bavwa bafwanyine kwikala mu buloba bulaya.

¹¹³ Kadi mpindyewu ndi nciina ne nkwegèpì... Ebu mbwali bukolakòlààyì bwa dyamba, dimwe dya ku matuku adi panshi aa nebangaase cingoma bwa Cyôcì aci. Kadi vulukaayi eci, ne, bakaadi munkaci mwa kulowa maekeléeziya kudi Nsangilu wa Bukwântèndeelu, yèyè awu ngudi unubwejamu buludi, bwa kwambaye ne: "Nudi cisumbu cimwe." Kanwena cisumbu cimwe to! Patukaayi munkaci mwa cintakanyi aci nwikale batapuluke! Ncya bushuwa ne, n'Cilelela. Bidi bikengela twikale baditole ne cintakanyi aci, nwikale anu kule kwa menemene naaci.

¹¹⁴ Baalama kwambaye ne: "Tudi... tulekelaayi bânà beetu balela baselangane bwalu, twamb'eku twamb'eku, s'tudi twitatbuuu Nzambi umwe."

¹¹⁵ "Mmunyi mudi babidi mwa kwendela pamwe piikalabo kabayi bapunge dîyì?" Mmunyi munudi mwa kwenda ne Nzambi panudi kanuyi biitabangane ne Dîyì Dyende? Mmunyi munudi mwa kusakidila Ku twitabaayi ne bikwabo, panudi balongolwela dibenga kucyenza, anyi, bapete dîyì dinutumina bwa kubenga kucyenza? Kanwena mwa kucyenzaku to. Kakwena mushindu wa kucyenza to, mwaneetu wa balume, mwaneetu wa bakaji. Kanwenaku mwa kusambakaja lwevenya alu ne cidi kacyi cyela lwevenya to. Mâyì ne mafuta kabyenaku mwa kusambakanaku to. Midimà ne bukènkè kabykusambakanaku to. Bukènkè budi ne bukole menemene, mu mushindu wa bwipata mîdimà musangu umwe.

¹¹⁶ Pa nanku katwenaku mwa kubisanga to. Nansha mpekaatu kabidi ne maalu a pa buloba kanwenaku mwa kubisambakaja to. Kanwenaku mwa kusanga Ekeleesiya ne dingumba to. Kanwena mwa kusanga Ekeleesiya ne twitabaayi to. Kanwenaku mwa kusambakaja maalu a pa buloba ne Evanjeeliyo to. Kabykusambakanaku to! "Patukaayi munkaci mwabo, ikalaayi batapuluke," mudi Nzambi wamba, "Nênnwâkìdilè Kundi. Nenwikale bânà Baanyi baa balume ne baa bakaji, Mêmè nêngìikalè Nzambi kunudi." Katwenaku mwa kucyenza to pacidi maalu aa kaàyi mamweneshiibwe, ne Dîyì dya Nzambi bwa dîbà edi kadiyi dijaadikiibwe ne m'Bulelela. Ikalaayi nwenda nulonda mu dikàsà.

¹¹⁷ Mpenta, s'ki bwa cinyi Luther wakajimija mukenji wende. Mushindu awu ngwàkajimijà Wesley mukenji wende. Nwamonu's, bu ekeleesiya wa ba-Wesléiens mutungunuke, nunku's mbashaale beena Mpenta. Bu ba-Luthériens batungunuke, nunku's mbashaale ba-Méthodistes. Nwamonu anyi? Mpindyewu beena Mpenta bôbò batungunuke, nciikale Mukaji musela. Nwénù bashaale paanyima ne batungunuke ne kwenda kwalukila cyanyima mu maalu a pa buloba mushindu

unuyaaya mpindyewu awu, nenujimine! Neciikale anu cizubu pa cizubu, ne cikolakola cidi ne cya kwoshiibwa. Aci tudi bamanye. Yéyè neasangishe Blé Wende mu diyeeba. Kadi tuzubuzubu atu Yéyè neàtwoshè ne kapya kadibo kabayiku mwa kujima to, nansha muvwàtu cyambudi amu. Ncya bushuwa ne civwa ciCyambule. Kadi Mwoyi wakacishiya paakenzaci anu ne cyâshâàdi dibeji apu, wakatungunka ne kúpatuka bwa kwenza cintu cya cyanaana too ne mwakalwaci kufika mu cipidi cyaci mu kaabujima.

¹¹⁸ Ki mwapicila kabidi Ekeleesiya mu Dibingishiibwa, Dijidiibwa, ne Dibatiiza dya Nyuma Mwîmpè (dyalujulula dya mapà), utungunka ukabwela buludi mu dyenjibwa dya mu cimfwanyi cya Kilisto. Kilisto m'Mubaki, Ekeleesiya m'Mukaji musela, ne Mukaji musela ncitupa cya Mubaki. Nebikengele bwa kwikalaye Ekeleesiya Dîyì, kî ng'ekeleesiya wa cyena mangumba to. Yéyè neikale Ekeleesiya Dîyì, Dîyì dìdì dimanyishiibwe adi, ne ku Dîyì dya Nzambi dishindika.

¹¹⁹ Baalama, kavwa yéyè mwa kumona dishilangana to. Bâbûngi kabeenaku mwa kudimona to.

¹²⁰ Pálò kavwa mwa kuCimonaku to, nansha muvwaCi cishindikiibwe anu kumpala kwende mene.

¹²¹ Datana kavwa mwa kuCimona to. Datana wakapatuka kwaka, kumonaye Môsà ne kumanyaye. Kupatukaye kwaka, kwambaye ne: “Wêwè udi uteeta kudyambidila mûdì umwepele mu musùmbà ewu. Disangisha dijima ndya cijila!” Nzambi kacya katuku mwanji kukwàta mudimu mushindu awu nansha. Bivwa bikengela bwa yéyè kwikalaye mumanye civwa cîmpè kutamba aci. Ki kwambaye ne: “Ee, disangisha dijima’s ndya cijila. Wêwè ukaadi uteeta kudyenza...” Bu twêtù mwa kucyamba leelu ewu, mu ngaakwilu wa mu mùsèèsù: “Èhelè.”

¹²² Kadi Môsà uvwa mumanye ne Nzambi nguvwa mumutume kuntwaku bwa ciine aci. Kwambaye anu ne: “Mukalenge...” kudyupwilaye pansi mu—mu mushiku wa mbelu wa ntenta wa kusambakeena.

¹²³ Ki Nzambi kwambaye ne: “Tapuluka nende.” Ki Yéyè kubamina nzwi.

¹²⁴ Nenku vulukaayi ne, mpekaatu wâkenzabò kudi Izaleela awu (ku cyakamba Baalama ne, “Badi bônsò bamwe” aci,), mpekaatu awu kacya kabatuku bamufwile Izaleela luse to. Nenku tangilaayi, lekelaayi nnupe cimfwanyi cìkkalà mwa kunulenga; mu bantu miliyô ibidi bâakuumukà mu Ejipitu abu, babidi baa kudibo mbaakabwela mu buloba bulaya. Muntu ne muntu wa kudibo wakadya cintu anu cimwecimwe aci, bônsò baakaja maja mu Nyuma, bônsò bavwa ne bintu byônsò biteekela pamwe; kadi pakaavwabi ne díbà dya kutapuluka ndyôdì edi, Dîyì ndivwa dyenze ditapulula adi. Ki mudibi kabidi

leelu ewu! Dìyì ndidi dyenze ditapulula! Paakalwa cikondo aci, yéyè wakamba ne: "Mona's, mwab'ewu, tudi . . ."

¹²⁵ Bifwanangane bikole, tangilaayi, Bible mmwambe ne: "Mu matuku a ndekeelu nyuma ibidi ayi," Maataayi 24.24, "neyiikale mifwanangane anu menemene, mu mushindu wa bifwanyine kuseeswisha ne Basungula mene bu ne bivwa mwa kwenzeka." Cizubu aci ncifwanangane anu menemene ne blé, kadi kî m'blé to. Nwamonu anyi? Kî m'blé to, kadi ncifwanangane anu nende menemene. Nwamonu anyi? Cifwanangane bikole, mu mushindu wa bifwanyine kuseeswisha ne Basungula mene. Nudi badiwije dingumba ne nudi nupona mu dingumba adi, nuuminyina ne nufwa, kadi blé yéyè mmutungunuke anu kutungunuka too ne mudiye ukapatukila mu. . . Nwamonu anyi? Ncya bushuwa menemene! Ncitwadi, kadi kî m'blé to.

¹²⁶ Vulukaayi ne, blé yéyè udi anu mutungunuke ne kuya. Mu dibiika dya ku lufu dikanda dyônsò dya blé adi nedibande dibwele mu blé, padiye wenda uya bwa kwenza mutu apu, bwa kupatuka mu dibiika dinene dya ku lufu.

Kacya kaciyiku cifwidiibwe luse to!

¹²⁷ Twänjààyi kwimana katanci kakese mwab'ewu. Ndi ntekemena ne ncýêna nnufudisha mpuuya wa munda to. Kadi, tangilaayi, nganjì nnukonkebi cintu kampanda. Twänjààyi kwangata cyôci aci. Twämbèbi, cileejilu ne, makumi aa mmafwanyine kwikalala a cya bushuwa. Padi bilume bya kudi mulume ne bya kudi mukaji bilwa, piikalabi ne nukaadiku bamanye tulangi twa disangishila bivuba ne mayi anyi—anyi disanga dya mamiinu a nyama milume ne mikaji dya ngombe ne bikwabo, nenusangane ne difila dya bilume bya kudi mulume didi dipatula bivuba bitwe ku mûliyô mujima. Ne difila dya kudi mukaji didi dipatula mayi mûliyô mujima. Kadi nutuku bamanye ne kudi anu dimwepele dya kudiwu aku didi ne bufuke anyi? Twânà tukese twa ngombe atu, anyi nî ntwa nyama kaayi yônsò atu, mu miliyô ya bivuba eyi, mûliyô umwe wa bivuba ewu, nekwikale anu kaacivuba kakese kamwepele aku kààdifindà munkaci mwa tukwabo tuubivuba twônsò atu ne kubàndila pamutu paatu too ne ku dikapeta dya diyi dya bufuke adi ne kudikoka kubwela munda mwadi, kadi bikwabo byônsò abi bifwa. Cimwe cya kudibi ncidi cilongolwela mwoyi, kî mbikwabo byônsò abi to, nansha mudibi byônsò bya mwomumwe. Umwe pa mûliyô mujima!

¹²⁸ Ambaayibi tûng nî mmudibi dilolo edi? Kudi beena Kilisto miliyô nkama itaanu, mudibo bacinka, ngeela meeji, pa buloba, cishiferi bu nanku, cidi anu cishiferi cya cijikè ne bijeengu cyanaana. Bu Dyambwibwa mwa kwenzeka dilolo edi pa dîbâ adi, mu badi ne mwoyi badi ne cya kuya, s'nkufwanyine kwikalala anu bantu nkama itaanu cyanaana. Ee, kudi bantu bûngì abu badi bàjiminà dituku kana dyônsò edi, pamwe ne

bûngì abu, badibo kabayi mwa kumanya ne mbaye penyi to. Mukaji musela neambwbibwe ne twêtù bafwanyine kudikonka ne ncinyi cidi cyenzeke; kadi eku bantu paabo batungunuka anu ne kuyiisha, bamba mudibo “bapeta *bikampanda*, ne *bikansanga*, ne *bikankenga*,” kadi monaayi ne ndyediibwa kaayi dya mâyì ku makàsà didi difwanyine kwikalaku adi. Twänjì mene anu kwamba ne mbifwanyine kwikala nanku awu; ncyêna ngamba ne mmudibi to, ncyêna mumanye to, kî mmêmè udi ne bukookeshi bwa cyôcì aci to. Nzambi ngudi Mulumbulwishi wa cyôcì aci. Kadi anji monaayi mudibi bifwanyine kwenzeka anu bipeepele nunku ewu, mu bishiferi byônsò abi ne bikwabo, mudibi bifwanyine kujaadikiibwa.

¹²⁹ Koola kaakamona Aci bwa cinyi? Datana kaakamona Acì aci bwa cinyi?

¹³⁰ Aakaba kaakaCimonaku yêyè bwa cinyi? Pavwa Aakaba... Pavwa Yehoshafata mupweke kudi Aakaba aku apu, yêyè kwamba ne: “Aakaba, tudi mu lutatu. Udiku mumanye ne Nzambi ngwâkatùpèësha buloba ebu anyi? Yoshuwa ngudi mutwâbànyinebù. Udi mumanye citupa cya buloba cidi beena Suuliya bangate eci, kî mbuloba bwetu twêtù anyi?”

“Eyowa’s!”

¹³¹ “Beetu bânà balaala ne nzala, kadi beena Suuliya (beena lukuna beetu’s) badiisha baabo bânà, babuukucisha mafu ne blé uvwa ne cya kwikala wetu twêtù.” Aci’s ncilelela bilondeshile Mifundu. Yêyè ne: “Udiku mwa kunkwacisha bwa kuya kuntwaku ne kubunyenga anyi?”

¹³² Mpindyewu, misangu mikwabo muntu mwîmpè mwikale mu bwenzeji bwa bubi’s needilekelele. Mbîmpè kutangilaayi, ekeleesiya, ikalaayi batangile ne ntema yônsò.

¹³³ Mpindyewu, katanci aka, Yehoshafata, bu muvwaye mutendeleedi munene, kwambaye ne: “Ee, bivwa bikengela anu twêtù kuyaku, cya bushuwa, bwalu etu màkàlu a mvita, s’tudi bônsò anu bantu bamwe.” Kadi kabavwa bantu bamwe to! To! Yêyè ne: “Ee, etu màkàlu a mvita’s ng’enu màkàlu a mvita, bantu beetu’s mbantu beenu. Cya bushuwa, tuyaaaya.” Yêyè ne: “Kadi twänjì kukonkaku Mukalenge dyambedi’s.”

¹³⁴ Ki yêyè kwamba ne: “Kaa...” (Aakaba’s) “...ee, kakuyi mpatà to, s’ki meeji avwa akengela twêtù kwikala beeble ngôwò awu. Ee, netwikale mwa...”

¹³⁵ “Kudiku muprofeta wa Mukalenge anyi?”

¹³⁶ Awu ne: “Ndi naabo seminere mûle tente. Ndi naabo kî mbângi kî mbângi nkama inaayi mwaba ewu, baa batambe bwîmpè bàdiku. Bwônsò bwabo badi ne mapolome abo a Ph.D., L.L.D., L. ibidi ne D. yabo, ne bikwabo byônsò bya ku byôbì abi. Badi muntu ne muntu...” Mpindyewu vulukaayi ne, bavwa baprofeta baa beena *Ebelu*, baa mu cilongelu cya baprofeta.

¹³⁷ Yéyè ne: “Batwalaaku, twǎnjìbi kubateeje.”

¹³⁸ Musangu awu ngeela meeji ne ùvwa n’Zedekiya, mfumu munene (mwepiskopo) uvwa kumutu kwa bôbò bônsò awu, kuseemenaye mwab’awu, ne yéyè uvwa ne disonsodiibwa. Ùvwa ne disonsodiibwa, kakuyi mpatà to. Kuseemenaye mwab’awu, ne yéyè uvwa mudyénzèle nsengu minene ibidi ya cyamu cifiiki. Yéyè kwamba ne: “Udi mumanye’s, EMU MMUDI MUKALENGE WAMBA: ‘Newangate nsengu eyi ne neusake beena Suuliya too ne pambelu paa ditunga.’”

¹³⁹ Ee, bakwabo bônsò kwambabo biprofeta ne: “Aci ncyा bushuwa menemene!” Yônsò wa kudibo, seminere mujima, ne dîyi dimwe. Nwamonu anyi?

¹⁴⁰ Aakaba kwambaye ne: “Wamonu anyi?”

¹⁴¹ Yehoshafata, bu muvwayeku wa nyuma, nudi bamanye’s, kavwa anu mumbe kuuminyina yônsò to, kwambaye ne: “Kadi kakwenaku mukwabo nansha umwe cyanaana mwaba kampanda, utudi mwa kukonkelaku anyi?”

¹⁴² “Bwa cinyi bûdì ukebela kukonkela kudi bakwabo, padi Bukwântèndeelu bwônsò nkòòng butuule bupuwe (nsangilu mujima), s’mbwebu bwamba ne ‘Mbikumbane’?” (Mfwilaayiku luse, nwamonu’s.) “Cintu cyônsò nkòòng’s nyewu cyâmbì ne: ‘Ki civwa cikengela twêtù kwenza ncyôcì aci.’” Nwamonu anyi? “Ki civwa cikengela twêtù kwenza ncyôcì aci.”

¹⁴³ Yéyè ne: “Kadi kakwenaku mukwabo mwine nansha umwe mwaba kampanda anyi?” Wa pabwende awu, nudi bamanye’s.

¹⁴⁴ Yéyè ne: “Eyo, udiku. Kudi umwepele, Miika mwânà wa Imla, kadi mêmè ntu mumukine.” Bìtu misangu yônsò anu mushindu awu’s. “Ntu mumukine bwalu yéyè utu misangu yende yônsò anu ukuma cisamba cyetu bisuusu bya mèyì makole, ne ungeela mêmè mwine ewu milawu, ne ungamba mèyì anu a mabi awu. Ndi mukine muntu awu!”

¹⁴⁵ Yéyè ne: “Aa, mfumu kaakuluku nanku to.” Yéyè ne: “Nda kamwangataayi.”

¹⁴⁶ Pa nanku kuyabo kuntwaku kudi mwânà wa Imla awu, bamwe baa ku—ku beepiskopo abu, anyi, bamwe baa ku bakulu, ki kuyabo kuntwaku, kwambabo ne: “Mpindyewu, teeje, udi muswe kwalukila cyakabidi mu bulongolodi anyi? Wâmbè cintu anu cimwecimwe cidibo bôbò bamba aci, nebakwalujemu.”

¹⁴⁷ Kadi kwenzekabi ne Nzambi uvwa ne muntu uvwabo bôbò kabayiku mwa kutwa byanza to; Nzambi ukaavwa ne Byende byanza pambidi pende. Yéyè uvwa anu muleeji wa Bulelela bwa Nzambi. Kwambaye ne: “Cya bushuwa,” mwakambaye, “nêmpwekekèku, kadi nêngâmbè mêmè anu cidi Nzambi uteeka mukana mwanyi aci.” Ki muntu wa Nzambi nyéyè awu. Yéyè ne: “Mpeeshaayi bufuku ebu.” Ki bufuku kulwabu, nenku

Mukalenge kwakulaye ne muprofeta awu, kaamuntu cyanaana aku. Nenku katanci aka, kupatukaye paakacyabu mu dinda.

Bôbò ne: “Bwalu budi cinyi, Imla?”

¹⁴⁸ Yéyè ne: “Ndaaku,” yéyè ne, “kadi ndi mumone Izaleela mutangalake bu mikooko pa kakuna, kayiyi ne mulami to.”

¹⁴⁹ Yéyè ne: “Mvwa mukwambile cinyi! Mvwa mukwambile cinyi pa bwalu abu!” Ki yéyè kwamba . . .

¹⁵⁰ Pa dîbà adi mwepiskopo munene kusemenaye kadi kumunangulaye dipi ku mishiku pakalakaa, kwamba ne: “Njila kaayi udi Nyuma wa Nzambi muyiile? Bwalu mêmè ndi mumanye ne mvwa ne Nyuma; nkaadi muje maju mu Yéyè awu, nkaadi mwenze bintu byônsò ebi. Wamonu’s, mvwa—mvwa ne Nyuma pambidi paanyi. Njila kaayi udi Ye muyiile?”

¹⁵¹ Mpindyewu, monaayi, bu muvwa Imla mwânà wa Nzambi, anyi muprofeta mulelala wa Nzambi, wakakenketa cikeenakumona cyende ne Dîyì. Cyôci kaciyi cikumbanangane ne Dîyì to, ncyâ mashimi. Nwamonu anyi? Dîyì dya dîbà adi, nwamonu’s. Mpindyewu, yéyè wakamba bilondeshile Mifundu ne, buloba abu buvwa mbwabo bôbò, buloba buvwa mbwabo. Bilondeshile Mifundu, byônsò bivwa bimweke bijaalame pa kuumusha kantu kamwepele.

¹⁵² Vulukaayi ne, Dîyì dimwepele ndyakenza ne cimvundi cyônsò eci cilwe, Eva wakabenga kwitabuua Dîyì dimwepele dya Nzambi; ku ntowadijilu kwa Bible, Dîyì dimwepele ndivwa dikebe lutatu. Yesu, mulwe munkaci mwa Bible, wakamba ne: “Muntu neikale ne mwoyi ku Dîyì dyônsò didi dipâtukà mukana mwa Nzambi.” Kundekeelu kwa Bible, mmwambe ne: “Ewu yônsò ûmusha Dîyì dimwepele anyi wasakidilaKu dîyì dimwepele awu.”

¹⁵³ Kî ncitupa cya Evanjeeliyo to . . . Ba-Méthodistes badi ne citupa, ba-Baptistes, ba-Presbitériens, ne bakwabo, badi ne citupa cya Dyôdì adi, Katolike badi ne citupa cyaDi, Bantemu baa Yehowah, bakwabo bônsò abu.

¹⁵⁴ Kadi Cidi n’Dîyì mu kaabujima, Dîyì dyônsò, Dîyì dya dîbà; ki cidi ne mushinga. Kadi katwadyakyucenzaku to anu too ne piikala Nzambi mulaabe muprofeta udi mwa kwimana ne kwamba Dyôdì adi, ne kuDishindika, ne kuDijaadika ne nDya cya bushuwa. Necidifinde cipicile buludi munkaci mwa bantu, mu mushindu wa kabayi baDimanyaku to, anu mukaadibi byenzekenzeke misangu yônsò.

¹⁵⁵ Nwénù beena Katolike, bu Jeanne d’Arc, nwâkamwosha bamuswikile ku muci ne mmuloji; pashiishe nwénù kujuula mibidi ya bansaserdose abu, paanyima paa bidimu nkama ibidi bimane kupita, ne kuyeela mu musulu. Kanwakamanya Patrick Munsantu ne bakwabo abu to.

¹⁵⁶ NeCinupicile cyakabidi buludi mu byanza, katanci kakese aka. Nzambi neàcyéñzè, ne kanwakumanyaku nansha ne ncyenjiibwe to. Nwamonu's, Yéyè udi udifinda upita buludi ne wangata Mukaj'Ende musela ne ùbànda Nende, ne uMwiba uya, anu munkaci mwa bantu mene amu.

¹⁵⁷ Tudi tusangana ne, Miika mukese ewu kwambaye ne wakakenketa, wakamanya ne Nzambi ukaavwa mwambe, mwakwile kudi muprofeta mulelala kampanda kumpala kwende yéyè. Muprofeta wa kumpala kwende awu, wakamba cinyi? Wakamba nunku, wakamba ne: "Aakaba, bu muwédi mashi a muntu mwakane pansi, anyi mashi a Naabota mwakane awu, mbwa neyilake ebe peebe mashi, ne a Izabela." Nenku aci's mmwômò menemene, bivwa bikengela cyenzeke bwalu Nzambi nguvwa mucyambè. Mmuni muvwa muprofeta awu mwa kwamba ciprofeta címpè pavwabi ne bubi mbuvwa bùmupìlsha?

¹⁵⁸ Mmuni mündi mwa kwambila Cikondo cya Ekeleesiya wa Laodikiya eci maalu mîmpè padi Nzambi mwakule maalu acipiisha? Wêwè udi butaka, mwena dikenga! Udi wamba ne: "Ndi mubanji, ndi ne bitambe bwîmpè... Ndi ne maekeleesiya bu mudi ba-Méthodistes, ne ba-Baptistes, ne ba-Presbytériens. Ndi ne *bikampanda*, ndi ne *bikansanga*; *bikampanda*, *bikansanga*, ne *bikankenga* bya bitambe bwîmpè." Aci ncyu bushuwa, kadi kuyi mumanye ne udi butaka, impofo, mwena dikenga to, ku cintu cilelela cidi Nzambi umwenesha eci. Necinupicile anu munkaci amu, mushindu *ewu*, cipatuka buludi ciya. Nwamonu anyi? Itabuujaayi, nwénù bantu, kumpala kwa díbà kwikaladi diikaadi dimane kupita.

¹⁵⁹ Mpindyewu, tudi tusangana ne yéyè wakamunangula dipi ku mishiku, kwamba ne: "Njila kaayi udi Nyuma wa Nzambi...?"

¹⁶⁰ Miika kwambaye ne: "Ndi mumone Nzambi musòmbe pa Nkwasa wa butumbi. Ne bônsò... Yéyè kubiikila baaminyampala baa mu Dyulu, kwamba ne: 'Nganyi utudiku mwa kutuma bwa kuyaye pa buloba kasesewisha Aakaba?'" Yéyè ne: "Ki nyuma kampanda wa mashimi kubàndayè ne kudyupwilaye pansi kumpala kwa Nzambi; mwena mashimi." Nenku vulukaayi ne, nyuma wa mashimi awu wakabwela munda mwa baprofeta abu, s'bivwa bikengela kwikalabo bamanye pa díbà adi ne nyuma uvwa pambidi paabo awu kawwa bilondeshile Dìyì to. Kadi bavwa batambe kwikalala basaluke bwalu bavwa baprofeta baa mfumu, bwalu bavwa ne bintu byônsò byenda anu bilenga.

¹⁶¹ Nenku ki cyôcì aci cidi ekeleesiya mwenze leelu ewu. Nukaadi baye kule ne dilabula dya cyena kale dinuvwa naadi kukaadi bidimu panuvwa nwimanyina mu masangu a mísèèsù nuyiisha Evanjeeliyo apu.

Bapatuke mu malongolodi awu biikale nudibiikila "cisamba cidishikamine" (È!) s'mbwalu nukaadi badìjingilemù cyakabidi,

bu mudi ngulube mwalukile ku bitoci byende anyi mbwa mwalukile ku bilushi byende. Piikalaci cimulùkìshe musangu wa kumpala, s'neçimulùkìshè cyakabidi. Ncya bushuwa's! Nzambi mmunutwile mukana Mwende, Yéyè mmwambe ne: "Udi civumvu, kuyi luuya anyi mashika"; kwenza ndambu wa masangisha, pashiishe kwimbaku bisanji ndambu, mijiki, ne—ne kwimbaku ndambu mukese wa misambu, paabi, kakuyi mpata to... ncyambe kushala anu bu bundu's bwa bwena Kilisto.

¹⁶² Mwanaanyi wa balume uvwa mumbiikile dîngà dituku bwa kuya kabandila ku television, cisumbu cya bimbi baa misambu muvwa bantu balwe. Musùmbà wa tu-Ricky's twimane mwab'awu, tuzunzuka twatwa eku twatwa eku byenze bu maja a bìdùndadùnda aa, biikale bimba miyengà ayi, s'mbundu be bwa Yesu Kilisto! Kakucyena kabidi dîsù dikole mu ekeleeziya to nansha kakese. Mbimweke anu bu ne byônsò bikaadi anu cintu kampanda cya maja a bìdùndadùnda's, ne dileejangana dyâ mvwadilu, pamutu paa Ekeleeziya wa Nzambi udi ne mwoyi mudi Yesu Kilisto mwa kudimwenesha Yéyè mwine mu bukole. Bwanyi mêmè mbimweke anu bu ne, kudi cintu cipampalame muwaba kampanda. Badi munkaci mwa kusenunuka's. Ne Bible mmwambe ne mushindu awu nguvwabi mwa kwikala. Nwamonu anyi? Tangilaayi numone kunukaadi. Nwadimukaayi, tabulukaayi kumpala kwa dîbà kwikaladi dikaadi dimane kupita.

¹⁶³ Mpindyewu tudi tusangana ne, Yéyè mmwambe ne: "Nganyi utudi mwa kutuma kuntwaku bwa kaseeswishaye Aakaba, bwa kamufikishaye ku diya kuntwaku bwa kuuja mêtì a muprefeta awu?" Nwamonu's, muprefeta yéyè anu mwambe Dîyì, maulu ne buloba nebijime kadi Dyôdì kadyena mwa kupangilaku to. Bikengela anu Dyenzeke. Pa nanku ki cyakenza ne, bivwa bikengela anu bwa bwalu abu kwenzekabu.

¹⁶⁴ Yéyè kwamba ne: "Elaayi muntu ewu mu buloko bwa munda, nwikalaaayi numudiisha dyâmpà dya kanyinganyinga ne mâtì a kanyinganyinga. Pângààpinganà mu ditalala, mêmè ki wâlwa kutangila bwalu bwende."

¹⁶⁵ Miika kwimanaye mwab'awu kayi unyunga to, mumanye ne yéyè nguvwa ne Nyuma wa Nzambi. Ciprofeta cyende, bikeenakumona byende bivwa bya cya bushuwa. Mukenji wende uvwa wa cya bushuwa, bwalu Ùvwa EMU MMUDI MUKALENGE WAMBA wa ku cikeena-kumona, EMU MMUDI MUKALENGE WAMBA wa ku Dîyì. Civwa ne cya kwikala cya bushuwa, civwa ng'EMU MMUDI MUKALENGE WAMBA. Kwambaye ne: "Wêwè mudidingeku anu mupingane, Nzambi kî mmwakuleku naanyi to." Ne nwênu's nudi bamanye cyàkenzekà, bushuwa's. Nwamonu's, nwênu... .

¹⁶⁶ Ikala muumvwe, mwaneetu. Teeleja.

¹⁶⁷ Bushuwa, Kaayifa, kavwa mwa kuCimonaku to. Bwa cinyi kaakatangilaku pansi...? Ùvwa—ùvwa mwepiskopo, ùvwa paapà wa ekeleesiya yônsò misanga ntete. Muntu awu kavwaku mwa kumona Yesu mwimane mwab'awu bwa cinyi? Kavwaku mwa kuumvwa bwa cinyi? Pavwabo bimba Musambu wa 23 apu, Musambu wa 22, eyowa's we, mu ekeleesiya amu, ne: "Nzambi Wanyi, Nzambi Wanyi, WâNdekèdi bwa cinyi?" piine apu ki Yéyè wawa mukudika kú nkuruse. Mifundu miine, Nzambi mwine uvwabo munkaci mwa kukuukwila awu, nyawu bavva munkaci mwa kuMupiisha ne kuMushipa bu ne "mmukoleshi wa maalu." S'ki cyôci aci.

¹⁶⁸ Ncifwanyine kunupapula bu mêmè mwa kunwambila ne cidi pabwîpi menemene ne kwenzeka cyakabidi. Bible mmwambe ne Yéyè uvwa usanganyiibwa pambelu mwikalale uteeta bwa kukookola bwa kubwela, kadi muntu nansha umwe kayiku muswe bwa kuMulekela abwele to: "Ewu ûndì Mêmè munange Ndi mmunyooka ne mmudyula, Ndi mmuatandisha, Ndi mmunyukulula, kadi mbwalu Ndi mumunange. Unzulula Mbwele." Eyowa. Kabayiku bafwanyine... "Vulukaayi ne, Ncivwa muswe bwa kubwela mu ekeleesiya to; n'yéyè, muntu nkaaya awu." Kavwa ne mushindu wa kubwela mu ekeleesiya to, bavwa baMukangile pambelu ne kàlê. Anu dingumb... anu bulongolodi bumwepele bwa ku ôwò ônsò awu, mmu cikondo cya ekeleesiya eci, muvwa Ye usanganyiibwa pambelu paa ekeleesiya. Mwediibwe pambelu! Mubengiibwe! Mudyombodiibwe! Bwalu... Wakamweneshiibwa anu bwa katupa kípì mu ekeleesiya mikwabo ayi, mu mmwenekelu wa dibingishiibwa, ne bikwabo; kadi emu nunku mwaba ewu, cikondo cidi cìlwa mpindyewu eci, ndimweshiibwa mu kaabujima dya dishindika dya Yesu Kilisto umwèumwè awu makeelela, leelu, too ne kashidi. Kaa, ndi ngiitaba ne tudi ne batentudi bûngì cyanaana, kadi kenketaayi cya kumpala, cya ku cibangidilu aci.

¹⁶⁹ Môsà wakatuuluka ne mikenji ya Nzambi, bwa kusungila Izaleela; ne paakenzaye aci, wakenza ndambu wa bishima. Batentudi kumulondabo. Bu ne bôbò abu mbaakalwa kumpala, nunku yéyè nguvwa mwa kwikala mutentudi. Nwamonu's, yéyè uvwa ne Dîyì dya Mukalenge, ne Mukalenge wakashindika; yéyè wakashaala anu kacya wapuwa.

¹⁷⁰ Nenku, nudi bamanye ne, cintu cyôci cimwecimwe aci ncilaayiibwe mu matuku a ndekeelu anyi? "Anu muvwa Yambele ne Yane bakandameene Môsà amu, ki mwikalabi kabidi ne bantu baa meeji mooneke aba pa bidi bitangila Bulelela." Nenku padi bulongolodi bulama... bupicishila muntu mu bwine bulongolodi abu, byaleeji anu ne kí mbufumine kudi Nzambi to; bwalu, Nzambi utu wenza bintu abi bwa kukoka ntema ya bantu, ki pashiishe Mukenji ubilonda. Kabiyi nanku to, pa díbà adi kí

n’Nzambi to. Kî n’Nzambi to! Nzambi utu Yêyè wenza anu aci misangu yônsò.

¹⁷¹ Yudaase kavwaku mwa kuCyumvwa to. Wakenda pamwe Nende, kaakaCimonaku to.

¹⁷² Kadi muntu mulelela, muteeka kudi Nzambi, ngiikadilu mulelela awu, mutoloku mulelela awu, musuuka wa Nzambi ûvwà munda mwa Nzambi kumpala kwa difuka dya dyulu ne buloba awu; vulukaayi ne, nwêñù badi cya bushuwa ne Nyuma wa Nzambi munda mwenu dilolo edi abu, nuvwa mwab’ewu mu Kilisto bwalu Yêyè uvwa kaabujima kaa Dîyi. Ûvwa kaabujima kaa Bunzambi mu ciikadilu cya mubidi. Nzambi uvwa munda mwa Kilisto, upungisha baa pa buloba ne Yêyè mwine. Nudi nwitabuuja aci anyi? Tangilaayi, Yêyè uvwa munda mwa Kilisto. Nenku piikalabi ne wêwè uvwa munda mwa Nzambi, ngiikadilu kampanda, dîyi kampanda, cyambiibwa kacya ku cibangidilu, nanku wâkenda Nende pa buloba apa, wâkayiikila Nende pa buloba, wâkakènga Nende pa buloba, wâkafwà Nende ku Kalvariyo, ne wâkabiïka Nende ku lufu; ne mpindyewu udi musombé mu myaba ya mu Dyulu mu Kilisto Yesu, ubwela Nende mu bwobumwe (Dîyi) padiDi didiisha musuuka webe apu, ne: “Muntu neikale ne mwoyi ku Dîyi dyônsò didi dipatuka.”

¹⁷³ Kî ndîyi dya ba-Méthodistes, dîyi dya ba-Baptistes to; vulukaayi ne, pavwaku kushaala kantu mu mulambu, kavwa ne cya kwoshiibwa kumpala kwa dinda, bwalu maalaba ncikwabo cikondo cya ekeleesiya. Ncya bushuwa anyi? Ekesoode, nCilelala. Cimfwanyi, cifwanyikijilu cya Mulambu awu.

¹⁷⁴ Ciibi. Wakamba ne: “Nêngënzè mwaba umwepele. Kanwikadi... Kanwikadi nuNkuukwila mu ciibi kana cyônsò cîNdì munupeeshe to; kadi kudi Ciibi cimwepele, ne mu cyôcì Ciibi aci ki mûNgàâtèèkà Dînà Dyanyi.” Nenku mu mwaba udi Mukalenge uteeka Dînà Dyende awu, ki mwaba wikala Mukalenge mwa kwakidila mulambu webe. Twêtù tukaadi benze biibi bya mishindu yônsò naka, kadi Nzambi mmwenze Ciibi. Nzambi mmwenze Ciibi, ne ciine Ciibi aci civwa... Yone Munsantu ku nshapita wa 10, Yesu wakamba ne: “Mêmè ki ciine Ciibi aci.”

¹⁷⁵ Nzambi mmuteeke Dînà Dyende mu Yesu. Nudi nwitabuuja aci anyi? Yêyè nguvwa Mwânà wa Nzambi. Mwânà wa balume yônsò ewu udi ulwa mu dînà dya tatwèndè. Yêyè wakamba ne: “Ndi mulwe mu Dînà dya Taatù Wanyi, nwêñù kanwena nuNgaakidila to.” Mêmè ndi mulwe mu dînà dya tatwanyì, wêwè udi mulwe mu dînà dya tatwèbè. Yesu wakalwa mu Dînà dya Tatw’Èndè, pa nanku Dînà dya Tatw’Èndè’s n’Yesu; mmwômô menemene’s, bwalu Yêyè wakalwa mu Dînà dya Tatw’Èndè.

¹⁷⁶ “Kadi nwêñù kanwena nuNgaakidila to. Mukwabo yêyè nealwe, bwa awu kaayi nenumwakidile.” Nwêñù nenwangate mangumba enu ne nenutungunuke naawu. Ndaayi nwêñù anu

kumpala, Bible mmwambe ne: “Bôbò baakajuudiibwa mbwa kuujabo kaaba aka. Bampofo, butaka, kadi kabayi bacimanye to.” Ekeleesiya, ntendeleelu, kaa, baa difwana dya Nzambi baa dikema, bya mwomumwe anu muvwa Kaayina amu; wenza mulambu, wenza kantu ne kantu anu kaa mwomumwe ne kààkenzà Abele. Kadi ku dibuulula nkawakabuuludiibwabi kudiye ne mushìngà awu uvwa ncikampanda, kaciyi bimuma bya mu mpàta ne cintu kampanda cyûdì wenza ne cyanza cyebe to.

¹⁷⁷ Mwena kwitabuuja udi mwa kumona Dîyì divwijiibwe mubidi; bakwabo bôbò kabeenä mwa kucimonaku to.

¹⁷⁸ Beena Izaleela bônsò abu, paanyima paa bamane kumona Môsâ mwenze ciine aci ne mubafikishe ku nsangilu munene awu, kuvwaye ne cya kwenzekela aku, muntu ne muntu wa kudibo wakambaye ne: “Netuye ne Baalama, bwalu tudi twela meeji ne Docteur Baalama mmubinge. Yéyè mmutambe kwikalà ne meeji matwe, mmutambe kulonga kalaasa, ne bikwabo byônsò, pa nanku butudi twêtù naabu mbwa kucyangata’s.”

¹⁷⁹ Kadi Nzambi kaakabafwilaku luse to, Wakababutwila anu mwaba awu mu cipeela amu. Ne Yesu Yéyè mwine, wakamba ne: “Kabaadyakulwaku to, kakwena nansha umwe wa kudibo udi musungidiibwe to.” Yesu wakamba . . .

¹⁸⁰ Bavva bôbò bamba ne: “Baataatù beetu baakadya manà mu cipeela munda mwa bidimu makumi anaayi.”

¹⁸¹ Yéyè kwamba ne: “Bônsò muntu ne muntu mbafwe, batapuluke Cyendeleele ne Nzambi. Bônsò muntu ne muntu mbafwe.” Cya bushuwa’s! Bwalu baakateejea ntupakanyi. Pavwa Môsâ, mushindika kudi Nzambi, ne mulombodi bwa kubaleeja njila wa ku buloba bulaya, ne bôbò bakaavwa baye ne ntanta bule kampanda anu bilenga, kadi pashiishe kabaciyi baswe kutungunka nende to.

¹⁸² Mpindyewu, beena kwitabuuja bôbò badi mwa kuCimona, kadi beena bupidya kabeenä mwa kumonaku Cyôcì aci cishìndika to.

¹⁸³ Tangilaayi numone muvwa Kaayifa ne difwana dya Nzambi. Tangilaayi numone baakwidi bônsò abu muvwabo ne difwana dya Nzambi. Kadi Yesu wakakudimuka, kwamba ne: “Nwêñù nudi baa tatwénù dyabulu, ne byenzedi byende ki binwenza.”

¹⁸⁴ Kadi kuvwa ndambu wa beena kwitabuuja basòmbe kaaba aku. Nudiku nwela meeji ne bayidi abu bavva bafwanyine kwikalà bumvwe paakamba Yesu ne: “Mêmè ne Taatù Wanyi tudi umwe” apu anyi? Bôbò kabavwa bafwanyine kwikalà baCyümvwije to. PaakambaYe ne: “Nwêñù kanuyi badye mubidi wa Mwânà wa muntu, kanuyi banwe Mashi Ende to, kanwena ne Mwoyi” apu, bavwaku mwa kuCyümvwija anyi? To. Kadi bôbò baakaCiitabuuja, bwalu baakamona Nzambi mushindikiibwe ne muvwijiiibwe mubidi.

¹⁸⁵ Yesu wakamba ne: “Mêmè Nciyi ngenza byenzedi bya Taatù Wanyi to, pa dîbà adi kanuNguitabuuji to. Kadi piikalabi ne Ndi ngenza byenzedi bya Taatù Wanyi, Dîyì dyàkambiibwà ne Mêmè nêngènzu adi, pa dîbà adi nwêñù... Panwikala kanuyi mwa kungiitabuuja Mêmè to, itabuuyaayi byenzedi bîNdì ngenza abi, bwa nwamona mwa kusungidiibwa.” Nwamonu anyi? Yesu wakamba ne: “Mikooko Yanyi mmimanye Dîyì Dyanyi. Mmimanye Dîyì Dyanyi, yidi yiDimona padiDi dishindikiibwe bwa cikondo aci.”

¹⁸⁶ “Ee, Kaayifa’s uvwa pende anu mumanye Dîyì!” Kadi kadiyi Dîyì dya cikondo *aci* to. Yêyè uvwa ne dîyì dya civwa Bafaalesa bamupaye munda, kadi kadiyi Dîyì dishindika dya dîbà adi to.

¹⁸⁷ “Yôyì mmimanye Dîyì Dyanyi, mmimanye cimanyinu Cyanyi, mmimanye bwalu Bwanyi bwa kukema.” Mmunyi mpindyewu, bwa...

¹⁸⁸ Kaa, twänjì twalukilaayibi ku cyena-bwalu cyetu tûng, bwalu yâbûngì ya ku Mifundu eyi neyiikale anu mwa kutupicila twêtù katuyi benze nanku, bwalu bidi bikengela bwa mêmè kujikija mu ndambu wa tusunsa tûdì tûlondà etu nansha bishi, bwalu netwikale dîbà dikumi jaajaaja mu ndambu wa tusunsa emu. Mêmè ndi muMunange.

¹⁸⁹ Balunda baanyi, nwêñù badi bapweke nwenda nulonda kajila kaka ne beeble mulambu awu katanci kakese aka abu; nwêñù badi bapeeshe bânà baanyi byakudya, badi babavwadike bilâmbà abu; nwêñù bàkaadi beeleele mfranga yenu (yinudi bapete ne lutatu ayi) mu dilongo dya disangishila milambu, nudi bamnye kuyaayayi anyi? Yidi yinkwacisha bwa kuya dyamwamwa dya mbû kudi bampangaanu batu kacya kabayiku bumywe kantu nansha kamwe pa bidi bitangila Nzambi abu. Ki cîndi ngenza naayi ncyôci aci, dyeya dyônsò, Nzambi ngudi Mulumbulwishi wanyi. Mbôbò aba bamwe baa ku baanyi... muntu nyêyè ewu musòmbe kaaba aka mpindyewu mene utu mu—mu cibucilu cya ekeleesiya wanyi. Ntu mpeta ndola lukama ku lumingu, ne miine ayi ki yônsò; yìdì yîshâàlakù yiyaaya ku dyenza dya masangisha a dyamwamwa dya mbû kudibo bôbò kabayi mwa kufika to.

¹⁹⁰ Ekeleesiya kí mmiswe kungaakidila mêmè to. Kí mminswe to. To. Aci’s ncyá bushuwa! Patudi twakulangana apa badi bántwà ménà ne: “Yêyè udi...” Badi bamba ne: “Yêyè mmwena ‘Yesu Nkaayende,’ anyi udi cintu kampanda cya mushindu awu, anyi mwabuludyanganyi kampanda, mukoleshi wa maalu, ne byônsò bya mushindu awu abi, Izabela ka—kampanda.” Ne mêmè—mêmè’s abi kabyena binkemesha to, s’baakabiikila Mukalenge wanyi ne, “Izabela,” ne baakaMutwa ménà ne... kí ny’Izabela to, kadi “Beelezebula.” BaakaMutwa ménà ônsò a mabi awu. “Piikalabo babiikile Mfumu mwena nzubu ne,

‘Beelezebulà,’ mmunyì mwatambabo kubiikila bayiidi Bende?” Pa nanku aci kacyena ne cidici cishintulula to.

¹⁹¹ Nansha nwènù biine abu, ku dikwacisha dya Nzambi, nudiku peenu nwela meeji ne mêmè ewu ndi mufwanyine kwimana mwab’ewu, mwena lubombo munene, ne kunwambila cintu kampanda...? Anyi, ncyénàku mufwanyine kuditeeka mu njila wa cintu aci bu mêmè mwa kwela meeji ne ncyà kudi Nzambi anyi?

¹⁹² Kadi mêmè mununange ne mumanye cidi Bulelela... Kacya nukaadiku bangumvwe mwambe cintu kampanda mu Dînà dya Mukalenge cidi kaciyi cyenzeke anyi? To. Ndi nkunka mutnu kana yônsò. Bintu binunu ne binunu bikaadi byambiibwe, byônsò mbyenzeke. Nudiku bavuluke musangu wàkabiìkidiishàbo Samwele awu, ngeela meeji ne uvwa ngwôwù awu, nenku kwambaye...? Izaleea uvwa muswe kudivwija muvwa matunga makwabo ônsò awu. Ki kunuyaaya kwobeka nwènù beena Mpenta aba. Nudi baswe kwenza maalu mudi bantu bakwabo bônsò benza. Nwènù kanwena bantu baa mushindu awu to. Disakaayi kule ne cyôci aci. Ekeleesiya ya minene ne bintu bya binene bilenga, Éyi mwaneetu, kwenjiku nanku to. Tudi tuyaisha ne dilwa dya Mukalenge dikaadi pabwípi, tuyaayi mu madimi a bwambi mwamwa tukambile bampangaanu. Nwamonu’s, enzaku cintu kampanda pa bwalu abu.

¹⁹³ Kadi, nudi numona’s, Samwele kwambaye ne: “Kacyakacya musangu nansha umwe nkaadiku mêmè ewu munwângâte mfranga yenu bwa mêmè kudya anyi?”

¹⁹⁴ Bôbô ne: “To, Samwele, kacya kutuku mwenze aci to.”

¹⁹⁵ Yéyè ne: “Kacyakacya nkaadiku munwâmbile nî ncinyi nî ncinyi mu Dînà dya Mukalenge cidi kaciyi cyenzeke anyi?”

¹⁹⁶ “Kaa, ncyà bushuwa, Samwele. Tudi twitabuuja ne wêwè udi muprefeta mutuma kudi Nzambi. Eyowa’s, mukalenge. Byônsò byûkaadi mwambambe bitu anu byenzeke, Samwele. Kadi nansha bishi cyôci aci ncitudi tukeba.” S’nudi bamone cyâkenzekà aci. Éyi mwaneetu, Mufundu awu’s mmutungunuke anu ne kwenzeka cyakabidi Wôwò mwine watwa kumpala watwa paanyima mu Mifundu, bwalu mmushindu wa Nzambi wa dicyenza, nudi numona’s. Nudi numona’s, nudi nukapicila mu bikondo bya mushindu ewu abi.

¹⁹⁷ Tuyaayi lukasalukasa ku cyena-bwalu cyetu aci. Mpindyewu, mêmè mu cikondo cyônsò cîndì mwangate eci, nyewu nciyi anu mwanji kufika nansha ku dikalenga dya cyena-bwalu cyanyi to.

¹⁹⁸ Cidi pa mwoyi wanyi’s! Ndi mununange! Kanubutuku ne baa pa buloba to! Pawikala wa pa buloba, neubutuke ne baa pa buloba. Pawikala wa Nzambi, neuye Nende mu dibiika dya ku lufu. Pa nanku shintulula ngiikadilu webe dilolo edi uumuke

ku dinanga dya maalu a pa buloba ne bintu bya pa buloba, ne twitatabaayi yônsò eyi ne bikwabo, nenku utangile buludi ku Kalvariyo ku Mulambu webe; katwilangana Nende kwôkò aku pa bishimikidi abi, bwalu ki mwaba umwepele wikala Yeku mwa kutwilangana neeve ngwôwò awu. Yêyè . . .

¹⁹⁹ Ba-Méthodistes badi bamba ne: “Cidi mu wetu ekeleesiya”; ba-Baptistes bamba, ne beena Mpenta, ne *bikampanda*, ne ba-Presbytériens, ne *bikansanga*.

²⁰⁰ Kadi Yêyè mmwambe ne: “Nêntwilanganè naabo mu mwaba umwepele, Mwaba wûndì Mêmè nteeka Dînà Dyanyi awu.” Mbwena kwamba ne mu Yesu Kilisto. Ki mudi Nzambi muteeke Dînà Dyende mmwômò amu. Ki Mwaba umwepele watwilangana Ye neeve ngwôwò awu; udi n’Kilisto, udi n’Dîyì, umwèumwè awu makeelela . . . Mmuye wenda ukola kuumukila ku makàsà, ku bibelu. Kadi mpindyewu ukaadi mu mutu, mwikale pabwîpi ne kuya; umwenesha Mukaji musela mu kaabujima kaa cipidi, umwèumwè mu mushindu wa Mubaki.

²⁰¹ Mpindyewu tuyaaayaaku ku cyena-bwalu cyetu, ne lukasa lwônsô, bwa tusunsa tutwe ku dikumi, ne pashiishe netujikije. Mpindyewu cyena-bwalu cyetu, tudi bônsô baswe kucitangila. Cikaavwaku cyenzeke kabidi, bu mudi cyena-bwalu cyetu cileeja, bu mukaadici cyenzeke pa ciibidilu.

²⁰² Nzambi uvwa mutume muprefeta Wende bu muvwa Ye . . . Dîyì divwa dilaye ku Maalaki 3 ne: “Nêntumè musanjeela kumpala Kwanyi,” bwa kudyanjidila dilwa Dyende.

²⁰³ Mpindyewu nwêñù baswe kushindika aci, bwa kucijaadika, Maataayi, nshapita wa 11, udi ushindika cintu cimwecimwe aci. Paakalwa bayiidi baa Yone ne kumonabo Yesu, baakamba ne: “Yone udi mu buloko.” Bôbò ne: “Tudi balwe bwa kuKukonka nî nyêyè . . .”

²⁰⁴ Disù dya mukanku dya Yone dikaavwa dijibale. Ne yêyè ukaavwa mu buloko, ûkaavwa pabwîpi ne kufwa; yêyè kwamba ne: “Nda kaMukonkaayi.”

²⁰⁵ Nwamonu’s, Yone wakamba ne: “Kaa, cipeepudi Cyende cidi mu cyanza Cyende, Yêyè neakezule mu cishiipwidi Cyende cyônsò nkòòng.” Yêyè uvwa mwele meeji ne Bukalenge bwa bidimu cinunu buvwa bumba bubanga anu mwaba awu, ûvwa mwele meeji ne lutete lukaavwa lubobe. Kadi bivwa bikengela kufwalu ne kubwelalu mu cikolakola, kubànda cyakabidi bwa kwenzalu Mukaji musela mulelela. Pa nanku kwambaye ne: “Yêyè neakungwije blé Wende mu diyeeba, ne Neôshè, ne kypy.” Tangilaayi numone awu—awu mudyanjididi wa Kilisto mu cikondo aci, cyakambaye ne necyenzeke aci. “Lutete . . .”

²⁰⁶ Ne ndi ntékemena ne kanwena balaale tulu to. Lutete alu ludi apa! Nelukungwijibwe mu diyeeba. Luvwa m’Mukaji musela awu, citupa cyalu aci. Kadi cyakamba Ye ne necyenzekele cikolakola ncinganyi? Necyoshiibwe ne kypy kadibo kabayiku

mwa kujima to. Kebanganaayi ne lupandu mpindyewu panucidi ne mushindu apa. Ikala lutete, kwikadi cikolakola to. Wamonu anyi? Bwela mu Mwoyi, kî mmwenekelu mufwe wa kale awu to; bwela mu Mwoyi wa Kilisto, Dîyì dimweneshiibwe, didi... dimweneshiibwe ne dishindika ne didi nanku. Eci ki—eci ki cikondo cya dikungwija, katumba kaa dinowa naaku kalwalwa. Mbîmpè ubwele mu lutete, bwalu cizubu necishiyiibwe paanyima.

²⁰⁷ Mpindyewu, tudi tusangana ne cyakenzeka, Yesu... Bwa kujikija mîyì ámvwà nteela kaaba aka awu, Maataayi 11. Yéyè u-... kaakapeesha Yone... Yéyè kwamba ne: "Mpindyewu, indilaayi kakese, Nêmpeeshè Yone mukanda wa mushindu wa kuditwalaye bilenga wa ne, *Mwena Kvitabuuja Mu Bùlokò*." Bwâlâ! Yéyè wakamba ne: "Imanaayi anu mwab'awu kadi numone cidi cyènzekà. Nwalukile nukaleeje Yone cidi cyènzekà eci: balema badi bendela kuulu, mpofo yidi yimona, bafwe badi babiishiibwa, ne Evanjeeliyo udi uyiishiibwa kudi bapele." Anu menemene cyakamba muprofeta ne necyenzeke aci. "Nenku baa disanka nnwénù bândì Mêmè ncîyi cilendwishi to."

²⁰⁸ Nenku paakabanga bayiidi bende kuya luseke lukwabo lwa kakuna, ki Yéyè kukudimuka, kwamba ne: "Cinuvwa baye kamona ncinyi panuvwa baye kamona Yone apu? Nuvwa baye kamona muntu muvrale bivwali binefuke, ne bikwabo, nkoo ci wa nkolo, ne byônsò ebi, binudi bamanye abi anyi?" Yéyè ne: "Abu batu mu nzubu ya makalenge ya bamfumu, batu batwa bânà baa mu maboko mishiku ne bajiika bafwe, kayi mumanye mwa kukwata mwele wa mvita wa nseke ibidi to." Nwamonu anyi? Yéyè ne: "Cinuvwa baye kamona ncinyi? Di-dilenge didibo bàkùpa eku ne eku kudi lupeepele kana lwônsò anyi?" ("Lwâ kuneeku, Yone, mêmè nênkupèshè mfranga mipite apu bu wêwè mwa kulwa kuneeku.") "Ee, Nzambi abeneshiibwe, mêmè ncicyena kabidi Méthodiste to, nêngììkalè mwena Mpenta, nêngììkalè Presbytérien, nêngììkalè *cikampanda*, *cikansanga*, piikalaku anu mfranga mipite apu.") Yéyè ne: "Kanuvwaku baye kamona dilenge didibo bàkùpa eku ne eku kudi lupeepele to." Yéyè ne: "Cinuvwa baye kamona kuntwaku ncinyi, muprofeta anyi?" Yéyè ne: "Eyowa, kabidi mutambe ne muprofeta."

²⁰⁹ Yone ucivwa ufuminaku ku dipa Yesu buneeme bwa butambe kushaadila bwa kacyakacya. Mumanya ne bivwa bikengela kulwabi mushindu awu. ÜMwela alu lukonko's paanyima paa yéyè mumane kuMuleeja kudi bantu ne mumone Cimanyinu aci kumutu Kwende, mwambe ne: "Ewu ki Maasiya awu," pashiishe kulwa kadi kwela lukonko ne: "Wêwè ki Yéyè awu anyi, anyi bikenglela twindile mukwabo?"

²¹⁰ Kadi, tangilaayi, bu muvwa Yesu mumanye ciine aci, Yéyè kukudimuka e kumupa buneeme, kwamba ne: "Cinuvwa baye kamona ncinyi, dilenge didibo bàkùpa eku ne eku kudi lupeepele anyi?" Yéyè ne: "Kacya kakutuku kwanji kwikala muntu nansha

umwe mulela kudi mukaji mwikale munene mudi Yone to, too ne ku leelu ewu." Ncya bushuwa's! Kaalumbandi kaayi kaa kwela muntu awu's we!

²¹¹ Kadi, nudi numona's, s'ki bwalu mbwôbù abu, ciprofeta civwa cyûle anu kumpala kwabo mene, ne mudyanjididi uvwa ne cya kulwa awu, anu cyakamba Maalaki menemene. Mpindyewu, awu m'Maalaki 3, kî m'Maalaki 4 to.

²¹² Yone Mubatiji uvwa Maalaki 3, ki cyakamba Yesu. PaakaMwelabo lukonko, bamba ne: "Bwa cinyi bafundi badi bamba ne . . ."

Yéyè wakamba ne: "Yéyè ukaadi mumane kulwa. Mbenze cyakambabo."

²¹³ Kadi, vulukaayi ne, Maalaki 4, dyakamwe paanyima paa muprofeta wa Maalaki 4, dilwa diinâyì dya Yone Mubatiji mu, anyi, dya . . . dya Eliya, dilwa diitânù nedikale dya ba mu Bwakabuulwibwa babidi, bantemu abu, paalwaye bwa bashaadile baa beena Yuda. Kadi Nzambi mmukwate mudimu ne Nyuma umwèumwè awu misangu itaanu: ngâsà, Y-e-s-u, yônsò ayi yivwa n'Yesu dîbà dyônsò; d-i-i-t-a-b-u-u-j-a, n-g-â-s-à, ne bikwabo. Nudi numona anyi? Nomba ewu itaanu nnomba wa ngâsà ne Yéyè mmukwate nende mudimu. Kaakukwata mudimu anu ne isatu to, kaakukwata mudimu anu ne ibidi, isatu, inaayi to. Misangu itanu nyidiYe ukwata Nende mudimu.

²¹⁴ Mpindyewu, monaayi lukasalukasa bwa mpindyewu, patukaadi tujikija apa. Yéyè wakamba ne: "Yéyè ewu ngwâkambabò bwa bwalu bwende ne: 'Ndi ntuma musanjeela Wanyi kumpala Kwanyi.'"

²¹⁵ Kadi mu Maalaki 4, dyakamwe paanyima paa *awu* muprofeta mumane kwamba ciprofeta, buloba bujima budi ne cya kwoshiibwa, ne baakane bendela pa butu bwa beena lwonji. Nwamonu anyi? Mmwômò menemene! Nwamonu's, ki ciprofeta cya Maalaki 4 ncyôcì aci.

²¹⁶ Kabidi monaayi mu Luuka 17, mwaba udiYe mwambe ne: "Mu matuku a ndekeelu, nebilwe cyakabidi bu Sodoma ne Gomola." Tukaadi bacipete anyi? Tukaadi bapete cyakabidi Sodoma ne Gomola anyi? Matunga ônsò mu kaabujima, tangilaayi cintu aci. Tangilaayi cidiye ufuma ku dyamba bwa Angleterre, cintu cyônsò mu kaabujima's ncinyanguke. Nansha byakudya biine mbinyanguke. Kabidi tangilaayi kuneeku cidi maalu a mamanya . . . Nudi numona mu cikandakanda cya *Reader's Digest*, ngeela meeji civwa nngondo washaadi ewu, mbambe ne: "Bânà batekete baa balume ne baa bakaji bakaadi bapicila mu cikondo cya bukulumpe pankaci paa bidimu makumi abidi ne makumi abidi ne bitaanu." Ntu ntwilangana naabo mu disangisha, bânà baa bakaji batekete bakaadi mu cikondo cya kabaciyi baya ku mashi to, baa bidimu makumi abidi, anyi makumi abidi ne bibidi, bakaadi mu cikondo cya

kabaciyi bayo ku mashi to. Mbifumine ku cinyi biine abi? Dinyanguka, disopakaja dya mamiinu. Cyōci aci menemene ncidi cofile dinyanguka, cintu cyōnsò mu kaabujima ncinyange mubidi. Twêtù katucyena cīngà cintu to anu mushiki wa—wa... byenze mudi muci wa ku mamiinu masopakaja's.

²¹⁷ Angata muci wa ku mamiinu masopakaja uwuteeka pambelu pààpa, kîshì kônso nekanyeemene anu kudiwu aku. Kadi muci mushuwashuwale, wa ku cibangidilu awu, kîshì nekawunyeeme, kakeena mwa kutwala bwa kushaalapu to. Nenku ki lutatu ludi naalu ekeleesiya ndwòlù alu, twêtù mbadi bamuvwije wa mamiinu masopakaja.

²¹⁸ Ki lutatu ludi naalu kabalu kaa kale kaa Pearry Green ndwòlù alu, nkajuuke e kwela nsongaalume awu pansi dituku adi, kôkò's kadi anu kabalu keetu kaa kale kaa lubilu aka. Nwamonu anyi? Cintu cimwepele cidiku kôkò aku, kadi... Kadi menemene anu mudi kampundu amu, kadi—kadi... kampundu kakatu kamanye ne papa waku anyi maman waku nganyi to, kakeena ne cidiku kamanye to; kôkò kadi cyabibidi cimwe kampundu ne cyabibidi cimwe kabalu, ne cyabibidi *eci* ne mpunda; kî nkamanye ne kôkò kiine nkanganyi to... Kwêñàku mufwanyine... Nkafwanyine kwindila mwoyi waku mujima anu bwa kufika ku dikutwa dya bikono. Ncya bushuwa's! Ùdi mwa kukabiikila, wamba ne: "Lwâku apa, kalumyana. Lwâku apa, kalumyana." Nekashaale anu kacya kajuula maci aku awu muulu, ne: "Howu! Howu! Howu!" Nwamonu anyi?

²¹⁹ Byenze mudi bamwe baa ku aba badi bamba ne: "Matuku a bishima akaadi mamane kupita, Howu! Howu! Howu!" baa cipanda-nseke aba, paabu ne mbidimba bya ekeleesiya ne mbeena Kilisto. Ncyeña ngamba nanku bu bilele ngeela to, kadi m'Bulelala. Kadi, mwaneetu, wa mushuwashuwale wa diminiu dya cya bushuwa, mmumanye ne tatwèndè uvwa nkampanda, mamwèndè uvwa nkansanga, kakwèndè mulume uvwa nkankenga, kakwèndè mukaji uvwa nkansanga, wêwè udi mwa kumulongeshaku cintu kampanda, yêyè ngwa kalolo.

²²⁰ Ne mwena Kilisto mushuwashuwale udi mulela kudi Nyuma Mwîmpè ne mûle tente ne bucole bwa Nzambi ne Dîyi, mmumanye ne tatwèndè nkampanda, ne mamwèndè nkansanga, kakwèndè mulume uvwa nkankenga, kakwèndè mukaji uvwa nkansanga, mmumanye byônsò pa bidi bitangila Cyōci aci. Udi mwa kumulongeshaku cintu kampanda.

²²¹ Kadi wa cipanda-nseke yêyè, bôbô abu ki badi balwe mu maekeleesiya. Baa mamiinu masopakaja pankaci paa maalu a pa buloba ne malongolodi a ntendeleelu, nenku biikale beelamu ndambu wa Dîyi *apa*, ndambu wa Dîyi *pààpa*, mukumbane anu bwa kuseeswihangana. S'ncya bushuwa. Paudi umona Dîyi dya Nzambi dilelala diikale dimweneshiibwe mwakenzabo kudi

Kaayifa ne bakwabo amu, badi baDyepuka, kî mbamanye to. Baa mamiinu masopakaja!

²²² Mpindyewu tudi tusangana ne, mu mwine mukenji ewu, Yeshaayi 40.3 kabidi wakashindika Yone. Wakamba ne: “Dîyì dya kampanda, muprefeta, udi wela lubila mu cipeela ne: ‘Longololaayi njila wa Mukalenge, lulamijaayi kajila Kende.’” Ekeleeziya kavwa umwitabuuja to, bwalu kavwa wa mu cisumbu cyabo bôbò to. Muprefeta awu uvwa mukolele mu cipeela, ulwa kayi mumanye mutu nansha umwepele to. Yéyè uvwa pambidi pende ne Nyuma umwèumwè uvwa nende Eliya awu: ùvwa mutu wa mu cipeela, ùvwa mukine bânà bakaji baa nsòmbelu wa masandi.

²²³ Vulukaayi mushindu uvwa Eliya... Cyakenza ne bamukose mutu ncinyi? S’ùvwa ny’Izabela awu. Izabela nguvwa mukebi wa lufu lwende. Kumunyeemeshaci e kuyaye mu cipeela.

²²⁴ Yone Mubatiji, mukwabo munangi wa cipeela, cilembi, mutu wa mwitu. Tangilaayi wendè... Ùvwa mufwanyîne... kavwaku yéyè ne kalaasa kalonga to. Tangilaayi cyende—cyende cyena-bwalu, kavwa bu mwena teoloji to. Wakamba ne: “Nwêñù lukongo lwa nyoka ya ntookka!” Cintu cidi citambe kwikalala cya bukooya cyûdî mwa kusangana mu cipeela, maalu a mwinshimwinshi, civwa—civwa nnyoka. Nenku kubiikilaye baakwidi abu ne: “Nwêñù lukongo lwa nyoka ya ntookka! Nganyi wanudimwiji bwa kunyeema cijji cikole cîlwalwà? Kanubangi kwamba ne: ‘Twêtù tudi beena cikampanda, ne tudi ne cikansanga anyi cikankenga’ to, bwalu nya’ nnwambila, Nzambi mmukumbane ku mabwe aa,” cipeela’s. Kabidi ne: “Cisuuyi” (civwaye ukwata naaci mudimu aci’s) “nciteekiibwe ku muji wa muci; ne muci wônsò udi kawuyi ukwama mamuma mîmpé awu, udi uupudiibwa ne wediibwa mu kapya.” Amen.

²²⁵ Yéyè uvwa muysihi wa mu bufuki. Muntu munene wa Nzambi, wâkashâàla ne mwoyi citupa cîpì, kadi bulelela yéyè wakalakusha kapya pa buloba bujima. Wakashiya cikuma pa lukongo alu munda mwa ngondo isambombo ya mudimu wende wa bwambi ayi. Nzambi wakamukolesha munda mwa bidimu makumi asatu, bwa kupeta kudiye ngondo isambombo ayi. Kadi Nzambi udi wenza mu mushindu Wende Yéyè mwine, Yéyè ngudi mumanye ne dinowa Dyende didi cinyi.

²²⁶ Nenku tudi tusangana mpindyewu ne cyôcì eci menemene ki civwa cyenzeke. Kabaakamwitabuuja to, bwalu kavwa wa ku bôbò to. Kabaakamwitabuuja to. Baakenza bu pa ciibidilu ne, kabaakaCimona to. Kabaakiitabuuja Diyi dya Nzambi dya Maalaki 3 to, patupu nunku mbamone bitooke tòò, ku dileeta ne ku dileeta ne, yéyè ewu nguvwa mudyanjididi awu. Kabavwa bapete muprefeta to kukaavwa bidimu nkama inaayi, kadi umwe nyéyè ewu ujuuka mu cyalu dyakamwe. Nwamonu anyi? Kadi bantu, beena kwitabuuja, baakiitabuuja ne ki civwaye.

Nwamonu's, bôbò kabaaka Ciitabuujaku to. Kabaakiitabuujaku to, bwalu paakamonabo dileeta dishindikiibwa anu menemene, civwa Ye mwambe ne Yéyè neénzè aci, ne bikwabo byônsò, ne baCimone cishindikiibwe bitooke tòò paakalwa Dîyì kubwela buludi mu mâyi kudi muprofeta. Ki bôbò bawwa biimane baba.

²²⁷ Kudi bààbûngì batu bakokangana pa Mufundu awu pa bidi bitangila Yone. Nwamonu's, Yone wakamba ne: "Mêmè ngudi ukengela bwa kubatijiibwa kûdì Wêwè, kadi mûkaadi Wêwè ulwa kûndì mbwa cinyi?"

²²⁸ Yesu kwambaye ne: "Twala bwa biikale nanku, bwalu mushindu ewu...kadi mushindu ewu mbujitu butwòmekela twêtù, bidi ne mushinga kutudi (mbitwòmekela) bwa twêtù kukumbaja. Eyo, Yone, wêwè bu muprofeta, s'udi mumanye ne bidi bikengela bwa mulambu usukudiibwe kumpala kwa wôwò kufidiibwa. Nenku Mêmè ki mwine Mulambu awu, ne wêwè udi muprofeta ne udi mumanye aci." Ki kuMutwalaye ne kuMubatiizaye. Nwamonu anyi? Ne yéyè uvwa mumanye ne ki muvwabi.

²²⁹ Tangilaayi, baakamuseka, baakamubiikila ne "mukoleshi wa maalu wa cisuku, mwedi wa mbila, kayi mulonge kalaasa," bu mutubi amu, muprofeta uvwa udyànjidila dilwa dya kumpala dya Yesu awu.

²³⁰ Ncyéna ngamba ne badi...bôbò kabéena ne ditentula dimwedimwe adi leelu ewu dya—dya cishuwashuwale to. Badi naadi, kakuyi mpata to. Kadi, vulukaayi ne, mwaba wûdì umona ndola wa mafi kudi ne cya kwikalà ndola wa cya bushuwa kudibo benzele yéyè awu. Mwaba wûdì umona muntu utentula diikala mwena Kilisto, kudi ne cya kwikalà mwena Kilisto wa cya bushuwa mwaba kampanda; bwalu, bu kabiyi nanku to, awu uvwa mwa kwikalà wa cibangidilu. Bidi bikengela ukafike ku cya cibangidilu aci. Kadi anji kenketa cya ku kumpala aci, kadi umone ní cya ku cibangidilu aci cidi cikumbanangana anu menemene ne mulayi. Piikalaci cikumbanangana ne mulayi, pa dîbà adi ùCítàbùùjé: mulayi wa cikondo aci.

²³¹ Pa dîbà adi ciprofeta cya Yone cyakashindikiibwa mu bulongame bwa Nzambi. Dîyì dyakalwa kudi muprofeta ne dyakamushindika bulelela bu mwine muntu awu.

²³² Kabidi Yesu wakalwa mu...bishiilangane ne dyumvwa dyabo bôbò dya ciine ciprofeta aci. Kabavwa bôbò baCiyumvwa mushindu awu to. (Mpindyewu, tukaadi tupweka batangile kundekeelu mpindyewu.) Kadi bilondeshile Dîyi dya muprofeta, Dyôdì dyàkuula ku dileeta ne ku dileeta. Ciprofeta ncyûle; kadi mushindu uvwabo bôbò badyelela meeji ne ki uvwaCi mwa kwikalà, kaCivwa mushindu awu to. Mpindyewu, mmushindu kaayi uvwabo mwa kwikalà bumvwe ne bamanye cîvwà cya bushuwa ne cîvwà cya mashimi? Bwa kumona ní civwa cishindika kudi Nzambi, ní n'Nzambi uvwa umuvwija

civwaYe mwambe. Kukaavwa kujuuke ba-Yesu baa mashimi, ne balombole muntu, musùmbà wa...nkama inaayi, baye naabo mu cipeela ne bikwabo; kadi yéyè kaakajaadikaku bwa kudijaalamija yéyè mwine mu Dîyì to, nwamonu's, muvwa Yéyè mwambe amu.

²³³ Yesu, paakalwaYe, Ùvwa ne cya kwikala Muprofeta. Aci ncyá bushuwa! Ne leelu ewu, kumpala kwa Yesu kulwaye cyakabidi, bidi bikengela bwa dimweneshiibwa mu kaabujima dya Mupersona wa Yesu Kilisto dimweneshiibwe mu mubidi. Elaayibi meeji ku bwalu abu! Yesu wakamba ne: “Anu mwakadibi mu matuku a Sodoma, ki mwikalabi kabidi ku dilwa dya Mwânà wa muntu, piikala Mwânà wa muntu munkaci mwa kubuuludiibwa.” *Mubuuludiibwe* ncinyi? “Muvunguludiibwe, mumanyishiibwe.” Munsokontu ukaavwa umane kwediibwa patooke, mubuuludiibwe. Mu dituku diikala Mwânà wa muntu mwa kubuuludiibwa, buloba nebwikale mu ngiikadilu wa Sodoma. S’tukaadi nende, kí mmwômò anyi? Eyowa's! Mbanganyi badi biitabuuja nanku? Bukaadi mu ngiikadilu wa Sodoma. Aci ncyá bushuwa menemene! Tangilaayi mwaba ukaadibu busanganyiibwa, patudi twakulangana apa.

²³⁴ Vulukaayi ne, kutu misangu yônsò anu bisumbu bisatu bya bantu mu musùmbà kana wônsò wa bantu unudi nukungwija awu, badi, beena kwitabuuja baa budìngìbudìngì, beena bupidya, ne beena kwitabuuja. Tudi naabo mu cisumbu ne cisumbu cyônsò. Bakaadi babapetepete dìbà dyônsò edi. Kuvwa beena Sodoma, kuvwa—kuvwa beena Lota, ne kuvwa Abraham.

²³⁵ Beena Abraham bavva kasumbu kabiikila bwa kupatuka, yéyè kavwa mu Sodoma to anu kwine kwônsò aku. Mpindyewu tangilaayi numone wabo Mukenji! Bôbò bavva bindile mwânà mulaya, bamwindile kukaavwa bidimu. Nzambi ukaavwaku muleejeleje Abraham bimanyinu binene byàbûngì ne maalu a kukema, kadi apa Nzambi e kutuuluka Yéyè mwine bu muntu!

²³⁶ Wêwè udi wamba ne: “Awu's uvwa m'Mwanjelo.”

²³⁷ Abraham wakaMubiikila ne, “Mukalenge,” ne dileeta dinene M-u-k-a-l-e-n-g-e. Mubadi kana yônsò wa Bible mmumanye ne awu M-u-k-a-l-e-n-g-e ne dileeta dinene ng’Elohim. “Ku cibangidilu Nzambi,” Mukalenge Nzambi, Elohim, Ewu udi mukumbane mu byônsò. Abraham wakaMubiikila ne, “Mukalenge Nzambi, Elohim.”

²³⁸ Mpindyewu monaayi, kuvwa bantu babidi bààkapwekà mu Sodoma biikale ne mukenji, nenku bôbò kuyiisha beena Sodoma. Bôbò kabaakenzaku kaacishima nansha keetu kaa i aka to, anu kubafofomija; mudibi ne, diyiisha dya Evanjeeliyo ditu difofomija mwena bupidya anu cya bushuwa eci.

²³⁹ Kadi tangilaayi numone ne ncimanyinu cya mushindu kaayi cyakapetabo kudi kasumbu kaa Abraham!

²⁴⁰ Mpindyewu, twêtù tudi ne cya kwikala Dimiinu dya bukalenge dya Abraham, Izaka nguvwa dimiinu dya mubidi. Kadi Dimiinu dya diitabuuja, diitabuuja mu Dîyì dilaya, Dîyì *dilaya* (kaCinupiciku to) divwa n'Dimiinu dya bukalenge adi; ki divwa Dimiinu mene, diitabuuja dya Abraham. “Twêtù biikale bafwe mu Kilisto, tudi Dimiinu dya Abraham, bapyanyi pamwe nende bilondeshile mulayi.”

²⁴¹ Monaayi pavwa byônsò abi munkaci mwa kwenzeka apu, mwamwa mu Sodoma muvwa bambi babidi muntwamu biikale bayiisha mukenji munene.

²⁴² Kuvwa Kampanda musòmbe apa ne kasumbu kaa Abraham kavwa kakayi kakutakanangana ne cisumbu cìvwà mu cibanda mwamwa aci to. Mpindyewu tangilaayi numone Kampanda ewu uvwa mushaale ne kasumbu kaa Abraham awu, ne cimanyinu cya mushindu kaayi cyakabapaYe. Yéyè wakamba... Mpindyewu, vulukaayi ne, dînà dyende divwa Abram ndambu wa matuku kumpala kwa cyôcì aci; ne divwa S-a-r-r-a, kadiyi S-a-r-a-h (mwânà wa bakaji wa mfumu) to. Kadi Muntu ewu, ne nyima Wende mwela ku ntenta...

²⁴³ Bakaji musangu awu bavwa bashiilangane ne mukaadibu mpindyewu emu. Bikaadi bikengela bwa kwikalabo bapatuka bakabwelakana mu myanda ya baabayaabo ne bikwabo byônsò, nudi bamanye's. Kadi kabavwa bacyenza musangu awu to; bavwa bôbò bashaala basòmbèlè kumfundu.

²⁴⁴ Pa nanku bôbò...Pa nanku Mwanjelo awu musòmbe mwab'awu, Musanjeela awu, ki Yéyè kwamba ne: “Abraham, mukajeebe Sarah (S-a-r-a-h) wépi?” Mmunyi muvwaYe mwa kucimanya? Wakacimanya munyi?

²⁴⁵ Abraham ne: “Udi mu ntenta paanyima Peebe apu.”

²⁴⁶ Yéyè kwamba ne: “Nênnùmwènèkèlè mu cikondo cîMvwà munulaye aci. Nênnùmwènèkèlè.” Ki Sarah kwenzaye bu wadisekedi mundamunda.

²⁴⁷ Mwikale ne nyima Wende mwela ku ntenta, ki kwambaYe ne: “Sarah waseki bwa cinyi, wamba ne: ‘Biine bintu ebi nebyenzeke munyi?’” Bu ne kavwa munda mwa Abraham to, mukajende musela awu pa diine dîbà adi, nunku Nzambi's mmumushipe. Ki mutuvwa twêtù peetu bafwanyine kwikala leelu ewu ne bupidya bwetu bwônsò ebu, bu ne katuvwa munda mwa Kilisto to. Aci ncidi citukwata mwaba awu mene, nwamonu's. Kawwa mwa kwenzela Sarah bibi anyi kumwangata kayi wenzela Abraham bibi to. Nwamonu anyi?

²⁴⁸ Nanku vulukaayi ne, Yesu mmwambe ne: “Anu mwakadibi mu matuku a Sodoma, ki mwikalabi kabidi ku dilwa dya Mwânà wa muntu.” Tudi tumona, muntu yônsò udi witaba, ne buloba bukaadi mu ngiikadilu wa Sodoma. Mvwa mwangate cibejibeji cya ku Los Angeles mwab'ewu anu abidi adi pansi aa, cyamba, ngeela meeji ne cidi ne: “Dibakangana dya mulume ne mulume

ne dyâ mukaji ne mukaji ndilwe kuvulangana ne bya pa lukama makumi abidi anyi makumi asatu mu Los Angeles, ku cidimu ne ku cidimu diikale divulangana mu bûngî abu.” Cidi... Kaa, s’bidi byenza bwôwà’s! Mu bukalenge bwetu emu ne myaba yônsò, byônsò bikaadi anu binyanguke. Aci’s ncya bushuwa! Cintu cyônsò mu kaabujima, ndongolwelu yônsò mu kaabujima, ekeleesiya ne bikwabo byônsò bikaadi anu binyanguke. Cidi mu cikondo cya dinyanguka.

²⁴⁹ Mpindyewu ndi muswe kunukonkaku cintu kampanda nwénû beena teoloji, baa ku bânà beetu. Kî mbwena kwamba ne ndi ngamba bwa kukulwisha to, wêwè mwaneetu wa balume munanga; ndi mwaba ewu mbwa kukukwacisha, mwaneetu. Ndi mwaba ewu mbwa kwimanyina cidi Dîyi dya Nzambi dyamba ne ncya bushuwa, kukukwata wêwè ku cyanza kadi kupatula musumbà wa bantu ewu mu cintakanyi eci. Cya bushuwa’s!

²⁵⁰ Kadi tangilaayi kuneeku, kacya katutuku banji kupeta musanjeela mupweke mu Sodoma kwônsò eku uvwa mwikalé ne dînà dishiikila ne h-a-m to anu mpindyewu ewu. Tukaadi bapete Spurgeon, Wesley, Luther, ne bikwabo byônsò, kadi kacyapu musanjeela wa mumanyike buloba bujima mwikalé ne dînà dishiikila ne h-a-m, kwônsò eku. Aci’s ncya bushuwa! Nwamonu’s, G-r-a-h-a-m, maleeta asambombo, G-r-a-h-a-m, Billy Graham; mutangadiki mumanya bîmpè awu, mudimu munene wa Nzambi, muntu awu’s mmutumiibwe kudi Nzambi. Yéyè mmumanye dibingishiibwa adi ne mu kakanu, ne yéyè udi unyungisha naadi ditunga, nwamonu’s, mushindu awu. Kakwenaku...

²⁵¹ Tangilaayi Oral Roberts bwa dingumba dya beena Mpenta. Kacyakacya kukaadiku wa bu yéyè awu dîbà kaayi?

²⁵² Maleeta asambombo, kaàyi mwandamutekete to. Abraham udi A-b-r-a-h-a-m, mwandamutekete. Billy Graham udi G-r-a-h-a-m, asambombo.

²⁵³ Mpindyewu tangilaayi baamisanjeela aba. Tangilaayi cikondo citudi tusanganyiibwa, kacya kakutu kwanji kwikala cikondo bu nanku mu maalu malonda to. Tangilaayi bimanyinu bimwebimwe byakalayaYe ne nebipeeshiibwe kudi kasumbu ne kasumbu. Tangilaayi numone ne bakaadi penyi. Bimwebimwe abi, menemene, bilondeshile myaba, bateekiibwe anu mu bulongame. Bufuki, buloba, byônsò, biteekiibwe anu pa dîbà menemene.

²⁵⁴ Mpindyewu kaCinupiciku to, patucidi tulonda lukasalukasa citupa cikwabo cya Mufundu ewu apa. Lukasalukasa mpindyewu, bwalu nyawu nnulama ntanta mupitepite bule. Dibiikila... Tangilaayi kuneeku. Nenku bilondeshile muprofeta, wakalwa anu mu byôbi menemene bilondeshile Dîyi, anu pa dîbà menemene.

²⁵⁵ Mpindyewu tangilaayi cikondo citudi mpindyewu ne mwöyi. Katwena ne mwöyi mu cikondo menemene anu cya Sodoma aci anyi? Tangilaayi musanjeela uvwa mutùmina kasumbu kaa Abraham. Tangilaayi nomba ayi, maleeta, ne bûngì bwa maleeta a dyende dînà. Wêwè udi wamba ne: “Kakwena bwa nsongo bwine mu dînà to.” Muntu kakwambidiku aci to. Bwa cinyi Yéyè ushintulwile dînà dya Abram, kulwadi Abraham, dya Sarra kulwadi Sarah? Bwa cinyi Yéyè ushintulwile Simona kulwaye Peetelo, ne makwabo ônsò awu? Nwamonu anyi? Ncya bushuwa ne bwa nsongo budi anuku. Mmwômò menemene!

²⁵⁶ Ki bwa cinyi ndi ngamba ne, kudidingi wabiikilaku mwaneeye ne “Ricky,” anyi ne “Elvis,” anyi cintu kampanda to. *Elvis* mbwena kwamba ne “kampusu,” *Ricky* yéyè “mmpuku.” Nwamonu’s, paudi wamba ne... Ncya bushuwa menemene. “Les,” anyi cintu kampanda, kudidingi wînyikakù nansha umwe wa ku bânà beebe... bânà beebe dînà adi to. Piikalabi ne bikaadi nanku, udishintulule ne lukasa lwônsò, balumyana wa yaaya. Kudidingi... Nwêñù bàdì... Pawikala ungiitabuuja mêmè bu musadidi wa Nzambi, kulamikiku dînà adi pa mwânà mukwate ne bya luse awu to. Wamonu anyi? To, mukalenge, umwinyikeku dînà dya cyanaana didi kadiyi adi to. Ekelekele! Kabivwa bikengela mêmè kulalukila apu to, bwalu nyewu ndi mupatuke mu cyena-bwalu cyanyi, kadi ngaamanyi mene anu kucyamba’s ne kwôkò kwine kwamanyi kujika. Ndi... Ki mutubi’s, kuyi umanya ne ndibà kaayi dyûdi ucyamba to. Nwamonu anyi?

²⁵⁷ BaakaMubiikila ne: “Mwenyi, mwena lubuku, démon, Beelezebula,” bamba ne: “Ùdi udivwija Yéyè mwine Nzambi.” Kaa, ekelekele!

²⁵⁸ Yeshaayi muprofeta kaakambaku ne: “NebaMubiikile ne Nzambi Wa bucole” anyi? Yeshaayi 9:6: “Mbatulelele Mwânà, mbatupe Mwânà wa balume, ne bukalenge nebwikale pa makaaya Ende, ne Dînà Dyende nedibiikidiibwe ne Mubedyanganyi, Mukalenge wa Ditalala, Nzambi wa Bukole, Taatù wa kashidi.” Ncya bushuwa! Kabidi, Yone Munsantu 1:1: “Ku cibangidilu kwakadi Dîyì, ne Dîyì dyakadi ne Nzambi, ne Dîyì dyakadi Nzambi. Ne Dîyì dyakavwijiibwa mubidi ne dyàkasòmbela munkaci mwetu.” Nudi nwitatuuja aci anyi? Yéyè kavwa anu... Yéyè uvwa Muprofeta, kadi Ùvwa mutambe ne muprofeta; Ùvwa Nzambi-Muprofeta awu. Byakakengela bwa Yéyè kulwa bwa cinyi?

²⁵⁹ Vulukaayi ne, Yéyè udi ulwa mu ménà asatu a mwânà. Wakalwa dyambedi mu dînà dya Mwânà wa muntu. Kacya Kaakadibiikilaku Yéyè mwine ne “Mwânà wa Nzambi” to. Aci nudi bamanye. Nwamonu’s, Yéyè wakalwa mu Mwânà wa muntu, Muprofeta. Yehowah Yéyè mwine, Taatù, wakabiikila Yelemiya ne, “mwânà wa muntu”; muprofeta mmwânà wa muntu. Yéyè wakalwa...

²⁶⁰ Mpindyewu Yéyè wakalwa, paanyima paa Dituku dya Mpenta, Wakaalukila mu mmwenekelu wa Nyuma Mwîmpè, Nyuma mutambe-mfukilu. Mpindyewu Yéyè udi Mwânà wa Nzambi.

²⁶¹ Mu Bukalenge bwa bidimu cinunu Yéyè neikale Mwânà wa Davidi, musòmbe pa nkwasa wa butumbi wa Davidi. Nwamonu's, Yéyè mmulwe mu... Yéyè udi Mwânà wa Nzambi, Mwânà wa muntu, Mwânà wa Davidi.

²⁶² Kaa, Bible s'mmûle tente ne bimpòkòtò bya ngôlò ebi. Katwena mwa kubimana byônsò mu dilolo dimwepele to. Kadi bidi anu bikumbane bwa kujaalamija eci mpindyewu. Bidi mwa kwenzeka ne maalaba kabùyi mwa kucyaku to. Bidi mwa kwenzeka ne twikale bamane kuya kumpala kwa kucyabu maalaba. Bidi mwa kwenzeka ne ngiikale munkaci mwa kuiiisha muntu kampanda wíkala mumane kufwa kumpala kwa kucyabu mu dinda. Mbifwanyine kwenzeka ne mêmè ngiikale muye kumpala kwa kucyabu mu dinda. Mwaneetu wa balume, mwaneetu wa bakaji, aci kî mbwalu bukwatakaja to, maalu malelela adi enzeka! Katwena bamanye ne netuye pa dîbâ kaayi to, ne wêwè kwakupetaku mpunga nansha mukese paanyima paa mweyelu wà ndekeelu awu mumane kukuumuka mu mubidi amu to. Longolola bwalu abu patudi twakulangana apa, kwindidi too ne paacyabu mu dinda to, bidi mwa kwenzeka ne dîbâ diikale dimane kupita.

²⁶³ Monaayi mpindyewu, baakaMwenzela menemene anu cikaavwa baprofeta bambe ne nebènzè aci, anu menemene mudibo munkaci mwa kwenza mu dituku dimwedimwe edi mu Cikondo cya Laodikiya emu. Pawikala muswe kicitangila, balà Bwakabuulwibwa 3: "Mpofo, butaka, kadi kayi mucimanye to. Wipata Kilisto..." PakaadiYe ubanga kuDibuulula cyakabidi mu mmwenekelu wa dimiinu, dyôdì dimwedimwe dyakayà mu buloba adi ndyalukile bwa kwikal Mukaji-musela; anu Mukaji musela ne Mubaki, biikale musunya umwe ne mashi amwe, mudimu wa bwambi umweumwe awu, ne bintu bimwebimwe abi, wenza anu menemene cyakenzaYe aci; Nyuma.

²⁶⁴ Kadi's ki bôbò aba munkaci mwa kutentula ne kwenza bikwabo byônsò, ne muntu ne muntu udi ne wende mukanda ne muvukute lubilu, ne *bikampanda*. Kaa, kacya kanutu banji kuumvvwa masaluka bu nanku. Ne, sniff, sniff "Ndi muumvvwe mupuuya wa démon mpindyewu." Byônsò bya bikampanda, bikansanga abi, kabiyiku bya mu Mifundu to nansha kakese!

²⁶⁵ Kadi paabi cintu cishuwashuwale citeeka anu pansi mwab'awu kumpala kwabo's, buumuka baya ne: "Abi kî mbya mu bwanyi bulongolodi to." Ekelekele, ekelekele, anu, nwamonu's, mpofo anu yetu eyi menemene yilombola mpofo naayi. Bwônsò bwabo kabaakudishindaku mu mukidi anyi? Bafofomija kudi bilele bya bantu bya cyena mangumba, badi

baMwipata pambelu paa ekeleesiya wabo mwakamba Nzambi ne nebénzè amu, mu Bwakabuulwibwa 3; mutubi pa ciibidilu, mwakambiibwabi mu ciprofeta amu.

²⁶⁶ Monaayi muvwa Yesu mudi-...muDimanyishe kudi bayiidi aba, mpindyewu, nenku netujikije. Bayiidi babidi aba, Kaayifa...Keleopa's we, eyo, ne mulunda wende. Mpindyewu tudi mu dibiika dya ku lufu, dinda dya paanyima paa dibiika dya ku lufu, dibiika dya kumpala dya ku lufu; dinda dilenga kaayipu's we, Yesu mujuuke ku bafwe ne mwikale ne mwoyi munkaci mwa bantu Bende. Meeji malenga kaayipu's we!

²⁶⁷ Yéyè udi kaaba aka leelu ewu umwèumwè awu anu muvwaYe diine dituku adi amu, bwalu Yéyè udi umwèumwè awu makeelela, leelu, too ne kash-...Ne mwikale uDibuulula leelu ewu kutamba ne mukaadiYe mwenze mu cikondo kana cyónsò kacya ku diine dituku adi; mupicile mu blé ne mu cikolakola ne mu cizubu (byônsò abi bikaadi bimane kupita mpindyewu), tukaadi babwele cyakabidi mu blé. Nwamonu's, tukaadi baalukile babwele mu lutete.

²⁶⁸ Mumanyike bu...kumanya...Tangilaayi mushindu wakaDimanyishaYe kudi bantu aba, mpindyewu, vulukaayi ne, mbu Maasiya wabo (kumpala kwa twétù kujikija) wa Díyì dilaya dya cikondo. Monaayi! Wakamweneka kudi, kudi...mudiYe mwambe ne Neamweneke, kudi baprofeta. Monaayi: "Bakutakane, ne baa myoyi mineeme bujitu bwa kwitabuuja ne bivwa bikengela bwa byônsò byakafundabo bwa bwalu Bwende kudi baprofeta kuulabi."

²⁶⁹ Mutangilaayaaku Yéyè! Ùdi uleedila buludi ku Díyì dya Nzambi, kacya Yéyè kaakabambilaku ne: "Kanwena baMmanye anyi? S'ki Mémè ewu Maasiya awu udi mubiike ku lufu." Kaakambaku nanku awu to. Nwamonu's, Yéyè wakabapa anu Mifundu pa yóyi; bu mwakenza Yone, ne bakwabo bônsò. Nwamonu anyi? Ùvwa anu...Bikengela bwa bàdyängwìlèci nkaayaabo. Bikengela badikenketele bôbò nkaayaabo. Mpindyewu, kwikadi walaala tulu's, udikenketele wêwé nkaayeebe.

²⁷⁰ "Bakutakane, ne baa myoyi mineeme bujitu bwa kwitabuuja ne bivwa bikengela bwa byônsò byakambabo kudi baprofeta kwenzekabi." Kadyuwu kaayi bwa biine bavva balaka mukana bamba muvwabu baMumanyi. Nwamonu anyi?

²⁷¹ Monaayi mwakafikaYe ku dilenga dya cyena-bwalu aci. Kaakapatukaku buludi, mûngâfumu ku dyamba kukaadi ndambu wa tusunsa amu, wamba ne: "Ee, kanwena bamanye ne Mémè ki Maasiya wenu bwa cikondo eci anyi? Kanwena bamanye ne Ndi Yéyè awu anyi?" Musadidi mulelela wa Nzambi katuku udimanyisha mu mushindu awu to; Mufundu ngudi umanyisha ne yéyè awu nkampanda. Cya bushuwa, ki mwenzaye. Kadi kukokaYe anu ntéma yabo ku civwa baprofeta

bambe bwa kukeba mu cikondo cya Maasiya. Nwacyúmvù anyi? KwalukilaYe buludi ku ne: “Bakutakane, ne baa myoyi mineeme bujitu, bwa kubenga kwitabuuja ne bivwa bikengela bwa byônsò byakambabo kudi baprofeta bwa Maasiya kwenzekabi.”

²⁷² Yéyè, bu Yone, wakalekela Dîyì dya mu Bible diMumanyishe, civwaYe kudibo aci. Bivwa bikengela bwa cyôcì aci kutookeshiibwaci mu mushindu mukumbane. Piikalabi ne Dîyì dyakaMumanyisha, s'bivwa bikengela ne aci ciikale citooke tòò ne Yéyè uvwabo batangile awu ki uvwa mwena mulayi mwine. Bavwa bamanya ne bivwa bikengela bwa yéyè... bwa muntu kampanda kumataye mu cyalu pa dîbà adi.

²⁷³ Mona's, Yéyè kwamba ne: “Mpindyewu lekelaayaaku Mêmè nnuleeje cidi Dîyì dyamba ne ki cidi ne cya kwenzeka mu dituku edi.”

²⁷⁴ Mêmè, dilolo edi, ncyêñàku munkaci mwa kuteeta kunwambila, ku Dîyì ne ku Dîyì (nansha mwaba mene, ne mpenyi piine apu, ménà, nomba miine, bikwabo byônsò, ne bimanyinu byônsò, misangu, ne byônsò) ne, tukaadi mwab'ewu mene ku nshiikidilu aku anyi? S'ncya bushuwa ne nudi mwa kumona cîndì ngamba aci. Nwamonu anyi? Tangilaayi! S'mbitooke tòò mu mushindu wa kabiyi bikengela nansha dimanyishiibwa dipite apa to. Yéyè wakamba, pavwaYe pa buloba apa ne: “Kenketaayi Mifundu, mu Yôyì ayi mmunudi nwela meeji ne nudi ne Mwoyi wa Cyendeleele, Yôyì's ki yidi... . Yôyì's ki yidi... . Yidi yifila bujaadiki bwa ne Mêmè ndi cinyi,” nwamonu's, “ne Mêmè ndi Nganyi.”

²⁷⁵ Monaayi, Yéyè kubanga ne Môsà muprofeta ne: “Muprofeta...” Dutelonoma 18.15. Ndi munkaci mwa kutabaleela Mifundu kaaba aka, Dutelonoma 18.15, Môsà wakamba ne: “Mukalenge Nzambi webe...”

²⁷⁶ Nwamonu's, Nzambi wakaakula nende ku lusongo lwa mukuna. Nenku, kaa, ekelekele, mikungulu; bôbò kwamba ne: “Mukalenge kaa—kaakulu... Môsà akule yéyè, Nzambi to, bwa katwikadi twâlwa kubutuka.”

²⁷⁷ Yéyè kwamba ne: “Bôbò biine bămbì anu bilenga. Nêngìkalè... Ncyakwakulaku kabidi naabo mushindu ewu to, kadi Nêmbâjuudilè muprofeta.” Nenku ki civwa mukenji Wende ncyôcì aci ku ntwadijilu too ne ku ndekeelu. Cyôcì aci's ncidi cikengela bwa kukosa bwalu bwônsò nkôòng ku nshiikidilu. Bikengela anu cyôcì aci cikose bwalu, bwalu bidi bikengela bwa Dîyì dya Mukalenge dilwe kudi muprofeta. Ki cintu cimwepele kudiDi mwa kulwa's. Kabiyi nanku to, aci cidi cinyangakaja Dîyì dya Nzambi ne cidi ciMwambishisha cintu cidi kaciyi cyôcì to. Nwamonu anyi? KaDyakuyaku ku seminere kampanda to. Didi diya kudi muprofeta. Ne muprofeta mmutumiibwe kudi Nzambi, muteekiibwe. Ne mushindu unudi numanya ne bidi nanku, ne kaciyi cidi muntu mwambe to... .

²⁷⁸ Tukaadi bapetepete ba-Eliya, ne binkooci, ne bikwabo byônsò, ne binkutu, ne lukutukutu lwa mishindu yônsò, kadi balaluke e kuya kabwela mu malongolodi ne bikwabo byônsò.

²⁷⁹ Kadi nekulweku pa buloba apa, ku mulayi wa Nzambi, musadidi mushuwashuwale wa Nzambi, mumanyisha kudi Nzambi (ku Dîyì Dyende diikale dyandamuna dya dituku edi), watèèka Mukaji-musela mu bulongame (banyààbanyà balelela bakese menemene baa ekeleesiya) ne kuMwambula. Ncya bushuwa! Yéyè awu ki wâleeja ku bantu ne: “Monaayi, ki Yéyè ûmvwà ngamba wawa, nwamonu’s, wîkala ne cya kulwa.”

²⁸⁰ Nenku byônsò byàkambà baprofeta bwa bwalu Bwende abi, ne bwa cikondo eci, kaa s’bivwa bulelela bifwanyine kusankisha bwa kwikalà baMuteeleje wamba cyôci aci. Kanwenaayiku peenu bafwanyine kujinga kwikalà baMuteeleje ucyamba anyi? “Byônsò byakamba baprofeta abi bwa...” Vulukaayi ne, Yéyè wakamba bivwa baprofeta mwa kwamba bwende Yéyè mwine, Mwikale uDiteela Yéyè mwine, bivwaYe mwambe abi (ne Yéyè uvwa Dîyì); uteela’s.

²⁸¹ Mpindyewu tuteelejaayaaku Mêyì akateelaYe. Nudiku bajinge kuteeleja cyakabambilàYe anyi? Twänjààyi kulondaku anu muyiki wabo mpindyewu, kumpala menemene kwa twêtù kwimanyika.

²⁸² Mpindyewu, bakaavwaku babalondele maalu ônsò acìvwà afuma ku dyenzeka pa bivwa bitangila dipoopectiibwa dya pa nkuruse, a bwalu buvwabo balonde bwa ku lukita ne bwa ku majambu abu, ne bya ne bakaji abu bavwa baMumone, ne mukwabo uvwa pende mwambe ne bavwa baMumone, ne bikwabo. Yéyè kwamba... Bôbò—bôbò kuMulondela byôbì abi. Nenku Yéyè kutungunuka buludi ne Dîyì pa bivwa bitangila... uditeela Yéyè mwine mu Dîyì amu ne:

“Mpindyewu tangilaayi mu Zekaayi 12.” (Ùvwa ne cya kwikalà muteele Zekaayi 11.12.) “Bwalu Wakasumbishiibwa ku bicyele bya mfranga makumi asatu. Kabivwaku bikengela bwa Maasiya asumbishiibwe ku bicyele bya mfranga makumi asatu anyi?

“Mu Misambu 41.9, baakaMutungila kudi balunda Bende. Nwamonu anyi?

“Zekaayi 13.7, mulekela kudi bayiidi Bende.

“Mu Misambu 35.11, mufunda kudi bantemu baa mafi.

“Kudi Yeshaayi 35.7, kayi ditama kumpala kwa baMufundi, kayiku mutubule Mwende mukana to.” (Eyo, mukalenge.)

“Yeshaayi 50.6, Wakeediibwa mfimbu.

“Misambu 22—22, Wakeela lubila ku nkuruse ne: ‘Nzambi Wanyi, WâNdekèdì bwa cinyi?’ ‘Mifuba Yanyi yônsò yikaadi miNtangile.’ ‘Mbatubule byanza Byanyi ne makàsà Aanyi.’” (Tangilaayi biprofeta bivwaYe mwa kwamba!)

“Yeshaayi 9.6, ‘Mbatulelele Mwânà,’ ‘Virgo neimite difu,’ ne bikwabo.

“Kabidi ne mu Misambu 22.18, bôbò—bôbò—bôbò kwabanyanganabo bivwalu Byende munkaci mwabo.

“Mu Yeshaayi 7.14, ‘Virgo neimite difu.’

“Misambu 22.7 ne 8, pàmwâpa . . . musekiibwe kudi beena lukuna Bende, (Bende, biine bàvvà ne mbalunda Bende abu), beena lukuna Bende, ekeleesiya.

“Kabidi mu Misambu 22, Yéyè uvwa . . . mufuba nansha umwepele kawuwva ne cya kucibudiibwa to, kadi baakatubula byanza Byende ne makàsà Ende.

“Yeshaayi 53.12, mufwe pamwe ne benzavi.

“Mu Yeshaayi 53.9, muzaaza, ne mujiikiibwe pamwe ne mwaneetu wa balume mubanji.

“Mu Misambu 16.10, Wakabiishiibwa ku bafwe. Davidi ngwâkamba nanku ne: ‘Ncyakutwala bwa Wa Cijila Wanyi amone dibola nansha, anyi Ncyakulekela musuuka Wende mu iferno to.’ Yéyè’s mmubiishiibwe ku bafwe.

“Maalaki 3, Yone Mubatiji nguvwa muMudyanjididi.”

²⁸³ Ne bimfwanyi byônsò bivwa Ye mufwanyine kwikala muteele abi! Too ne ku Izaka muvwaye cimfwanyi Cyende pa Mukuna . . . pa mukuna pavwa tatwëndë Abraham muye nende apu, mu Genese 22.

²⁸⁴ Mpindiyewu ki wâkabangabò kumona ne Nganyi mwine awu uvwa muuje Mifundu yivwa milayiibwe bwa dituku adi eyi. Pàvwa mpa dîbà adi, paanyima pàà dîbà dimane kuya bikole. Kubangabo kumona ne, “Kaa! Ee, anji indilabi kakese tûng! Udi mumanye mudi bwalu anyi?” Baakamanya pa dîbà adi ne Mulunda wabo uvwabo bapoopele pa nkuruse awu, Yesu, ki uvwa Muprofeta uvwa mulayiibwe awu. Baakamanya bwalu . . . Nwamonu’s, kabavwa babalondèle maalu pa bivwa bitangila Mifundu to.

²⁸⁵ “Kadi, mwab’ewu, bintu byônsò bivwa ne cya kwenzeka ku nkuruse ebi, bintu byônsò ebi. Bakutakane, baa myoyi mineeme bujitu bwa kuumvwa byônsò bidi baprofeta bambe; muvwa Maasiya ne cya kukenga, ne kubwela mu butumbi Bwende, ne kubiika ku lufu mu dituku diisâtù.”

²⁸⁶ Bacidi anu benda baya’s: “Kaa, eyowa’s. S’ncya bushuwa’s. Mêmè ndi ngamba ne Yéyè—Yéyè. . . Myoyi yetu kayivwa yilakuka kapya munda mwetu anyi?” mwakambabo. Kabivwa bya bikemesha to muvwa myoyi yabo miteeme kapya! Biprofeta bivwa Ye ufila bivwà byûle abi.

²⁸⁷ Pa dîbà adi kubangabo kuumvwa ne Mulunda wabo, Muntu uvwabo badye nende, bayiikile nende, baswikakane nende, balobe nende mishipa, balaale nende mu meetu, ki uvwa muuje

Dìyì dyônsò dya dîbà dilaya adi! S'ki bwalu mbwôbò abu. Bakaavwa bende lwà makàsà ntanta wa kilomeeta citeema ne citupa, bimweke anu bu katanci kakese menemene, mûndì ncinka's, kadi bateeleje diyiisha dya mêmà asambombo pa ciprofeta cishindika (dileepa ndambu kutamba ditudi bateeleje dilolo edi edi, nwamonu's). Dîbà mpindyewu dikaavwa bu dibange kupita pa dîbà dya dilolo adi, Makênkè a dilolo akaavwa malwe.

²⁸⁸ Ndibà dyôdì dimwedimwe adi patudi twakulangana apa, ekeleesiya! Makênkè a dilolo akaadi malwe! Ebelu 13.8: "Yéyè udi umwèumwè awu makeelela, leelu, too ne kashidi." Kaa, maalu àdi ènzekà matookeshiibwe kudi ciprofeta, bya mwomumwe leelu ewu. Bukênkè bwa dilolo bulaya kudi muprofeta wa Nzambi, mu Zekaayi 14.7, adi mwa kutabaja cyakabidi mêsù a mwena kwitabuuja ku maalu adi munkaci mwa kwenzeka leelu ewu, adi majaadika kudi biprofeta bwa ne tukaadi ku cikondo cya nshiikidilu. Yesu ulwalwa.

²⁸⁹ Mwine...Bidi...

²⁹⁰ Mmwambe ne: "Nekwikale dituku diìkalà kadiyi dya dibiikidiibwa ne mbufuku anyi mmundaamuunya to." Yéyè ne: "Kadi ku dîbà dya dilolo nekwikale Bukênkè." Mpindyewu, tutu bamanye ne, bilondeshile mudi buloba busòmbe, dîbà ditu dijuuka ku esete dikabwela ku wesete. Mpindyewu, muprofeta mmwambe ne: "Nekwikale cipòòlò cya dîbà cileepa ciìkalà cibwicidile, cyenze bu...cidibo kabayi bafwanyine kubiikila ne mmundaamuunya anyi mbufuku to; ncyenze bu dituku dya mîdimà, dya dibungama."

²⁹¹ Mpindyewu, Mwânà wakajuukila penyi? Ncinyi...Awu ki uvwa M-w-â-n-à utudi twamba mpindyewu awu. Mbwa ne m-w-â-n-à wa mu bufuki utu ujuuka ku esete awu utu ukabwela ku wesete. Nzambi anu umwèumwè awu, anu umwèumwè awu...Dîbà's we, eyo. Ne M-w-â-n-à wa Nzambi wakajuukila dyambedi ku esete, kudi bantu baa ku esete.

²⁹² Nenku mpindyewu paanyima paa Yéyè mumane kuumuka, cyakenzabo ncinyi? Paanyima paa bidimu nkama isatu, baakabanga bulongolodi bwabo bwa kumpala, ekeleesiya wa Katolike wa cyena Loomo. Kupicilabo mu Cikondo cya Mîdimà, ne bôbò kumupatuka. Cyakenzabo ncinyi? Cintu anu cyôci cimwecimwe aci. Civwa ndituku dya...Dyôdì adi kadyakabiikidiibwa ne mmundaamuunya anyi mbufuku to. Bavwa ne bulongame bukumbane, ne baakiitabuua ne Yéyè uvwa Mwânà wa Nzambi, ne baakendela mu bukênkè bwine buvwabo paabo naabo abu, kwenzabo ekeleesiya yabo, kwibakabo mpitaadi ne tulaasa ne bikwabo, ne maaseminere, kutumabo bânà baabo balela mu tulaasa.

²⁹³ Kadi muprofeta mmwambe ne: "Nekwikale cyakabidi Bukênkè lwà ku dîbà dya dilolo. Mwânà neapatauke cyakabidi

patooke, nekwikale Bukénkè.” Cinyi? Mwânà anu umwèumwè (M-w-â-n-à) wâkabuuludiibwa mu mubidi pa dîbà dya dinda awu, kuntu kwaka, neabuuludiibwe cyakabidi ku ib'a mulolo.

²⁹⁴ Mpindyewu fwanyikijaayi ne Luuka Munsantu 17.30: “Nenku mu dituku adi, anu mwakadibi mu matuku a Sodoma amu, ku dikuupuka dya maalu a pa buloba, mu cikondo ciìkalà Mwânà wa muntu munkaci mwa kubuuludiibwa.”

Nekwikale Bukénkè lwà ku dîbà dya dilolo,
Njila wa ku Butumbi nenumupete bulelela.

²⁹⁵ Kaa, ekelekele! Balumyana wa yaaya, tukaadi penyi?

Matunga adi akosoloka, Izaleela udi utabuuluka,
Bimanyinu byàkadyànjilà baprofeta kwamba;
Matuku a baa Bisamba bya bende mmabala ku minu, mûle tente ne bintu bidi bikwacisha bwôwà; (Mutangilaayi numone mudiye ufinunukila uwela mu mbû!)
Alukilaayi, Éyi nwénù badi batangalake, kudi baa kwenu.

Dituku dya bupikudi dikaadi pabwîpi,
Myoyi ya bantu yidi yamba kwimana bwa bwôwà;
Ikalaayi buujiibwe ne Nyuma, ikalaayi ne myêndù yenu milongolola ne mitookesha,
Bandulukaayi! Bupikudi bwenu bukaadi pabwîpi. (Bikengela ùcyenzè.)

²⁹⁶ Mwaneetu wa balume, mwaneetu wa bakaji, cikondo's ncyá cikwacisha bwôwà's. Tangilaayi numone bintu bidi byambiibwe mu ciprofeta, tangilaayi numone mudi bintu byenzeka. Tangilaayi numone mudi ciprofeta cyônsò munkaci mwa kuula, pa dîbà adi mpatudi tumona cidì byônsò ebi byumvwija. Kî mmusùmbà wa mulongolongo wa dikolesha dya maalu to. Cidi n'Nzambi mwikale ushindika Mêyì Ende anu menemene, menemene. Lubwebwe ndutuuta, balunda baanyi, nyeemenaayi kudiLu lubilu ne mwenu mwônsò. Ciprofeta nyewu cidi munkaci mwa kushindika dituku ditudi ne mwoyi.

²⁹⁷ Twinyikaayaaku mitu yetu. [Mwaneetu wa balume kampanda udi wakula mu mwakulu mukwabo. Mwaneetu wa bakaji kampanda udi ufila dyandamuna. Mwaneetu wa balume kampanda pa cibumba cya ku cyambilu udi wamba ne: “Tudiku mwa kushalaayi pòlàà katanci kakese cyanaana anyi? Nzambi wâkwidì neetu kudi Mwaneetu Branham, ne dilaabiibwa didi pambidi paa Mwaneetu Branham, ne yêyè kí mmwanji kujikija to. Ne...” Katupa kaa mukaba wa mêtì munda mutupu—Muf.]

²⁹⁸ Nzambi munanga! Nudiku nufika ku dimona dituku ditudi ne mwoyi edi anyi, balunda baanyi? Nudi bafwanyine kupeta dikamakama dya kukokangana ne Nzambi anyi?

Nudiku bafwanyine kwamba ne “Yéyè kî mmubinge,” padiYe muCijaadike apa anyi? Yéyè mmuDyumvwijidi wa Yéyè mwine. Nudiku baswe kuMukwacila mudimu anyi?

Mpindyewu ne mitu yenu miinyika, ne myoyi yenu miinyika, mwaneetu wa balume, mwaneetu wa bakaji.

²⁹⁹ Bidi mwa kwenzeka ne ewu wikale wetu musangu wa ndekeelu wa kudisangisha. Bidi mwa kwenzeka ne kashidi keetu katuciyiku mwa... Même mufwanyine kwalukila mu cidimu eikwabo kubangila ku leelu ewu, bu mêmè mwa kwikalala ne mwöyi, nkufwanyine kwikalala bààbûngì baa ku badi kaaba aka mpindyewu aba bìikalà kabacyipu to mwine musangu awu. Nenku nebikengele bwa mêmè kutwilangana neenu ku Cibasa cya Cilumbulwidi bwa kulumbulula bwa byónsò bìndì mwambe dilolo edi ebi.

³⁰⁰ Kumpala kwa Nzambi, paucidi ne meeji ebe pa ôwò apa, udiku mwa kwenza bwalu ebu bwa Nzambi anyi? Pawikala mumanye ne udi... Ditangilaku anu mu lumwenu lwa Nzambi, Bible, nansha wêwè mwikale nganyi, wâmbè ne: “Ndi mumanye ne ndi mupangile bikole bwa kwikalala mwânà wa bakaji wa Nzambi, mona anu mushindu wûndì ngenza maalu ewu. Ndi mupangile bikole bwa kwikalala mwânà wa balume wa Nzambi, mona anu mushindu wûndì ngenza maalu ewu. Kadi, Nzambi, mêmè ncyêna muswe bwa kwikalala apa nansha, ndi—ndi muswe kulwangana bwa kufika pa kaaba aku.” Ndi muswe bwa wêwè kwela cyanza eyebe muulu kudi Nzambi, nansha wêwè mwikale nganyi, nansha mwikale usanganyiibwa mwaba kaayi mu citanda cijima emu ne: “Eyowa, ndi muswe kwikalala mwânà wa balume wa Nzambi. Ndi muswe kwikalala mwânà wa bakaji wa Nzambi. Ndi muswe kukumbaja kantu ne kantu kadi Mukalenge wanyi mulombe.” Mpindyewu udi... Nzambi anubeneshe. Ndi ngeela meeji ne mmakumi citeema pa lukama a bateeleji.

³⁰¹ Mpindyewu tangilaaku kuneeku, wêwè mulunda wanyi. Amba tûng bu ne uvwa mwa kwikalala ne mwöyi mu matuku auvwa mwa kuteeleja Yone uyiisha awu? Amba tûng bu ne uvwa mwa kwikalala ne mwöyi mu matuku avwa Yesu mwikale usanganyiibwa panwapa awu? Uvwa mwa kwikalala mwangate luseke lwa nganyi? Bu ne wêwè uvwa ne mwöyi mu... a Yesu. Vuluka ne, bu ne Yéyè... Bu ne uvwa ne mwöyi mwine musangu awu, s'bivwa mwa kwikalala anu mudibi mpindyewu emu. Yesu umwèumwè awu ngudi uDimanyishila ku Díyì Dyende ewu, wamonu's, ne Dyôdì kí nditambe kwanyishiibwa to.

³⁰² Kadi lekelaayi nnwâmbilèku ne, ncyêna mêmè nteeta kwambila bantu bwa kuumukabo mu ekeleesiya anyi... Ekelekele, mêmè ntu muswe bwa nwénù kwikalala nuya mu ekeleesiya: “Kanulekedi kudisangisha to.” Kadi cîndì nteeta kunwambila bwa kwenza nkwenza ne mwenu mwônsò bwa

kubwela mu Bukalenge bwa Nzambi. Umushaayi bintu ebi, maalu a pa buloba, ekeleesiya . . .

³⁰³ Beena Mpenta, nwêñu nudi nutamba kwenda kulwa baa ngiikadilu ya maalu a pa buloba be. Nudi nutamba kwenda kulonda maalu a pa buloba bibi be. Bidi anu bipeepele, nudi anu batungunuuke ne kwikala kubandila télévision ne bintu byônsò ebi, ne mushindu udibo benza, ne *bikampanda* byônsò, nenku katanci aka . . . Maaseminere, bilongelu bikaadi bibange kudya cibanga apa ne pààpa, ne *bikampanda*, *bikansanga*, ne *bikankenga*, nenku katanci aka . . . Bikengela bilwe mushindu awu. Ekeleesiya wa beena Mpenta, s'utu dyanyi dikwacisha dya ditambe bunene, nciyi mwa kwamba cintu cibi nansha cimwe bwende yéyè awu to. Kadi's ki cîndi ngeelela mbila ne: "Bânà beetu wanyi, patukaayi!" Dibiikila . . . Kanucyena kabidi nwenza masangisha a bwena anuvwa nwenzenzenza awu to. Bantu kabacyena kabidi muvwabô to. Kadi Yesu Kilisto udi umwèumwè awu, tubwelaayi munda Mwende.

³⁰⁴ Mpindiyewu, nwêñu badi ne byanza byela muulu abu, vulukaayi ne, kuwwa Lubwebwe lutuuta mu cipeela, ne mwine Mpokolo awu ucidi anu bwashi dilolo edi. Lubwebwe lwabo alu ndutuuciibwe, Kilisto, Yéyè ngudi Lubwebwe lutuuta alu.

³⁰⁵ Nenku dilolo edi, bwa ku dyanyi paanyi dimanya, ekeleesiya udi mwa kwikala . . . Cikondo cya dibiikila cidi mwa kwikala cikaadi cipite, ncyêna mumanye, ncyêna mwa kwamba aci to. Vulukaayi ne, bantu baakatungunuka anu ne kwenza masangisha, anu mwabô ne kale, paanyima paa dipoopediibwa dya Yesu pa nkuruse. Nenku . . . ne bantu bônsò abu, bôbò—bôbò nebalwe, bôbò . . . Tangilaayi numone! Bôbò—bôbò nebatungunuuke anu ne kuyiisha, biikale bamba ne badi "basungidiibwa" ne bikwabô byônsò, anu bu ne . . . "Buloba's mbutungunuuke anu mwabô ne kale," mwambambabo. Kadi's dîbâ nedikale dimane kupita mwine musangu awu.

³⁰⁶ Paucidi ne mpunga apa, mwaneetu wanyi wa balume; paucidi ne mpunga apa, mwaneetu wanyi wa bakaji; bwela mu Bukalenge bwa Nzambi. Kabyena bikukengela bwa kubwelela ku cintu kampanda cikwabu to pa kuumusha anu ku diitabuuja dya dipeepele edi bwa kwitabuuja Dîyì Dyende. Yéyè udi Dîyì adi! "Mukalenge Yesu, ndi mumanye ne ndi nditangila mpindiyewu mu lumwenu lwa Dîyì dya Nzambi; kaa, mushindu mwine wûndi mupangile's we. Kadi, Nzambi munanga, mwab'ewu dilolo edi, mu dilolo dya mu dimwe edi, muneemu mu San Bernardino, mu Californie emu, mu dibalaasa edi emu, eci ki—eci ki cyônsò paanyi cîndi naaci, Mukalenge, kadi nénKupèëshèci. Udiku mwa kuswa bwa kungangata mûndi emu anyi, Mukalenge? Udiku mwa kundekela nyeemena ku nkuruse ne lukasa lwônsò anyi? Ndi mene mmona baamisanjeele. Ndi mmona cikondo, ndi mmona dibiikila dya kupatuka mu Sodoma. Ndi mmona bimanyinu. Ndi mmona kasumbu kaa Abraham

munkaci mwa kupeta Bukènkè. Ndi mmona dimweneshiibwa, Yesu munkaci mwa kumweneshiibwa cyakabidi munkaci mwetu mene anu mwakadibi amu. Ndi mmona bintu byônsò biWakalaya abi. Ndi mmona batentudi; ndi mmona Wêwè mwambe ne: ‘Anu mwakadibi mu matuku a Môsà,’ muvwa Yambele ewu ne Yane mwa kwalukila bwa bôbò kutentula, kadi batungunuke anu ne kushala mu diyaala dimwedimwe muvvabo amu adi.”

³⁰⁷ Nwamonu’s, bôbò kabavva mwa kulonda Môsà ku Dîyì adi ne kupatula bânà abu muntwamu ne kubwela naabo mu cipeela to, bwalu bôbò bavva baswikakane ne Ejipitu. Kabavwaku mwa kucyenza to, nansha muvvabo paabo benze byenzedi bimwebimwe bivwaye mwenze abi. Kadi dikutakana dyabo dyakamweneshiibwa. Ne Bible udi wamba ne, aci ng’EMU MMUDI MUKALENGE WAMBA: “Necyenzeke cyakabidi mu matuku a ndekeelu.”

³⁰⁸ Nenku nyawu nucimona ne enu abidi, pawikala baa nyuma. Mêmè ndi... Mêmè ncyêna mwa kuCyumvwijaku to. Kabyena ne mushinga bwa mêmè kuCyumvwija to. “Mikooko Yanyi yidi yumvwa Dîyì Dyanyi.” Tuyaayi kudiYe mpindyewu, patucidi ne mpunga apa. Kí mmwômò anyi?

³⁰⁹ Pawikala dijinga ne dibatiiza dya Nyuma Mwîmpè, pawikala dijinga ne didilambula dya cyakabidi, nsòmbelu mupyamupya; mpaasata webe kaakukudyombola nansha, yêye neakunange bwa cyôcì aci. Udire anu wêwè yônsò kudi Nzambi dilolo edi, patucidi kaaba aka apa. Lekela... Eyowa, ndi mumanye ne bivwa bikole, bya bitapa ku mwoyi, bya pabwabi, ncyêna ngenza aci bwa kwikala ne Iwonji to, ndi ngenza aci bwa kwikala ne meeji matooke. Ndi ngenza aci bwalu ndi mununange, ndi munange Nzambi, ne ndi ncyenza bwa kuteeta kunukwacisha. Ne cya bushuwa, mulunda wanyi, ndi—ndi—ndi ngiitabuuja... Kabidi ne mwoyi wanyi wônsò, ne diitabuuja dyanyi dyônsò, ndi ngiitabuuja ne Mukenji wanyi mmufumine kudi Nzambi. Wôwo—Wôwò mmunujaadikile aci, munda mwa bidimu.

³¹⁰ Mpindyewu teeleejaaku, dilolo edi lekelela byônsò byûdì naabi abi, byônsò byûdì naabi dijinga abi. Mêmè ndi ngiitabuuja ne, ne mwoyi wa lulamatu, mulâmbula, bu wêwè anu mwa kuuukila kuulu cyanaana, ne kwela byanza muulu kudi Nzambi, ne kwamba ne: “Nzambi munanga, ki mêmè ewu. Ngangataaku, Mukalenge. Ncyakwikala kabidi nkwwata mudimu ne meeji aanyi mêmè mwine ne didiyumvwijila dyanyi mêmè mwine to. Dîyì Dyebe didi dyamba ne ndi ne cya kwikala ‘wa cijila, ndi ne cya kulediibwa cyakabidi, ne cya kuujibwa tente ne Nyuma, ne pa dîbà adi Nyuma neandombole mu Bulelala bwônsò.’ Nzambi munanga, ki mêmè ewu, ndombolaaku.” Uduku mwa kuswa bwa kwenza nanku anyi? Pawikala muswe kwenza nanku, ela cyanza muulu, wämbè ne: “Ndi muswe bwa kwenza nanku, ndi muswe.”

³¹¹ Nanku tujuukilaayaaku bônsò kuulu.

Anu mûndì emu, nciyi ne cya kudilumbulwila naaci,
 Kadi anu ne Mashi Ebe akeediibwa panshi bwanyi mêmè,
 Ne Wêwè udi umbiikila bwa kulwa Kûdî,
 Éyì Mwânà wa mukooko wa Nzambi, (Ciibi cimwepele cya Nzambi)... ndwa! Ndi...

Mpindyewu angata mudimu webe wônsò awu, bikwabo byônsò, dicyoka dyebe adi, byônsò abi! Amba tûng bu ne wêwè uvwa munkaci mwa kupùnga ne lufu mpindyewu?

Anu mûndì emu, Wêwè neùngaakìdilè, Neùnjingilè difika dilenga, neùmfwilè luse, neùnkezulè, neùngaakìdilè;
 Bwalu ndi...

Udiku mwa kuswa bwa kwela cyanza muulu anyi, mu eci cituminyi mpindyewu?

... mulayi Webe, ndi muswe kwitabuuja, Éyì Mwânà wa mukooko wa Nzambi, ndi ndwa! Ndi ndwa!

³¹² Mpindyewu padi mwimbi wa cisanji cya orgue mucikâle utungunuka ne kwimba apa, muntu ne muntu wa kutudi ikale...

³¹³ Nwénù bansonga, nudi baswe kushala mushindu ewu mudi badi pambelu apa mu mùsèèsù aba, musumba wa bangondavi aba ewu anyi?

³¹⁴ Wêwè mwaneetu wa bakaji, udi muswe kwikala ne nsuki mîpi, padibi buneeme bwa Bunaazi bwebe kudi Nzambi mbwa kwikala ne nsuki mile anyi? "Bidi bundu kudi mukaji bwa kukosa nsuki yende." Udi muswe kuvwala tuuipè tukese twa kale etu ne bikwabo bidibo bavwala leelu ewu ebi, nkanzu wa usalulangana masandi ewu, mubidi webe mwikalé mumwenikelemu, pambelu pààpa mu mùsèèsù anyi? Utuku mumanye ne mulume yônsò udi ukutangila udi wenda neebe masandi munda mwa mwoyi wende anyi? Kadi peebe nyawu udizanjika wêwè mwine mushindu awu. Nutuku bamanye, nwénù bakaji, nwénù batu badilaaba bilaabu bya kwisù abu, ne kuvwa mukaji anu umwepele mu Bible ukaavwaku mudilaabe bilaabu bya kwisù anyi? Kadi Nzambi wakamufila kudi mbwa bu cyakudya. Izabela kampanda, dînà dîkaadì dikinyibwe anu kacya ku dituku dyende adi, bwa byenzedi byende bya ciine aci abi. Nutuku bamanye ne Eliya muprofeta ngwâkeela cyôci aci mulawu ne wâkamutandisha patooke mushindu awu anyi? Nutuku bamanye ne Helodyasa ngwâkalumbatanganabò nende kudi Yone Mubatiji anyi? Nutuku... Wêwè kwêna muswe kwikala cintakanyi cya pa buloba cya Hollywood aci to. "Wêwè munange maalu a pa buloba anyi bintu bya pa buloba, dinanga dya Nzambi kadyena munda mwebe to."

³¹⁵ Mwaneetu, mwambi naanyi, cintu nansha cimwe... Bu wêwè mwa kuswa ungumvweku, mêmè ndi mwaneenu. Udi muswe kwikalà muswikakane, ne nwêñù bidimba bya ekeleesiya bya ekeleesiya kampanda (Méthodiste, Baptiste, anyi cyônsò ciine cyûdì mwa kwikalà aci), udi muswe kwikalà munanukile mu dingumba adi anu bwalu mamwëbè ne kakwëbè mukaji bavwa bananukilemu anyi? Yeyè awu's uvwa mukapatuke mu cintu kampanda bwa kulwaye kubwela mu cyôcì aci, cìvwà ciikale Bukénkè bwa diine dituku adi aci; cyôcì aci, bu mu bikondo bya Noa. Edi ndituku dikwabo.

³¹⁶ Wêwè udi wamba ne: "Ee, mêmè mvwa ne..."

³¹⁷ Edi kî ndituku dya Mpenta to. Cikondo cya beena Mpenta cikaadi cimane kupita. Mpenta ukaadi mumane kuya, eci ncikondo cya dinowa. Nwamoru anyi? Nenku cikondo cya dinowa, lutete; ne mâyì akaadi mamana kupongolola, lutete lukaadi lwenda luboba. Lwâ ubwele mu lutete, wêwè mwaneetu wa balume munanga. Nteelejaayi mêmè, ngiitabuujaayi mêmè, panwikala nungitabuuja ne ndi musadidi wa Nzambi, muntu ne muntu, mu mushindu wetu wa sungasunga, twinyikaayi mitu mu kudipwekesha kwônsò bwa kulambula disambilà ditudi—ditudi bamanye ne ki divwa dikengela twêtù kulambula adi ne: "Nzambi, ngangataaku mündì emu."

³¹⁸ Nenku mwaneetu wa balume, mwaneetu wa bakaji, nyewu ndyadija pa cyoshelu dilolo edi, mêmè paanyi: Nzambi, mfwimbeku umvvije mushiilangane. Enzaku cintu kampanda, Nzambi, ungenzeku mu mushindu Webe Wêwè.

³¹⁹ Nudi nwela meeji ne mbipeepele bwa kwimana kaaba aka ne kusunsulula bantu tupese tupese mushindu awu anyi? S'ncintu cikole cya dyenza. Kadi dyakabi diikale kündì mêmè pângìikalà nciyi ncyenza.

³²⁰ Nzambi munanga, padi bateeleji aba biinyike mitu yabo ne myoyi yabo apa, mu bikondo bidi kabiyi bya tuseku bya dyoya dya muyiiki wa dilongesha dya Bible edi ebi; patudi tumona dishindika dya Nyuma Mwîmpè udi munungishe ditunga edi mpala ne nyima, ne mpala ne nyima, matabuluja manene ne bimanyishilu binene, bamanye ne bikengela cintu kampanda cilonde cyôcì aci. Ne pashiishe kumona Banjelo abu mwandamatekete bapweka pa lusongo lwa mukuna wawa mu Arizona, pavwa nansha bikandakanda biCipatule mu ditunga dijima. Pa kumona Yesu Yeyè mwine mu maulu mwamwa, mutangile pansi, wamba ne: "Mu Bwakabuulwibwa 10.7, mu Mukenji wa mwanjelo wa mwandamatekete, Bitampi ebi bivwa mwa kukangudiibwa, Maalu masokoka a Nzambi avwa mwa kumanyishiibwa," biine bivwa balongolodi kabayi balaale ntanta bule bukumbane bwa—bwa kubipatulabo to. Kadi apa, Bitampi Mwandamatekete ebi bivwa bikange cintu cyônsò mu kaabujima abi bivwa ne cya kukangudiibwa mu

dituku edi. Pa kumona bimanyinu byônsò binene ne maalu a kukema bidi byenjiibwe ebi, bishindikiibwe, bidyanjila kwamba kumpala kwa kwenzekabi, ne musangu nansha umwe Wêwè kuyiku mututekeshe mu maboko, kadi mubifikishe ku dyenzeka menemene anu mwakambiibwabi.

³²¹ Nzambi munanga, tudi bamanye ne Yesu Kilisto udi munkaci mwetu. Tudi bamanye ne Yéyè udi kaaba aka. Ùdi kaaba aka dilolo edi, Nzambi utu kayi umweneka awu udi neetu kaaba aka, ne udi mwa kushindika mulayi ne mulayi wônsò wakambaYe mu Dîyì Dyende. Mushindu mwine wuwimànyì kadi kubajaadikila's we, mubélè nyima, mu ntwdajilu wa ku mbangilu kumpala mene kwa batentudi kubwelabo mu cyalu, Mukalenge, anyi kwa kubwelabo mu lu—lu—lubilu alu, bu mutudi mwa kwamba. Wêwè kuleeja ne kujaadika, kudyanjila kwamba anu mu byôbì menemene mushindu uvwabi mwa kwenzeka, kadi nyewu tubimona byenzeke mushindu awu. Nenku, Taatù Nzambi, tudi bamanye ne kacyena mwa kwikalala muntu to, cidi ne cya kwikalala Nzambi. Pa nanku tudi tumanya ne ng'Wêwè mwab'ewu dilolo edi. Utufwileku luse ku mpekaatu yetu.

³²² Nzambi munanga, Wêwè nyewu watwöndòpù mabeedi etu, mpindyewu tufwi—tufwilaaku luse ku mpekaatu yetu, Mukalenge, ya kubenga kwikalala mwena Kilisto wa mushindu uvwa ukengela kwikalala awu, katuyi... Twamba mutudi mulume anyi mukaji wa Evanjeeliyo mu kaabujima, kadi nyewu tudisangana twétù biine badyüpwile mu tulu bu nzoolo wa cyena mangumba. Watukwacishaku, Nzambi munanga, ûtwângâtè ne utunyukulule ku Nyuma Mwîmpè Webe. Ne kwôkò kwikale nî ncinyi nî ncinyi munda mwetu cidi kaciyi cifwanangane neebé Wêwè to, ucipatuleku munda mwetu, Mukalenge. Nenku ushimikeku makàsà etu pa Dîyì dya Cijila dya Nzambi, ne wénzèku bwa Nyuma Mwîmpè òshè too ne munda mwa mwoyi wetu ne umushe bisota byônsò bya bupidya ne dibùngà dya tulu twa dicyokakana dya dituku edi; kaa, tujuukeku bwa tudinyukulule twétù biine. Enzaku nanku's, Nzambi. Tûkezùlèku! Tûfimbèku! Tûsongèku! Nzambi, enzaku nanku.

³²³ Piikalaku nî nganyi nî nganyi munda emu dilolo edi, Mukalenge, udi mulame munda mwa mwoyi wende lwôlò lutete alu, mutoloku wa Nzambi udi mulongolwela Mwoyi kacya ku difuka dya dyulu ne buloba awu; ndi mumanye, Mukalenge, bwa ne yéyè awu mmwenzejiibwe bwa kuteeleja pa dîbà edi. Pa nanku, nyewu ndomba, Nzambi, bwa Wêwè kuuja musuuka wende ne kumukkenkeshila ne dibatiiza dipiyadipya dya Nyuma Mwîmpè, ne kumutuma mu njila wende, wenda ucyonkomoka ne mwikale ne disanka.

³²⁴ Mukalenge Nzambi, udi... Nyewu mmufila kûdì Wêwè. Ncyéna mumanye mwine awu ne nganyi to, Wêwè ngudi mumanye. Mémè ndi mwambule bujitu anu bwa kuiiisha Dîyì

Dyebe, Mukalenge, paudi Wêwè uDibuulula apu. Wêwè ngudi mwambule bujitu bwa bidi bishaala abi: mwaba udi Dimiinu dimata awu. Mêmè ndi nDikupa anu cyanaana. Mukalenge Nzambi, ndi ndomba bwa Diikaleku dimate mu buloba bwîmpè, bubanjike dilolo edi. Bwa bààbûngì kuDimonabo, Mukalenge, ne kujuukabo bu beena Kilisto baa bakenka mu matuku a ndekeelu aa, bwa cintu cinene citudi bindile bwa kulwaci aci, cyalwaku lukasa. Enzaku nanku's, Mukalenge. Nenku Wêwè newangate Ekeleesiya Webe, Mukaj'Ebe musela, uye Nende kumbelu. Tudi tuCimona cyônsò citeekiibwe mu bulongame. Lwâku's, Mukalenge Yesu. Nyewu tulambula byônsò kûdi Wêwè, mu Dînà dya Yesu Kilisto, bwa bipeta. Amen.

Ndi muMunange, ndi muMunange
Bwalu Yéyè wakannanga kumpala
Ne wakampetela lupandu
Ku...wa Kalvariyo.

³²⁵ Nudi baMunange anyi? Ee, nanku bikengela nunangangane muntu ne mukwende. Labulanganaayi ku cyanza muntu ne mukwende panudi nuwimba cyakabidi apu:

Ndi muMunange, ndi muMunange
Bwalu Yéyè wakannanga kumpala
Ne wakampetela lupandu
Ku...

³²⁶ Mpindyewu tumupaayi Yéyè butumbi. Mbanganyi badi bamanye musambu ewu wa ne:

NêmMupè butumbi, nêmMupè butumbi,
Tumbishaayi Mwânà wa mukooko mushipa
bwa bangènzàmpèkààtù;
Mupaayi butumbi nwêñù bantu bônsò,
Bwalu Mashi Ende mmasukule dikeji dyônsò.

³²⁷ Tuwimbààyi mpindyewu:

NêmMupè butumbi, nêmMupè butumbi,
Tumbishaayi Mwânà wa mukooko mushipa
bwa bangènzàmpèkààtù;
Mupaayi butumbi nwêñù bantu bônsò,
Bwalu Mashi Ende mmasukule dikeji dyônsò.

³²⁸ Kanwenaayiku nudyumvwa basukudiibwe munda munda mwônsò amu anyi? Elaayi byanza muulu nwâmbè ne: "Kaa, aci's cidi cyenza ne ndyúmvwè bilenga." Mwaneetu, mêmè ntu munange misambu ya cyena kale ayi. Kanwena peenu bayinange anyi? Yidi yipweka too ne mu mwoyi's.

NêmMupè butumbi, nêmMupè butumbi,
Tumbishaayi Mwânà wa mukooko mushipa
bwa bangènzàmpèkààtù;

Mupaayi butumbi nwêñù bantu bônsò,
Bwalu Mashi Ende mmasukule dikeji dyônsò.

³²⁹ Twëlààyi anu byanza muulu cyanaana mpindyewu tutumbishe Nzambi, muntu ne muntu wa kutudi, mu mushindu wetu wa sungsunga.

³³⁰ Mukalenge Yesu, nyewu tudi tuKwela twasakidila. Tudi tuKutumbisha, Mukalenge. Tudi tuKupa butumbi bwa cisamba cibiikidiibwe bwa kupatuka, kupatuka mu Babulooна. Tudi tuKwela twasakidila bwa Mashi a Mwan'Ebe, Yesu Kilisto. Tudi tuKwela twasakidila bwali Yêyè udi utuvwija batooke mu kasunsa emu. Tudi tufwa lus-... Tudi tulomba luse ku bilema byetu, ku dikutakana dyetu, Mukalenge, ditetukatetuka dyetu dya mu mîdimà. Éyi Nzambi wa yaaya, swaku bwa tujuuke ne tukenke, ne twendele mu Bukénkè bwa ib'a mulolo, ne twikale mamuma a Muci udi upatukila ku Makénkè a ib'a mulolo awu. Enzaku nanku's, Nzambi munanga. Nyewu tudilambula twêtù biine kûdì Wêwè, mu Dînà dya Yesu Kilisto.

³³¹ Mpindyewu ne mitu yenu miinyika, ndi nnupa bampaasatu badi batwe disangisha edi nyama ku mikolo abu.



MAALU ÀDI ÈNZEKÀ LEELÙ MMATÒÒKESHA KÙDÌ CIPRÒFETÀ LUA65-1206
(Modern Events Are Made Clear By Prophecy)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dimwe dilòlòlò, mu matuku a6 a ngondo wa dikumi ne mwibidì, cidimu cya 1965, bwa didya dya Bwobumwe bwa Buloba bujimà bwa Beena Kantu-ku-byanza bàà Evanjeeliyo mu Kaabujimà ku Orange Show Auditorium mu San Bernardino, Californie, U.S.A. Ndyumusha pa mukaba wa mèyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmuntuuta ku cyamu ne mwabanya kùdì Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lüntândalà, kulamiibwa mu cikàlwîlà, kukudimunyibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org